











# ষোড়শী

নাটক

Bangiya Sahitya Parishad Granthago  
Calcutta

শরৎচন্দ্র চট্টোপাধ্যায়

নাট্যমন্দির কর্তৃক অভিনীত


প্রথম অভিনয়-রঙ্গমণী—শনিবার—২১শে:শ্রাবণ ১৩৩৪

গুরুদাস চট্টোপাধ্যায় এণ্ড সন্স

২০৩/১/১, কর্ণওয়ালিশ স্ট্রীট • কলিকতা

দেড় টাকা

অষ্টম সংস্করণ



শরৎচন্দ্র চট্টোপাধ্যায়





# ষোড়শী

## প্রথম অঙ্ক

### প্রথম দৃশ্য

#### চণ্ডীগড়—গ্রাম্যপথ

বেলা অপরাহ্ন-প্রায়। চণ্ডীগড়ের সন্ধ্যার গ্রাম্যপথের পথে সন্ধ্যার ধূসর ছায়া নামিয়া আসিতেছে। অদূরে বীজগাঁ'র জমিদারী কাছারীবাটির ফটকের কিয়দংশ দেখা যাইতেছে। জন দুই পথিক দ্রুতপদে চলিয়া গেল, তাহাদেরই পিছনে একজন কৃষক মাঠের কণ্ঠ শেষ করিয়া গৃহে ফিরিতেছিল, তাহার বাঁ কাঁধে লাঙ্গল ডান হাতে ছড়ি, অগ্রবর্তী অদৃশ্য বলদ-ঝুগলের উদ্দেশে হাঁকিয়া বলিতে বলিতে গেল, “ধলা, সিধে চ’ বাবা, সিধে চল্! কেলো, আবার আবার! আবার পরের গাছ-পালায় মুখ দেয়!”

কাছারীর গমস্তা এককড়ি নন্দী ধীরে ধীরে প্রবেশ করিল এবং উৎকণ্ঠিত স্বরায় পথের একদিকে যতদূর দৃষ্টি যায় গলা বাড়াইয়া কিছু একটা দেখিবার চেষ্টা করিতে লাগিল। তাহার পিছনের পথ দিয়া দ্রুতপদে বিশ্বস্তর প্রবেশ করিল। সে কাছারীর বড় পিয়াদা, তাগাদায় গিয়াছিল, অকস্মাৎ সম্বাদ পাইয়াছে বীজগাঁ'র নবীন জমিদার জীবানন্দ চৌধুরী চণ্ডীগড়ে আসিতেছেন। ফ্রোশ দুই দূরে তাহার পাল্কি নামাইয়া বাহকেরা ক্ষণকালের জন্য বিশ্রাম লইতেছিল, আসিয়া পড়িল বলিয়া।

বিশ্বস্তর। নন্দীমশাই, দাঁড়িয়ে কসতেছ কি? হজুর আসছেন যে!

এককড়ি। (চমকিয়া মুখ ফিরাইল। এ দুঃসম্বাদ ঘণ্টাখানেক পূর্বে তাহার কানে পৌঁছিয়াছে। উদাস কণ্ঠে কহিল) হঁ।

বিশ্বম্ভর। হুঁ কি গো? স্বয়ং হজুর আসছেন যে!

এককড়ি। (বিকৃত স্বরে) আসছেন ত আমি করব কি? খবর নেই, এতলা নেই—হজুর আসছেন। হজুর বলে ত আর মাথা কেটে নিতে পারবে না!

বিশ্বম্ভর। (এই আকস্মিক উত্তেজনার অর্থ উপলব্ধি না করিতে পারিয়া এক মুহূর্ত্ত মৌন থাকিয়া শুধু কহিল) আরে, তুমি কি মরিয়া হয়ে গেলে নাকি?

এককড়ি। মরিয়া কিসের! আমার বিষয় পেয়েছে বই ত কেউ আর বাপের বিষয় বলবে না! তুই জানিস্‌ বিগু, কালিমোহনবাবু ওকে দূর করে দিয়েছিল, বাড়ী চুকতে পর্য্যন্ত দিত না। তেজ্যপুতুরের সমস্ত ঠিক ঠাক্, হঠাৎ খামকা মরে গেল বলেই ত জমিদার! নইলে থাকতেন আজ কোথায়? আমি জানি নে কি!

বিশ্বম্ভর। কিন্তু জেনে স্ত্রবিধেটা কি হচ্ছে শুনি? এ মামা নয় স্ত্রায়ে। ও কথা ঘুণাগ্রে কানে গেলে ভিটেয় তোমার সন্ধ্যা দিতেও কাউকে বাকি রাখবে না। ধরবে আর ছম্‌ করে গুলি করে মারবে। এমন কত গণ্ডা এরই মধ্যে মেরে পুঁতে ফেলেছে জানো? ভয়ে কেউ কথাটি পর্য্যন্ত কয় না।

এককড়ি। হাঁঃ—কথা কয় না! মগের মল্লুক কিনা!

বিশ্বম্ভর। আরে মাতাল যে! তার কি হুঁশ্‌ পবন আছে, না, দয়া-ময়া আছে! বন্দুক পিস্তল ছুরি-ছোরা ছাড়া এক পা কোথাও ফেলে না। মেরে ফেললে তখন করবে কি শুনি?

এককড়ি। তুই ত সেদিন সদরে গিয়েছিলি—দেখেচিস্‌ তাকে?

বিশ্বম্ভর। না, ঠিক দেখি নি বটে, তবে সে দেখাই। ইয়া গাল-

পাট্টা, ইয়া গৌফ, ইয়া বুকের ছাতি, জবা-ফুলের মত চোখ তাঁটার মত বন্ বন্ করে ঘুস্চে—

এককড়ি। বিশ্ব, তবে পালাই চ'।

বিশ্বস্তর। আরে পালিয়ে ক'দিন তার কাছে বাঁচবে নন্দীমশাই? চুলের ঝুঁটি ধরে টেনে এনে খাল খুঁড়ে পুঁতে ফেলবে।

এককড়ি। কি তবে হবে বল? মাতালটা যদি বলে বসে শান্তি-কুঞ্জেই থাকবো?

বিশ্বস্তর। কতবার ত বলেছি নন্দীমশাই, এ কাজ ক'রো না, ক'রো না, ক'রো না। বছরের পর বছর খাতায় কেবল শান্তিকুঞ্জের মিথ্যে মেরামতি খরচই লিখে গেলে, গরীবের কথায় ত আর কান দিলে না।

এককড়ি। তুইও ত কাছারীর বড় সর্দার, তুইও ত—

বিশ্বস্তর। দেখ, ও সব শয়তানি ফন্দি ক'রো না বল্চি! আমার ওপর দোষ চাপিয়েছ কি—ওগো, ওই যে একটা পাল্কি দেখা যায়!

নেপথ্যে বালকদিগের কণ্ঠধ্বনি শুনা গেল। বিশ্বস্তর পলায়নোক্ত এককড়ির হাতটা ধরিয়া ফেলিতেই সে নিজেকে মুক্ত করিবার চেষ্টা করিতে করিতে

এককড়ি। ছাড়্ না হারামজাদা।

বিশ্বস্তর। (অনুচ্চ চাপা কণ্ঠে) পালাচো কোথায়? ধরলে গুলি করে মারবে যে!

এমনি সময়ে পাল্কি সম্মুখে আসিয়া উপস্থিত হইতে উভয়ে স্থির হইয়া দাঁড়াইল।

পাল্কির অভ্যন্তরে জমিদার জীবানন্দ চৌধুরী বসিয়াছিলেন, তিনি ঈষৎ

• একটুখানি মুখ বাহির করিয়া জিজ্ঞাসা করিলেন

ওহে, এ গ্রামে জমিদারের কাছারী বাড়ীটা কোথায় তোমরা কেউ বলে দিতে পারো?

এককড়ি। ( করজোড়ে ) সমস্তই ত হজুরের রাজ্য।

জীবানন্দ। রাজ্যের খবর জানতে চাই নি। কাছারীটার খবর জানো?

এককড়ি। জানি হজুর। ওই যে।

জীবানন্দ। তুমি কে?

এককড়ি ও বিশ্বস্তর উভয়ে হাঁটু গাড়িয়া ভূমিষ্ঠ প্রণাম করিয়া উঠিয়া দাঁড়াইল

এককড়ি। হজুরের নফর এককড়ি নন্দী।

জীবানন্দ। ওহো, তুমিই এককড়ি—চণ্ডীগড় সাম্রাজ্যের বড় কর্তা? কিন্তু দেখ এককড়ি, একটা কথা বলে রাখি তোমাকে। চাটুবাক্য অপছন্দ করি নে সত্যি, কিন্তু তার একটা কাণ্ডজ্ঞান থাকাটাও পছন্দ করি! এটা ভুলো না। তোমার কাছারীর তশিল কত?

এককড়ি। আজ্ঞে, চণ্ডীগড় তালুকের আয় প্রায় হাজার পাঁচেক টাকা।

জীবানন্দ। হাজার পাঁচেক?—বেশ।

বাহকেরা পালকি নীচে নামাইল। জীবানন্দ অবতরণ করিলেন না, শুধু পা দু'টা

বাহির করিয়া ভূমিতলে রাখিয়া সোজা হইয়া বসিয়া কহিলেন

বেশ। আমি এখানে দিন পাঁচ-ছয় আছি, কিন্তু এরই মধ্যে আমার হাজার-দশেক টাকা চাই এককড়ি। তুমি সমস্ত প্রজাদের খবর দাও বেন কাল তারা এসে কাছারীতে হাজির হয়।

এককড়ি। যে আজ্ঞে। হজুরের আদেশে কেউ 'গরহাজির' থাকবে না?

জীবানন্দ। এ গাঁয়ে দু'ধু বজ্জাত প্রজা কেউ আছে জানো?

এককড়ি। আজ্ঞে, না তা এমন কেউ—শুধু তারাদাস চক্কোতি—  
তা সে আবার হজুরের প্রজা নয়।

জীবানন্দ। তারাদাসটা কে?

এককড়ি। গড়চণ্ডীর সেবায়েৎ।

জীবানন্দ। এই লোকটাই কি বছর-দুই পূর্বে একটা প্রজা  
উৎখাতের মামলায় আমার বিপক্ষে সাক্ষী দিয়েছিল?

এককড়ি। (মাথা নাড়িয়া) হজুরের নজর থেকে কিছুই এড়ায় না।  
আজ্ঞে, এই সেই তারাদাস।

জীবানন্দ। হঁ। সেবার অনেক টাকার ফেরে ফেলে দিয়েছিল।  
এ কতখানি জমি ভোগ করে?

এককড়ি। (মনে মনে হিসাব করিয়া) ষাট-সত্তর বিঘের কম নয়।

জীবানন্দ। একে তুমি আজই কাছারীতে ডেকে আনিয়ে জানিয়ে  
দাও যে বিঘে প্রতি আমার দশটাকা নজর চাই।

এককড়ি। (সঙ্কুচিত হইয়া) আজ্ঞে, সে যে নিকর দেবোত্তর, হজুর।

জীবানন্দ। না, দেবোত্তর এ গাঁয়ে একফোঁটা নেই। সেলামি না  
পেলে সমস্ত বাজেয়াপ্ত হয়ে যাবে।

এককড়ি। আজই তাকে হুকুম জানাচ্ছি।

জীবানন্দ। শুধু হুকুম জানানো নয়, টাকা তাকে ছুদিনের মধ্যে  
দিতে হবে।

এককড়ি। কিন্তু হজুর—

জীবানন্দ। কিন্তু থাক এককড়ি। এই সোজা বাকুইয়ের তীরে  
আমার শান্তিকুঞ্জ না?—মহাবীর, পাল্‌কী তুলতে বল।

বাহকেরা পাল্‌কি লইয়া প্রস্থান করিল

এককড়ি। যা ভেবেচি, তাই যে ঘটলো রে বিশু! এ যে গিয়ে নোজা শাস্তিকুঞ্জেই ঢুকতে চায়।

বিশ্বস্তর। নয় ত কি তোমার কাছারীর খোঁয়াড়ে গিয়ে ঢুকতে চাইবে?

এককড়ি। সেখানে হয় ত ঢোকবার পথ নেই। হয় ত দোর জানালা সব চোরে চুরি করে নিয়ে গেছে, হয় ত তার ঘরে ঘরে বাঘ-ভালুকে বসবাস করে আছে—সেখানে কি যে আছে আর কি যে নেই কিছুই যে জানি নে বিশ্বস্তর!

বিশ্বস্তর। আমিই কি জানি না কি তোমার দোর জানালার খবর? আর বাঘ-ভালুকের কাছে ত আমি খাজনা আদায়ে যাই নি গো!

এককড়ি। এই রাত্তিরে কোথায় আলো, কোথায় লোকজন, কোথায় খাবার দাবার—

বিশ্বস্তর। রাস্তায় দাঁড়িয়ে কাঁদলে লোকজন জুটতে পারে, কিন্তু আলো আর খাবার দাবার—

এককড়ি। তোর কি! তুই ত বলবিই রে নচ্ছার পাজি ব্যাটা হারামজাদা—

প্রস্থান

## দ্বিতীয় দৃশ্য

### শান্তিকুঞ্জ

বারুই নদতীরে বীজগাঁ'র জমিদার ৩রাধামোহনের নিশ্চিত বিলাসভবন “শান্তিকুঞ্জ”। সংস্কারের অভাবে আজ তাহা জীর্ণ, শ্রীহীন, ভগ্নপ্রায়। তাহারই একটা কক্ষে তক্তপোষের উপর বিছানা, বিছানায় চাদরের অভাবে একটা বহুমূল্য শাল পাতা ; শিয়রের দিকে একটা গোল টেবিল, তাহাতে মোটা বাঁধানো একখানা বইয়ের উপর আধপোড়া একটা মোমবাতি। তাহারই পাশে একটা পিস্তল। হাতের কাছে একটা টুল, তাহাতে সোডার বোতল, হুঁরাপূর্ণ গ্লাস ও মদের বোতল। বোতলটা প্রায় শেষ হইয়া আসিয়াছে। পার্শ্বে দামী একটা সোণার ঘড়ি—ঘড়িটা ছাইয়ের আধার স্বরূপে ব্যবহৃত হইয়াছে—আধপোড়া একখণ্ড চুরুট হইতে তখনও ধূমের রেখা উঠিতেছে ; সম্মুখের দেয়ালে গোটা দুই নেপালী কুকুরী টাঙানো, কোণে একটা বন্দুক ঠেস দিয়া রাখা, তাহারই অদূরে মেঝের উপর একটা শৃগালের মূত দেহ হইতে রক্তের ধারা বহিয়া শুকাইয়া গিয়াছে। ইতস্ততঃ বিক্ষিপ্ত কয়েকটা শূন্য মদের বোতল ; একটা ডিসে উচ্ছিন্ন ভুক্তাবশেষ তখনও পরিত্যক্ত হয় নাই, ইহারই সন্নিহিতে একখানা দামী ঢাকাই চাদরে হাত মুছিয়া ফেলিয়া দেওয়া হইয়াছে—সেটা মেঝেতে লুটাইতেছে। জীবানন্দ চৌধুরী বিছানায় আড় হইয়া পড়িয়া। পায়ের দিকের জানালাটা ভাঙা, তাহার ফাঁক দিয়া বাহিরের একটা গাছের ডালের খানিকটা ভিতরে ঢুকিয়াছে। দুই দিকে দুইট দরজা—দরজা ঠেলিয়া জীবানন্দের সেক্রেটারী প্রফুল্ল প্রবেশ করিল

প্রফুল্ল। সেই লোকটা এখানেও এসেছিল দাদা।

জীবানন্দ। কে বল ত ?

প্রফুল্ল। সেই মাদ্রাজী সাহেবের কক্ষচারী, যিনি আখের চাষ আর চিনির কারখানার জন্তে সমস্ত দক্ষিণের মাঠটা কিন্তে চান। সত্যই কি শুটা বিক্রী করে দেবেন ?



জীবানন্দ । নিশ্চয় । আমার এখন ভয়ানক টাকার দরকার ।

প্রফুল্ল । কিন্তু অনেক প্রজার সর্বনাশ হবে ।

জীবানন্দ । তা হবে, কিন্তু আমার সর্বনাশটা বাঁচবে ।

প্রফুল্ল । আর একটি লোক বাইরে বসে আছেন তাঁর নাম জনার্দন রায় । আসতে বলব ?

জীবানন্দ । না ভায়া, এখন থাক । সাধু সন্দর্শন যখন তখন করতে নেই—শাস্ত্রে নিষেধ আছে ।

প্রফুল্ল । ( হাসিয়া ) লোকটা শুনেছি খুব ধনী !

জীবানন্দ । শুধু ধনী নয়, গুণী । চিঠা, খত, তমস্ক, দলিল, যথা ইচ্ছা ইনি প্রস্তুত করে দিতে পারেন—নকল নয়, অলুকরণ নয়, একেবারে অভিনব, অপূর্ব । যাকে বলে সৃষ্টি । মহাপুরুষ ব্যক্তি ।

প্রফুল্ল । এ সব লোককে প্রশ্রয় দেবেন না দাদা ।

জীবানন্দ । তার প্রয়োজন নেই প্রফুল্ল, ইনি নিজের প্রতিভায় যে উচ্চে বিচরণ করেন, আমার প্রশ্রয় সেখানে নাগাল পাবে না !

প্রফুল্ল । গুনলাম সমস্ত মাঠটা আপনার একার নয়, দাদা । এ সম্বন্ধে—

জীবানন্দ । না প্রফুল্ল, এ সম্বন্ধে তোমাকে আমি কথা কইতে দেব না । দেনায় গলা পর্যন্ত ডুবে আছি এর পরে তোমার সং অসতের ভৃত ঘাড়ে চাপলে আর রসাতলে তলিয়ে যাবার দেরি হবে না ।

একপাত্র মদ পান করিয়া

জীবানন্দ । তুমি ভাবচো রসাতলের দেরিই বা কত ? দেরি নেই সে আমি জানি । আরও একটা কথা তোমার চেয়ে বেশি জানি প্রফুল্ল, এর কুল-কিনারাও নেই ।

প্রফুল্ল নিঃশব্দে মুখ তুলিয়া চাহিল

জীবানন্দ । ওই তোমার মস্ত দোষ প্রফুল্ল, শেষ হওয়া জিনিসটাও নিঃশেষ হচ্ছে শুনলে তোমার চোখ ছল্ ছল্ করে আসে । যাও ত ভায়া এককড়িকে পাঠিয়ে দাও ত । আর দেখ, তোমাকে একবার সদরে গিয়ে মাদ্রাজী সাহেবের সঙ্গে পাকা কথা কইতে হবে । বুঝলে ?

প্রফুল্ল । ( মাথা নাড়িয়া ) তা হলে এখনো ত বেলা আছে, আজই ত যেতে পারি । সাহেবের সঙ্গে গাড়ী আছে ।

জীবানন্দ । বেশ, তা হলে এঁর গাড়ীতেই যাও ।

প্রফুল্লর গ্রহান ও এককড়ির প্রবেশ

জীবানন্দ । টাকা আদায় হচ্ছে এককড়ি ?

এককড়ি । হচ্ছে হজুর ।

জীবানন্দ । তারাদাস টাকা দিলে ?

এককড়ি । সহজে দিতে চায় নি ! শেষে কান ধ'রে ষোড়-দৌড়, ব্যাঙের নাচ নাচাবার প্রস্তাব করতেই দিতে রাজি হয়ে বাড়ী গেছে । আজ দেবার কথা ছিল ।

জীবানন্দ । তারপরে ?

এককড়ি । মহাবীর সিংকে সঙ্গে দিয়ে হজুরের পাল্কি বেহারাদের পাঠিয়েছি তাকে ধরে আনতে ।

জীবানন্দ । ( মগপান করিয়া ) ঠিক হয়েছে । তোমাদের এখানে বোধ করি বিলিতি মদের দোকান নেই । তা না থাক্ যা আমার সঙ্গে আছে তাতেই একটা দিন চলে যাবে । কিন্তু আরও একটা কথা আছে এককড়ি ।

এককড়ি । আজ্ঞে করুন ?

জীবানন্দ । দেখ এককড়ি, আমি বিবাহ—হাঁ—বিবাহ আমি করি নি—বোধ হয় কখনো কল্পবও না । ( একটু পরে ) কিন্তু তাই বলে আমি ভীষ্মদেব—বলি মহাভারত পড়েচ ত ?—তার ভীষ্মদেব সেজেও বসি নি—শুকদেব হয়েও উঠি নি—বলি কথাটা বুঝলে ত এককড়ি ? ওটা চাই ?

এককড়ি । ( লজ্জায় মাথা হেঁট করিয়া একটুখানি ঘাড় নাড়িল )

জীবানন্দ । অপর সকলের মত থাকে তাকে দিয়ে এসব কথা বলাতে আমি ভালবাসি নে তাতে ঠকতে হয় । আচ্ছা এখন যাও ।

এককড়ি । আমি তারাদাসকে দেখি গে । সে এর মধ্যে প্রজা বিগড়ে না দেয় । ( বাইতেছিল )

জীবানন্দ । প্রজা বিগড়ে দেবে ? আমি উপস্থিত থাকতে ?

এককড়ি । হজুর, পারে ওরা ।

জীবানন্দ । তারাদাসকেই ত জানি, আবার ‘ওরা’ এল কারা ?

এককড়ি । চক্কোত্তির মেয়ে ভৈরবী । নইলে চক্কোত্তিমশাই নিজে তত লোক মন্দ নয়, কিন্তু মেয়েটাই হচ্ছে আসল সর্বনাশী । দেশের বত বোম্বটে বদমাশগুলো হয়েছে যেন একেবারে তার গোলাম ।

জীবানন্দ । বটে ? কত বয়স ? দেখতে কেমন ?

ঘরের মধ্যে ক্রমশঃ সন্ধ্যার আবছায়া ঘনাইয়া আসিতে লাগিল

এককড়ি । বয়স পঁচিশ-ছাব্বিশ হ’তে পারে । আর রূপের কথা যদি বলেন হজুর ত সে যেন এক কাট-খোঁট্টা সিপাই ! না আছে মেয়েলি ছিরি, না আছে মেয়েলি ছাঁদ । যেন চুয়াড়, যেন হাতিয়ার বেঁধে লড়াই করতে চলেছে । তাতেই ত দেশের ছোটলোকগুলো মনে করে গড়ের উনিই হচ্ছেন সাক্ষাৎ চণ্ডী ।

জীবানন্দ । ( উৎসাহ ও কৌতূহলে সোজা উঠিয়া বসিয়া ) বল কি এককড়ি ? ভৈরবীর ব্যাপারটা কি খুলে বল ত শুনি ?

এককড়ি । ভৈরবী ত কারু নাম নয় হজুর । গড় চণ্ডীর প্রধান সেবিকাদের ওই হ'ল উপাধি । বর্তমান ভৈরবীর নাম ষোড়শী, এর আগে যিনি ছিলেন তাঁর নাম ছিল মাতঙ্গিনী । মার আদেশে তাঁর সেবায়েৎ কখনো পুরুষ হতে পারে না, চিরদিন মেয়েরাই হয়ে আসছে ।

জীবানন্দ । তাই না কি ? এ ত কখনো শুনি নি ।

এককড়ি । মায়ের আদেশে বিয়ের তেরাত্রি পরে স্বামীকে আর ভৈরবীর স্পর্শ করবারও যো নেই । তাই দূরদেশ থেকে ছুঃখী গরীবদের একটা ছেলে ধরে এনে বিয়ে দিয়ে পরের দিনই টাকাকড়ি দিয়ে সেই যে বিদায় করা হয়, আর কখনো কেউ তার ছায়াও দেখতে পায় না । এই নিয়ম, এই-ই চিরকাল ধরে হয়ে আসছে ।

জীবানন্দ । ( সহাস্তে ) বল কি এককড়ি, একেবারে দেশান্তর ? ভৈরবী মানুষ, রাত্রে নিরিবিলি একপাত্র স্নান দেওয়া—গরম মশলা দিয়ে চাটি মহাপ্রসাদ রেখে থাওয়ানো—একেবারে কিছুই করতে পায় না ?

এককড়ি । ( মাথা নাড়িয়া ) না হজুর, মায়ের ভৈরবীকে স্বামী স্পর্শ করতে নেই, কিন্তু তাই বলে কি স্বামী ছাড়া গাঁয়ে আর পুরুষ নেই ? মাতু ভৈরবীকেও দেখেচি, ষোড়শী ভৈরবীকেও দেখছি । লোকগুলো কি আর খামকা—তার সাক্ষী দেখুন না—কথায় কথায় হজুরের সঙ্গেই মামলা মোকদ্দমা বাধিয়ে দেয় !

জীবানন্দ । মেয়ে মোহাস্ত আর কি ! তাতে দোষ নেই । এককড়ি, আলোটা জ্বালো ত ।

এককড়ি। (আলো জ্বালিয়া) এখন আসি হুজুর।

জীবানন্দ। আচ্ছা যাও। বইখানা দিয়ে যাও ত।

বই দিয়া প্রণাম করিয়া এককড়ি গ্রহণ করিল

জীবানন্দ শুইয়া পুস্তকে মনোনিবেশ করিলেন। একটু

পরে বাহিরে কাহার পায়ের শব্দ হইল

জীবানন্দ। কে?

সর্দার। (ষোড়শীকে লইয়া প্রবেশ করিয়া কহিল) শালা তারাদাস ভাগ্গিয়া। হুজুর উম্মকো বেটাকো পাকড় লায়া।

জীবানন্দ। (বই ফেলিয়া ধড়ফড় করিয়া উঠিয়া বসিয়া বিস্মিত ভাবে) কাকে? ভৈরবীকে? (কিছুক্ষণ পরে) ঠিক হয়েছে। আচ্ছা যা।

সর্দার অমুচর পাইকদের লইয়া প্রস্থান করিল

জীবানন্দ। তোমাদের আজ টাকা দেবার কথা। টাকা এনেচ? (ষোড়শীর কণ্ঠস্বর ফুটিল না) আনো নি জানি। কিন্তু কেন?

ষোড়শী। আমাদের নেই।

জীবানন্দ। না থাকলে সমস্ত রাত্রি তোমাকে পাইকদের ঘরে আটকে থাকতে হবে। তার মানে জানো?

ষোড়শী দ্বারের চৌকাটটা দুই হাতে সবলে চাপিয়া ধরিয়া চোখ বুজিয়া মুচ্ছা হইতে আত্মরক্ষার চেষ্টা করিতে লাগিল; এই ভয়ানক বিবর্ণ মুখের চেহারা জীবানন্দের চোখে পড়িল, মিনিট-খানেক এস কেমন যেন আচ্ছন্নের স্থায় বসিয়া রহিল। তারপরে বাতির আলোটা হঠাৎ হাতে তুলিয়া লইয়া ষোড়শীর কাছে গেল। আলোটা তাহার মুখের সম্মুখে

ধরিয়া একদৃষ্টে ষোড়শীর গৈরিক বস্ত্র, তাহার এলায়িত রুম্ম কেশভার, তাহার পাণ্ডুর ওষ্ঠাধর, তাহার সবল হৃদয় ঋজু দেহ, সমস্তই সে যেন দুই বিস্ফারিত চক্ষু দিয়া নিঃশব্দে গিলিতে লাগিল। এইভাবে কিছুক্ষণ কাটিয়া গেলে পর

জীবানন্দ। ( ফিরিয়া গিয়া আলোটা রাখিয়া দিয়া মদের বোতল হইতে কয়েক পাত্র উপযুপরি পান করিয়া ) তোমার নাম ষোড়শী না ? ( ষোড়শী নীরব ) তোমার বয়স কত ? ( কোনো উত্তর না পাইয়া কঠিন স্বরে ) চুপ করে থেকে বিশেষ কোন লাভ হবে না। জবাব দাও।

ষোড়শী। ( মৃদুস্বরে ) আমার বয়স আটাশ।

জীবানন্দ। বেশ। তা হলে খবর যদি সত্য হয় ত, এই উনিশ-কুড়ি বৎসর ধরে তুমি ভৈরবীগিরি করচ ; খুব সম্ভব অনেক টাকা জমিয়েছ। দিতে পারবে না কেন ?

ষোড়শী। আপনাকে আগেই ত জানিয়েছি আমার টাকা নেই।

জীবানন্দ। না থাকলে আরও দশজনে যা করছে তাই কর। যাদের টাকা আছে তাদের কাছে জমি বাঁধা দিয়ে হোক, বিক্রী করে হোক—দাও গে।

ষোড়শী। তারা পারে, জমি তাদের। কিন্তু দেবতার সম্পত্তি বাঁধা দেবার, বিক্রী করবার ত আমার অধিকার নেই।

জীবানন্দ। ( হঠাৎ হাসিয়া ) নেবার অধিকার কি ছাই আমারই আছে ? এক কপর্দকও না। তবুও নিচ্ছি, কেন না আমার চাই। এই চাওয়াটাই হচ্ছে সংসারের খাঁটী অধিকার, তোমারও যখন দেওয়া চাই-ই, তখন—বুঝলে ? ( কিছু পরে ) যাক, এত রাতে কি একা বাড়ী যেতে পারবে ? যাদের সঙ্গে তুমি এসেছিলে তাদের আর সঙ্গে দিতে চাই নে।

ষোড়শী। (সবিনয়ে) আপনার হুকুম হলেই যেতে পারি।

জীবানন্দ। (সবিস্ময়ে) একলা? এই অন্ধকার রাত্রে? ভারি কষ্ট হবে যে!

হাসিতে লাগিল

ষোড়শী। না, আমাকে এখনি যেতেই হবে।

জীবানন্দ। (সহাস্ত্রে) বেশ ত, টাকা না হয় নাই দেবে ষোড়শী।  
তা ছাড়া আরো অনেক রকমের সুবিধে—

ষোড়শী। আপনার টাকা, আপনার সুবিধা আপনারই থাক্  
আমাকে যেতে দিন!

কয়েক পা অগ্রসর হইয়া সেই পাইকদের সম্মুখে কিছুদূরে বসিয়া থাকিতে  
দেখিয়া আপনিই থমকিয়া দাঁড়াইল

জীবানন্দ। (মুখ অন্ধকার করিয়া কঠিন স্বরে) তুমি মদ খাও?

ষোড়শী। না।

জীবানন্দ। তোমার কয়েকজন পুরুষ বন্ধু আছে শুনেছি। সত্যি?

ষোড়শী। (মাথা নাড়িয়া) না, মিছে কথা।

জীবানন্দ। (ক্ষণকাল মৌন থাকিয়া) তোমার পূর্ব্বেকার সকল  
ভৈরবীই মদ খেতেন—সত্যি? মাতঙ্গী ভৈরবীর চরিত্র ভাল ছিল না—  
এখনো তার সাক্ষী আছে। সত্যি না মিছে?

ষোড়শী। (লজ্জিত মৃদুকণ্ঠে) সত্যি বলেই শুনেছি।

জীবানন্দ। শুনেছ? ভাল। তবে হঠাৎ তুমিই বা এমন দলছাড়া,  
গোত্রছাড়া ভাল হতে গেলে কেন? (হঠাৎ সোজা উঠিয়া বসিয়া পুরুষ  
কণ্ঠস্বরে) মেয়েমানুষের সঙ্গে তর্কও আমি করি নে, তাদের মতামতও

কখনো জানতে চাই নে। তুমি ভাল কি মন্দ, চুল চিরে তার বিচার করবারও আমার সময় নেই। আমি বলি, চণ্ডীগড়ের সাবেক ভৈরবীদের যেভাবে কেটেছে তোমারও তেমনিভাবে কেটে গেলেই যথেষ্ট। আজ তুমি এই বাড়ীতেই থাকবে।

হুকুম শুনিয়া ষোড়শী বজ্রহস্তের স্থায় একেবারে কাঁচ হইয়া গেল

জীবানন্দ। তোমার সম্বন্ধে কি ক'রে যে এতটা সহ্য করেচি জানি নে, আর কেউ এ বেয়াদপি করলে এতক্ষণ তাকে পাইকদের ঘরে পাঠিয়ে দিতুম। এমন অনেককে দিয়েচি।

ষোড়শী। ( অকস্মাৎ কাঁদিয়া ফেলিয়া, গলায় আঁচল দিয়া করযোড়ে ) আমার বা কিছু আছে সব নিয়ে আজ আমাকে ছেড়ে দিন।

জীবানন্দ। কেন বল ত? এ রকম কান্নাও নতুন নয়, এরকম ভিক্ষেও এই নতুন গুন্টি নে! কিন্তু তাদের সব স্বামী পুত্র ছিল—কতকটা না হয় বুঝতেও পারি। ( ষোড়শী শিহরিয়া উঠিয়া ) কিন্তু তোমার ত সে বালাই নেই। পোনের ষোল বছরের মধ্যে তোমার স্বামীকে তুমি ত চোখেও দেখ নি। তা ছাড়া তোমাদের ত এতে দোষই নেই।

ষোড়শী। ( করযোড়ে অশ্রুঝঙ্ককণ্ঠে ) স্বামীকে আমার ভাল মনে নেই সত্যি, কিন্তু তিনি ত আছেন! যথার্থ বল্চি আপনাকে, কখনো কোনো অত্যাচারে আমি আজ পর্যন্ত করি নি। দয়া করে আমাকে ছেড়ে দিন—

জীবানন্দ। ( হাঁক দিয়া ) মহাবীর—

ষোড়শী। • ( আতঙ্কে কাঁদিয়া ) আমাকে আপনি মেরে ফেলতে পারবেন, কিন্তু—



জীবানন্দ । আচ্ছা, ও বাহাদুরি কর গে ওদের ঘরে গিয়ে । মহাবীর—  
 ষোড়শী । ( মাটিতে লুটাইয়া পড়িয়া কাঁদিয়া ) কারও সাধ্য নেই  
 আমার প্রাণ থাকতে নিয়ে যেতে পারে । আমার যা কিছু হৃদশা—  
 বত অত্যাচার আপনার সামনেই হোক—আপনি আজও ব্রাহ্মণ, আপনি  
 আজও ভদ্রলোক !

জীবানন্দ । ( কঠিন নিষ্ঠুর হাস্য করিল ) তোমার কথাগুলো শুনে  
 মন্দ নয়, কিন্তু কান্না দেখে আমার দয়া হয় না ! আমি অনেক শুনি ।  
 মেয়েমানুষের ওপর আমার এতটুকু লোভ নেই—ভাল না লাগলেই  
 চাকরদের দিয়ে দিই । তোমাকেও দিয়ে দিতুম, শুধু এই বোধ হয়  
 আজ প্রথম একটু মোহ জন্মেছে । ঠিক জানি নে—নেশা না কাটলে  
 ঠাণ্ডার পাচ্ছি নে ।

মহাবীর । ( দ্বার প্রান্তে আসিয়া ) হজুর !

জীবানন্দ । ( সম্মুখের কবাটটায় অঙ্গুলি নির্দেশ করিয়া ) একে  
 আজ রাত্রে মত ও-ঘরে বন্ধ করে রেখে দে । কাল আবার দেখা যাবে ।

ষোড়শী । ( গলদশ-লোচনে ) আমার সর্বনাশটা একবার ভেবে  
 দেখুন, হজুর ! কাল যে আমি আর মুখ দেখাতে পারবো না ।

জীবানন্দ । ছু'একদিন ! তার পরে পারবে । সেই লিভারের  
 ব্যথাটা আজ সকাল থেকেই টের পাচ্ছিলাম । এখন হঠাৎ ভারী বেড়ে  
 উঠলো—আর বেশি বিরক্ত ক'রো না—যাও ।

মহাবীর । ( তাড়া দিয়া ) আরে, উঠ না মাগী—চোল !

জীবানন্দ । ( ভয়ানক ধমক দিয়া ) খবরদার, শুয়োরের লাচ্ছা, ভাল  
 ক'রে কথা বল ! ফের যদি কখনো আমার হুকুম ছাড়া কোনো  
 মেয়েমানুষকে ধরে আনিস্ ত গুলি করে মেরে ফেলব । ( মাথার

বালিশটা পেটের কাছে টানিয়া লইয়া উপুড় হইয়া শুইয়া যাতনায় অশ্রুত আৰ্ত্তনাদ করিয়া ) আজকের মত ওষধে বন্ধ থাকো, কাল তোমার সতী-পনার বোঝাপড়া হবে। আঃ—এই, যা'না আমার স্বস্থ থেকে একে সরিয়ে নিয়ে।

মহাবীর। ( আশ্তে আশ্তে বলিল ) চলিয়ে—

ষোড়শী নির্দেশমত নিরন্তরে পাশের অন্ধকার ঘরে যাইতেছিল

জীবানন্দ। ষোড়শী, একটু দাঁড়াও, প্রফুল্ল নেই, সে সদরে গেছে—  
তুমি পড়তে জানো, না ?

ষোড়শী। জানি।

জীবানন্দ। তা হলে একটু কাজ করে যাও। ওই যে বাক্সটা, ওর মধ্যে আর একটা কাগজের বাক্স পাবে। কয়েকটা ছোট বড় শিশি আছে, যার গায়ে বাঙলায় 'মরফিয়া' লেখা তার থেকে একটুখানি ঘুমের ওষুধ দিয়ে যাও। কিন্তু খুব সাবধান, এ ভয়ানক বিষ। মহাবীর আলোটা ধর।

মহাবীর আলো ধরিল

ষোড়শী। ( বাতির আলোকে কম্পিত-হস্তে শিশিটা বাহির করিয়া )  
কতটুকু দিতে হবে ?

জীবানন্দ। ( তীব্র বেদনায় অব্যক্ত ধ্বনি করিয়া ) ঐ ত বল্লুম খুব একটুখানি। আমি উঠতেও পারছি নে, আমার হাতেরও ঠিক নেই চোখেরও শঠিক নেই। ওতেই একটা কাঁচের বিলুক আছে, তার অন্ধকেরও কম। একটু বেশি হয়ে গেলে এ ঘুম তোমায় চণ্ডীর বাবা এসেও ভাঙাতে পারবে না।

পরিমাণ স্থির করিতে ষোড়শীর হাত কাঁপিতে লাগিল, অবশেষে অনেক যত্নে অনেক সাবধানে নির্দেশমত ঔষধ লইয়া কাছে আসিয়া দাঁড়াইল

জীবানন্দ। (হাত বাড়াইয়া সেই বিষ লইয়া চোখ বুজিয়া মুখে ফেলিয়া দিল) খুব কমই দিয়েচ—ফল হবে না হয় ত। আচ্ছা এই থাক্।

ষোড়শী পাশের ঘরে পা বাড়াইয়াছে, এমন সময় এককড়ি নিতান্ত ব্যস্ত ও ব্যাকুল ভাবে প্রবেশ করিয়া ও এদিক ওদিক চাহিয়া জীবানন্দের কানের কাছে চুপি চুপি কি বলিতে লাগিল। জীবানন্দের মুখের ভাবে বিশেষ পরিবর্তন দেখা গেল। ষোড়শী দ্বারপ্রান্তে স্তম্ভিতের মত দাঁড়াইয়া রহিল।

জীবানন্দ। (হাত নাড়িয়া ষোড়শীকে) তোমার ভয় নেই, কাছে এসো (ষোড়শী আসিলে) পুলিশের লোক বাড়ী ঘিরে ফেলেছে—ম্যাজিষ্ট্রেট সাহেব গেটের মধ্যে ঢুকেছেন—এলেন বলে। (ষোড়শী চমকিয়া উঠিল) জেলার ম্যাজিষ্ট্রেট টুরে বেরিয়ে ক্রোশ-খানেক দূরে তাঁবু ফেলেছিলেন, তোমার বাবা এই রাত্রেই তাঁর কাছে গিয়ে সমস্ত জানিয়েছেন। কেবল তাতেই এতটা হ'ত না, কে-সাহেবের নিজেরই আমার উপর ভারি রাগ। গত বৎসর দু'বার ফাঁদে ফেলবার চেষ্টা করেছিল, কিন্তু পারে নি—আজ একেবারে হাতে হাতে ধরে ফেলেছে—

একটু হাসিল

এককড়ি। (মুখ চুণ করিয়া) হজুর, এবার বোধ হয় আমাদেরও আর রক্ষা নেই।

জীবানন্দ। সম্ভব বটে। (ষোড়শীকে) শোধ নিতে চাও ত এই-ই সময়। আমাকে জেলে দিতেও পারো।

ষোড়শী। এতে জেল হবে কেন?

জীবানন্দ। আইন। তা ছাড়া। কে-সাহেবের হাতে পড়েছি।

বাহুড়বাগান মেসে থাকতে এরই কাছে একবার দিন-কুড়ি হাজত বাসও হয়ে গেছে। কিছুতে জামিন দিলে না—আর জামিনই বা তখন হ'তো কে!

ষোড়শী। ( উৎস্রক কণ্ঠে ) আপনি কি কখনো বাহুড়বাগানের মেসে ছিলেন ?

জীবানন্দ। হাঁ। ওই সময়ে একটা প্রণয়কাণ্ডের বৃন্দে হয়েছিলুম— ব্যাটা আয়ান ঘোষ কিছুতে ছাড়লে না—পুলিশে দিলে। বাক, সে অনেক কথা। সে আমাকে ভোলে নি, বেশ চিনে। আজও পালাতে পারতুম, কিন্তু ব্যথায় শয্যাগত হয়ে পড়েছি নড়বার ঘো নেই।

ষোড়শী। ( কোমল কণ্ঠে ) ব্যথাটা কি আপনার কন্টে না ?

জীবানন্দ। না, তা ছাড়া এ সারবার ব্যথাও নয়।

ষোড়শী। ( কিছুক্ষণ চুপ করিয়া থাকিয়া ) আমাকে কি করতে হবে ?

জীবানন্দ। শুধু বলতে হবে তুমি নিজের ইচ্ছায় এসেচ, নিজের ইচ্ছায় এখানে আছো। তার বদলে তোমাকে সমস্ত দেবোত্তর ছেড়ে দেবো, হাজার টাকা নগদ দেবো, আর নজরের টাকার ত কথাই নেই।

এককড়ি কি বলিতে বাইয়া ষোড়শীর মুখের পানে চাহিয়া ধামিয়া গেল

ষোড়শী। ( সোজা হাসিয়া ) একথা স্বীকার করার অর্থ বোঝেন ? তার পরেও কি আমার জমিতে, টাকাকড়িতে প্রয়োজন থাকতে পারে বলে আপনি বিশ্বাস করেন ?

জীবানন্দ। ( বিবর্ণমুখে ) তাই বটে ষোড়শী, তাই বটে। জীবনে আজও ত তুমি পাপ করো নি—ও তুমি পারবে না সত্যি। ( একটু

হাসিয়া) টাকাকড়ির বদলে যে সস্ত্রম বেচা যায় না—ও যেন আমি ভুলেই গেছি। তাই হোক, যা সত্যি তাই তুমি বলো—জমিদারের তরফ থেকে আর কোনো উপদ্রব তোমার ওপর হবে না।

এককড়ি ব্যাকুল হইয়া আবার কি বলিতে গেল, কিন্তু রক্তধারে পুনঃ পুনঃ করাঘাতের শব্দ শুনিয়া বিবর্ণ মুখে থামিয়া গেল

জীবানন্দ। ( সাড়া দিয়া ) খোলা আছে, ভিতরে আসুন।

দরজা উন্মুক্ত হইল। ম্যাজিষ্ট্রেট, ইন্সপেক্টর, কয়েকজন কনেটবল ও তারাদাস চক্রবর্তী প্রবেশ করিলেন

তারাদাস। ( ভিতরে ঢুকিয়াই কাঁদিয়া ) ধর্ম্মাবতার, হজুর! এই আমার মেয়ে, মা-চণ্ডীর ভৈরবী। আপনার দয়া না হলে আজ ওকে টাকার জন্তে খুন করে ফেলতো ধর্ম্মাবতার।

ম্যাজিষ্ট্রেট। ( ষোড়শীর আপাদ মস্তক নিরীক্ষণ করিয়া ) তোমারই নাম ষোড়শী? তোমাকেই বাড়ী থেকে ধরে এনে উনি বন্ধ করে রেখেছেন?

ষোড়শী। ( মাথা নাড়িয়া ) না, আমি নিজের ইচ্ছায় এসেছি। কেউ আমার গায়ে হাত দেয় নি।

তারাদাস। ( চেষ্টামেচি করিয়া উঠিল ) না হজুর, ভয়ানক মিথ্যে কথা, গ্রামগুদ্ধ সাক্ষী আছে। মা আমার ভাত রান্ধছিল, আটজন পাইক গিয়ে মাকে বাড়ী থেকে মারতে মারতে টেনে এনেছে।

ম্যাজিষ্ট্রেট। ( জীবানন্দের প্রতি কটাক্ষে চাহিয়া ষোড়শীকে কহিলেন ) তোমার কোন ভয় নেই, তুমি সত্য কথা বল। তোমাকে বাড়ী থেকে ধরে এনেছে?

ষোড়শী। না, আমি আপনি এসেছি।

ম্যাজিষ্ট্রেট । এখানে তোমার কি প্রয়োজন ?

ঘোড়শী । আমার কাজ ছিল ।

ম্যাজিষ্ট্রেট । এত রাত্রেও বাড়ী ফিরে যেতে দেরি হচ্ছিল ।

তারাদাস । ( চৈঁচাইয়া ) না হুজুর, সমস্ত মিছে—সমস্ত বানানো, আগাগোড়া শিখানো কথা ।

ম্যাজিষ্ট্রেট । ( তাহার প্রতি লক্ষ্য না করিয়া শুধু মুখ টিপিয়া হাসিলেন এবং শিস্ দিতে দিতে প্রথমে বন্দুকটা এবং পরে পিস্তলটা তুলিয়া লইয়া জীবানন্দকে কেবল বলিলেন ) I hope you have permission for this.

ধীরে ধীরে ঘর হইতে বাহির হইয়া গেলেন

তারাদাস হতজ্ঞানের স্থায় স্তব্ধ অভিভূতভাবে দাঁড়াইয়া থাকিয়া

ম্যাজিষ্ট্রেট । ( নেপথ্যে ) হামারা ঘোড়া লাও ।

ঘোড়ার খুরের শব্দ শোনা গেল

তারাদাস । ( অকস্মাৎ বুকফাটা ক্রন্দনে সকলকে সচকিত করিয়া পুলিশ কর্মচারীর পায়ের নিচে পড়িয়া কাঁদিয়া ) বাবুমশায়, আমার কি হবে ! আমাকে যে এবার জমিদারের লোক জ্যান্ত পুঁতে ফেলবে ।

ইন্সপেক্টর । ( তিনি বয়সে প্রবীণ, শশব্যস্ত হইয়া তাহাকে চেষ্টা করিয়া হাত ধরিয়া তুলিয়া সদয়কণ্ঠে ) ভয় কি ঠাকুর, তুমি যেমন ছিলে তেমনি থাকো গে । স্বয়ং ম্যাজিষ্ট্রেট সাহেব তোমার সহায় রইলেন—আর কেউ তোমাকে জুলুম করবে না ।

কটাক্ষে জীবানন্দের দিকে চাহিলেন ।

তারাদাস। (চোখ মুছিতে মুছিতে) সাহেব যে রাগ করে চলে গেলেন বাবু!

ইন্সপেক্টর। (মুচকি হাসিয়া) না ঠাকুর, রাগ করেন নি, তবে আজকের এই ঠাট্টাটুকু তিনি সহজে ভুলতে পারবেন, এমন মনে হয় না! তা ছাড়া আমরাও মরি নি, থানাও যা হোক একটা আছে। (আড়চোখে জীবানন্দের দিকে চাহিয়া, কিছু পরে) এখন চল ঠাকুর, যাওয়া যাক। এই রাত্রে যেতেও ত হবে অনেকটা।

সাব-ইন্সপেক্টর। (বয়সে তরুণ, অল্প হাসিয়া) মেয়েটি রেখে ঠাকুরটি কি তবে একাই যাবেন না কি?

কথাটায় সবাই হাসিল—কনেটবলগুলা পর্য্যন্ত। এককড়ি কড়িকাঠের দিকে দৃষ্টি নিবদ্ধ করিল। তারাদাসের চোখের অশ্রু চোখের পলকে অগ্নিশিখায় রূপান্তরিত হইয়া গেল

তারাদাস। (ষোড়শীর প্রতি কঠোর দৃষ্টিপাত করিয়া সগর্জনে) যেতে হয় আমি একাই যাবো। আবার ওর মুখ দেখব—আবার ওকে বাড়ীতে ঢুকতে দেবো আপনারা ভেবেচেন?

ইন্সপেক্টর। (সহাস্ত্রে) মুখ তুমি না দেখতে পারো কেউ মাথার দিব্যি দেবে না ঠাকুর। কিন্তু যার বাড়ী, তাকে বাড়ী ঢুকতে না দিয়ে আর যেন নতুন ফ্যাসাদে পোড়ো না।

তারাদাস। (আশ্ফালন করিয়া) বাড়ী কার? বাড়ী আমার। আমিই ভৈরবী করেচি, আমিই ওকে দূর করে তাড়াবো। কলকাতা এই তারা চকোত্তির হাতে। (সজোরে নিজের বুক ঠুকিয়া) নইলে কে ও জানেন? শুন্বেন ওর মায়ের—

ইন্সপেক্টর। (খামাইয়া দিয়া) খামো, ঠাকুর খামো, রাগের মাথায় পুলিশের কাছে সব কথা বলে ফেলতে নেই—তাতে বিপদে

পড়তে হয়। ( ষোড়শীর প্রতি ) তুমি যেতে চাও ত আমরা তোমাকে নিরাপদে ঘরে পৌঁছে দিতে পারি। চল, আর দেরি ক'রো না।

ষোড়শী অধোমুখে নিঃশব্দে দাঁড়াইয়া ছিল, ঘাড় নাড়িয়া জানাইল, না

সাব-ইন্সপেক্টার। ( মুখ টিপিয়া হাসিয়া ) ষা'বার বিলম্ব আছে বুঝি ?

ষোড়শী। ( মুখ তুলিয়া চাহিয়া ইন্সপেক্টারের প্রতি ) আপনারা বান, আমার যেতে এখনো দেরি আছে।

তারাদাস। ( উদ্ভ্রান্তের মত ) দেরি আছে ! হারামজাদী, তোকে যদি না খুন করি ত আমি মনোহর চক্কোত্তির ছেলে নই !

লাকাইয়া উঠিয়া ষোড়শীকে আঘাত করিতে গেল

ইন্সপেক্টার। ( তাহাকে ধরিয়া ফেলিয়া ধমক্ দিয়া ) ফের যদি বাড়াবাড়ি কর ত তোমাকে থানায় ধরে নিয়ে যাবো। চল, ভাল মাল্লবের মত ঘরে চল।

তারাদাসকে টানিয়া লইয়া তিনি ও সব পুলিশ-কর্মচারী প্রস্থান করিল, এককড়িও পা টিপিয়া বাহির হইয়া গেল। দূর হইতে তারাদাসের গর্জন ও গালাগালি শ্রীণ হইতে শ্রীণতর শোনা বাইতে লাগিল

জীবানন্দ। ( ইঙ্গিতে ষোড়শীকে আরো একটু কাছে ডাকিয়া ) তুমি এঁদের সঙ্গে গেলে না কেন ?

ষোড়শী। এঁদের সঙ্গে ত আমি আসি নি।

জীবানন্দ। ( কয়েক মুহূর্ত্ত নীরব থাকিয়া ) তোমার বিষয়ের ছাড় লিখে দিতে দু'চার দিন দেরি হবে, কিন্তু টাকাটা কি তুমি আজই নিয়ে যাবে ?

ষোড়শী। তাই দিন।



জীবানন্দ । ( বিছানার তলা থেকে একতাড়া নোট বাহির করিল । সেইগুলি গণনা করিতে করিতে ষোড়শীর মুখের প্রতি বার বার চাহিয়া দেখিয়া একটু হাসিয়া বলিল ) আমার কিছুতেই লজ্জা করে না, কিন্তু আমারও এগুলো তোমার হাতে তুলে দিতে বাধ বাধ ঠেক্চে ।

ষোড়শী । ( শান্ত নম্র কণ্ঠে ) কিন্তু তাই ত দেবার কথা ছিল ।

জীবানন্দ । কথা যাই থাক ষোড়শী, আমাকে বাঁচাতে তুমি যা খোয়ালে, তার দাম টাকায় ধার্য্য করচি, এ মনে করার চেয়ে বরঞ্চ আমার না বাঁচাই ছিল ভাল ।

ষোড়শী । ( তার মুখে স্থিরদৃষ্টি চাহিয়া ) কিন্তু মেয়েমানুষের দাম ত আপনি এই দিয়েই চিরদিন ধার্য্য করে এসেছেন । ( জীবানন্দ নিরুত্তর— কিছু পরে ), বেশ আজ যদি আপনার সে মত বদলে থাকে, টাকা না হয় রেখেই দিন, আপনাকে কিছুই দিতে হবে না । কিন্তু আমাকে কি সত্যিই এখনো চিন্তে পারেন নি ? ভাল করে চেয়ে দেখুন দিকি ?

জীবানন্দ । ( নীরবে বহুক্ষণ নিম্পলক চাহিয়া থাকিয়া, ধীরে ধীরে মাথা নাড়িয়া ) বোধ হয় পেরেচি । ছেলে-বেলায় তোমার নাম অলকা ছিল না ?

ষোড়শী । ( তাহার সমস্ত মুখ উজ্জ্বল হইয়া উঠিল ) আমার নাম ষোড়শী । ভৈরবীর দশমহাবিহার নাম ছাড়া আর কোনো নাম থাকে না । কিন্তু অলকাকে আপনার মনে আছে ?

জীবানন্দ । ( নিরুৎসুক কণ্ঠে ) কিছু কিছু মনে আছে বৈকি । তোমার মায়ের হোটেল মাকে মাঝে মাঝে যেতে যেতাম । তখন, তুমি ছোট ছিলে । কিন্তু আমাকে ত তুমি অনায়াসে চিন্তে পেরেচ ?

ষোড়শী । অনায়াসে না হলেও পেরেচি । অলকার মাকে মনে পড়ে ?

জীবানন্দ । পড়ে । তিনি বেঁচে আছেন ?

ষোড়শী। না—বহর দেশক আগে তাঁর কাশীলাভ হয়েছে। আপনাকে তিনি বড় ভালবাসতেন, না ?

জীবানন্দ। (উদ্বেগে) হাঁ—একবার বিপদে পড়ে তাঁর কাছে একশ টাকা ধার নিয়েছিলাম, সেটা বোধ হয় আর শোধ দেওয়া হয় নি।

ষোড়শী। না, কিন্তু আপনি সেজন্ত মনে কোন ক্ষোভ রাখবেন না। কারণ অলকার মা সে টাকা ধার বলে আপনাকে দেন নি, জামাইকে যৌতুক বলে দিয়েছিলেন। (ক্ষণকাল চুপ করিয়া) চেষ্টা করলে এটুকু মনেও পড়তে পারে যে সেদিনটাও ঠিক এমনি দুর্দিন ছিল। আজ ষোড়শীর ঋণটাই খুব ভারি বোধ হচ্ছে, কিন্তু সেদিন ছোট্ট অলকার কুলটা মায়ের ঋণটাও কম ভারি ছিল না চৌধুরীমশাই।

জীবানন্দ। তাই মনে করতে পারতাম যদি না তিনি ঐ ক'টা টাকার জন্তে তাঁর মেয়েকে বিবাহ করতে আমাদের বাধ্য করতেন।

ষোড়শী। বিবাহ করতে তিনি বাধ্য করেন নি, বরঞ্চ করেছিলেন আপনি নিজে। কিন্তু, যাক ওসব বিশী আলোচনায়। বিবাহ আপনি করেন নি, করেছিলেন শুধু একটু তামাসা। সম্প্রদানের সঙ্গে সঙ্গেই সেই যে নিরুদ্দেশ হলেন, এই বোধ হয় তারপরে আজ প্রথম দেখা।

জীবানন্দ। কিন্তু তারপরে ত তোমার সত্যিকারের বিবাহই হয়েছে শুনেচি।

ষোড়শী। তার মানে আর একজনের সঙ্গে ? এই না ? কিন্তু নিরুপায় ঝুলিকার ভাগ্যে এ বিড়ম্বনা যদি ঘটেই থাকে, তবু ত আপনার সঙ্গে তার কোন সম্পর্ক নেই।

জীবানন্দ। নাই থাক্, কিন্তু তোমার মা-জানতেন শুধু কেবল

তোমাকে তোমার বাবার হাত থেকে আলাদা রাখবার জন্তেই তিনি যা হোক একটা—

ষোড়শী। বিবাহের গপ্তী টেনে দিয়েছিলেন? তা হবেও বা। অলকার মাও বেঁচে নেই, এবং আমিই অলকা কিনা, এতকাল পরে তা নিয়েও হুঁশ্চিন্তা করিবার আপনার দরকার নেই।

জীবানন্দ। ( কিছুক্ষণ নীরবে নতমুখে থাকিয়া ) কিন্তু, ধর, আসল কথা যদি তুমি প্রকাশ করে বল, তা হলে—

ষোড়শী। আসল কথাটা কি? বিবাহের কথা? কিন্তু সেই ত মিথ্যে। তা ছাড়া সে সমস্তা অলকার, আমার নয়। সারারাত এখানে কাটিয়ে গিয়ে ও-গল্প করলে ষোড়শীর সর্বনাশের পরিমাণ তাতে এতটুকু কমবে না।

জীবানন্দ। ( কয়েক মুহূর্ত নীরব থাকিয়া ) ষোড়শী, আজ আমি এত নিচে নেবে গেছি যে গৃহস্থের কুলবধূর দোহাই দিলেও তুমি মনে মনে হাসবে, কিন্তু সেদিন অলকাকে বিবাহ করে বীজগাঁ'র জমিদার বংশের বধূ বলে সমাজের ঘাড়ে চাপিয়ে দেওয়াটাই কি ভাল কাজ হ'তো?

ষোড়শী। সে ঠিক জানি নে, কিন্তু সত্য কাজ হ'তো এ জানি। কিন্তু আমি মিথ্যে বক্চি, এখন এসব আর আপনার কাছে বলা নিষ্ফল। আমি চলুম—আপনি কোনো কিছু দেবার চেষ্টা করে আর আমাকে অপমান করবেন না।

এককড়ির প্রবেশ

জীবানন্দ। ( এককড়ি প্রবেশ করিতেই তাহাকে ) এককড়ি, তোমাদের এখানে কোনো ডাক্তার আছেন? একবার খবর দিয়ে আনতে পারো। তিনি যা চাবেন আমি তাই দেব।

‘ এককড়ি । ডাক্তার আছে বই কি হজুর—আমাদের বল্লভডাক্তারের খাসা হাত বশ । ( ষোড়শীর দিকে চাহিল ) ’

জীবানন্দ । ( ব্যগ্রকণ্ঠে ) তাঁকেই আনতে পাঠাও এককড়ি, আর একমিনিট দেরি ক’রো না ।

এককড়ি । আমি নিজেই যাচ্ছি । কিন্তু হজুরকে একলা—

জীবানন্দ । ( দুঃসহ বেদনায় মুহূর্তে বিবর্ণ ও উপুড় হইয়া পড়িয়া )  
উঃ—আর আমি পারি নে ।

ষোড়শী । তুমি বল্লভ ডাক্তারকে ডেকে আনো গে এককড়ি, এখানে বা করবার আমি ক’রব এখন ।

এককড়ি ব্যস্তভাবে চলিয়া গেল

জীবানন্দ । ( কিছুক্ষণ উপুড় থাকিয়া মুখ তুলিয়া ) ডাক্তার আসে নি ? কত দূরে থাকেন জানো ?

ষোড়শী । কাছেই থাকেন, কিন্তু তাই বলে তিন-চার মিনিটেই কি আসা যায় ?

জীবানন্দ । সবে তিন-চার মিনিট ? আমি ভেবেছি আধ ঘণ্টা—  
কি আরও কতক্ষণ যেন এককড়ি তাঁকে আনতে গেছে । ( উপুড় হইয়া শুইয়া পড়িল ) ; হয় ত তিনিও ভয়ে এখানে আসবেন না অলকা !  
( তাহার কণ্ঠস্বরে ও চোখের দৃষ্টিতে নিরাশ্বাসের অবধি রহিল না )

ষোড়শী । ( ক্ষণকাল মৌন থাকিয়া, স্নিগ্ধস্বরে ) ডাক্তার আসবেন বই কি !

জীবানন্দ । বোধ করি আমি বাঁচব না । আমার নিশ্বাস নিতেও কষ্ট হচ্ছে, মনে হচ্ছে, পৃথিবীতে আর বুকি হাওয়া নেই ।

ষোড়শী । আপনার কি বড্ড কষ্ট হচ্ছে ।

জীবানন্দ । হুঁ । অলকা, আমাকে তুমি মাপ কর । ( একটু থামিয়া ) আমি ঠাকুর দেবতা মানি নে, দরকারও হয় না । কিন্তু একটু আগেই মনে মনে ডাকছিলাম । জীবনে অনেক পাপ করেছি, তার আর আদি অন্ত নেই । আজ থেকে থেকে কেবলি মনে হচ্ছে বুঝি সব দেনা মাথায় নিয়েই যেতে হবে । ( ক্ষণেক থামিয়া ) মানুষ অমর নয়, মৃত্যুর বয়সও কেউ দাগ দিয়ে রাখে নি—কিন্তু এই যন্ত্রণা আর সহিতে পারছি নে—উঃ—মাগো !

ব্যথার তীব্রতায় সর্বশরীর যেন আকুঞ্চিত হইয়া উঠিল

ষোড়শী একটু ইতস্ততঃ করিয়া শয্যাপার্শ্বে বসিয়া আঁচল দিয়া ললাটের ঘাম মুছাইয়া দিয়া, পাথার অভাবে আঁচল দিয়া বাতাস করিতে লাগিল । জীবানন্দ কোন কথা কহিল না, কেবল তাহার ডান হাতটা ধীরে ধীরে কোলের উপর টানিয়া লইল

জীবানন্দ । ( ক্ষণেক পরে ) অলকা—

ষোড়শী । আপনি আমায় ষোড়শী বলে ডাকবেন ।

জীবানন্দ । আর কি অলকা হতে পারো না ?

ষোড়শী । না ।

জীবানন্দ । কোনোদিন কোন কারণেই কি—

ষোড়শী । আপনি অন্য কথা বলুন । ( জীবানন্দ নীরবে রহিল, ক্ষণেক পরে ) কষ্টটা কি কিছুই কমে নি ?

জীবানন্দ । ( ঘাড় নাড়িয়া ) বোধ হয় একটু কমেছে । আচ্ছা যদি বাঁচি, তোমার কি কোন উপকার করতে পারি নে ?

‘ ষোড়শী । না, আমি সন্ন্যাসিনী—আমার নিজের কোন উপকার করা কারো সম্ভব নয় ।

জীবানন্দ । আচ্ছা এমন কিছুই কি নেই, যাতে সন্ন্যাসিনীও খুসি হয় ?

ষোড়শী । তা হয় ত আছে, কিন্তু সেজন্তে কেন আপনি ব্যস্ত হচ্ছেন ?

জীবানন্দ । ( একটু ক্ষীণ হাসিয়া ) আমার ঢের দোষ আছে, কিন্তু পরের উপকার করতে ব্যস্ত হয়ে পড়ি এ দোষ আজও কেউ দেয় নি । তা ছাড়া এখন বল্টি বলেই যে ভালো হয়েও বল্বে, তারও কোন নিশ্চয়তা নেই—এমনিই বটে ! এমনিই বটে ! সারা জীবনে এ ছাড়া আর আমার কিছুই বোধ হয় নেই ।

ষোড়শী নীরবে তাহার কপালের ঘাম মুছাইয়া দিল

জীবানন্দ । ( হঠাৎ সেই হাতটা ধরিয়া ফেলিয়া ) সন্ন্যাসিনীর কি সুখ দুঃখ নেই ? সে খুসি হয়, পৃথিবীতে এমন কি কিছুই নেই ?

ষোড়শী । কিন্তু সে ত আপনার হাতের মধ্যে নয় ।

জীবানন্দ । যা মানুষের হাতের মধ্যে ? তেমন কিছু ?

ষোড়শী । তাও আছে, কিন্তু ভাল হয়ে যদি কখনো জিজ্ঞাসা করেন তখনই জানাবো ।

জীবানন্দ । ( তাহার হাতটাকে বুকের কাছে টানিয়া ) না, না, আর ভালো হয়ে নয়—এই কঠিন অস্থখের মধ্যেই আমাকে বল ! মানুষকে অনেক দুঃখ দিয়েচি, আজ নিজের ব্যথার মধ্যে পরের ব্যথা, পরের আশার কথাটা একটু শুনে নিই । নিজের দুঃখের একটা সদগতি হোক্ ।

বাহিরে পদশব্দ শোনা গেল । ষোড়শী নিজের হাতটাকে ধীরে ধীরে মুক্ত করিয়া লইল

ষোড়শী। ডাক্তারবাবু বোধ হয় এলেন !

ডাক্তার ও এককড়ি প্রবেশ করিল

ডাক্তার ষোড়শীকে এখানে দেখিয়া একেবারে আশ্চর্য্য হইয়া গেলেন। কিন্তু কিছু না বলিয়া নীরবে শয্যাপ্রান্তে আসিয়া রোগ পরীক্ষা করিতে নিযুক্ত হইলেন ;  
ষোড়শী এই সময়ে প্রস্থান করিল

এককড়ি। যদি ভালো করতে পারেন ডাক্তারবাবু, বক্সিসের কথা ছেড়েই দিন—আমরা সবাই আপনার কেনা হয়ে থাকবো।

ডাক্তার। ( পরীক্ষা শেষ করিয়া ) অত্যাচার করে রোগ জন্মেছে। সাবধান না হলে পিলে কি লিভার পাকা অসম্ভব নয়, এবং তাতে ভয়ের কথা আছে। তবে সাবধান হলে নাও পাকতে পারে এবং তাতে ভয়ের কথাও কম। তবে এ কথা নিশ্চয় যে ওষুধ খাওয়া আবশ্যক।

জীবানন্দ। এ অবস্থায় কলকাতায় যাওয়া সম্ভব কি না তা বলতে পারেন ?

ডাক্তার। যদি যেতে পারেন তা হলেই সম্ভব, নইলে কিছুতেই সম্ভব নয়।

জীবানন্দ। এখানে থাকলে ভাল হবে কি না বলতে পারেন ?

ডাক্তার। ( বিজ্ঞের মত মাথা নাড়িয়া ) আজ্ঞে না হজুর, তা বলতে পারি নে। তবে একথা নিশ্চয় যে এখানে থাকলেও ভাল হতে পারেন, আবার কলকাতা গিয়ে ভাল নাও হতে পারেন।

এককড়ি। হজুরের ব্যাখ্যাটা—

ডাক্তার। এরকম ব্যথা হঠাৎ বাড়ে, আবার হঠাৎ কমে যায়। কাল

দকালেই হজুর স্তম্ভ হয়ে উঠতে পারেন। তবে একথা নিশ্চয় যে আমাকে আবার আসতে হবে।

এককড়ির কাছ থেকে ভিজিট লইয়া ডাক্তার প্রস্থান করিলেন

জীবানন্দ। কি হবে এককড়ি ?

এককড়ি। ভয় কি হজুর, ওষুধ এল বলে। বল্লভ ডাক্তারের একশিশি মিক্চার খেলেই সব ভাল হয়ে যাবে !

জীবানন্দ। ( ষোড়শী ঘে-দ্বারপথে একটু আগে বাহির হইয়া গেছে সেই দিকে উৎসুক চোখে চাহিয়া ) গুঁকে একবার ডেকে দিযে—

এককড়ি বাহিরে গিয়া ক্ষণেক পরে পুনরায় প্রবেশ করিল

এককড়ি। তিনি নেই, বাড়ী চলে গেছেন হজুর ! ভোর হয়ে এসেচে !

জীবানন্দ। ( ব্যগ্র ব্যাকুল কণ্ঠে ) আমাকে না জানিয়ে চলে যাবেন, না। এমন হতেই পারে না এককড়ি !

এককড়ি। হাঁ হজুর, তিনি ডাক্তারবাবু আসবার পরেই চলে গেছেন। বাইরে সর্দার বসে আছেন, সে দেখেছে ভৈরবী ঠাকুর সোজা চলে গেলেন।

জীবানন্দ। ( কিছুক্ষণ চোখের সোজা তাকাইয়া থাকিয়া ) তা হলে নিভিয়ে দিয়ে তুমিও যাও এককড়ি আমি একটু ঘুমুবে।

এককড়ি আলো নিভাইয়া দিল। জীবানন্দ বেদনা-স্নানযুগে পাশ ফিরিয়া

শুইলেন। আলো নিভাইতেই অতি প্রত্যাশের আবছায়া

আভা জানালা দিয়া ঘরে ছড়াইয়া পড়িল



## তৃতীয় দৃশ্য

৬চণ্ডী-মন্দিরের পথ । বেলা—পূর্বাহ্ন

জনৈক ভিক্ষুক ও তাহার কণ্ঠার প্রবেশ

কণ্ঠা । আর যে চলতে পারি নে বাবা, মায়ের মন্দির আর কত দূরে ?

ভিক্ষুক । ঐ যে আগে কত লোক চলে যাচ্ছে মা, বোধ হয় আর বেশি দূরে নয় ।

কণ্ঠা । কে গান গাইতে গাইতে আস্চে বাবা, ওকে শুধোও না ?

গান গাহিতে গাহিতে দ্বিতীয় ভিক্ষুকের প্রবেশ

তোর পাওয়ার সময় ছিল যখন, ওরে অবোধ মন,

মরণ-খেলায় নেশায় মেতে রইলি অচেতন ।

প্রথম ভিক্ষুক । মায়ের মন্দির আর কত দূরে বাবা ?

দ্বিতীয় ভিক্ষুক । ঐ যে—

তখন ছিল মণি, ছিল মাণিক

পথের ধারে ধারে—

এখন ডুবলো তারা দিনের শেষে

বিধম অন্ধকারে ।

প্রথম ভিক্ষুক । হাঁ গা—

দ্বিতীয় ভিক্ষুক । কি গো কি ?

প্রথম ভিক্ষুক । বিষ্ণু গাঁ থেকে আসছি বাবা, পথ যেন আর ফুরোয়

না। শুনি যে জনার্দন রায়মশায়ের নাতির কল্যাণে আজ মায়ের পূজো। বামুন বোষ্টম ভিখারী যে যা চাইবে তাই নাকি রায়মশায়—

দ্বিতীয় ভিক্ষুক। রায়মশায় নয়, রায়মশায় নয়, তার জামাই। পশ্চিম মুল্লকের ব্যারিষ্টার—রাজা বললেই হয়। হু'সরা চিঁড়ে মুড়কি, এক সরা সন্দেশ, আর আটগুণা পয়সা নগদ—

ভিক্ষুক-কন্ঠা। ( পিতার প্রতি ) হাঁ বাবা, তুমি যে বলেছিলে মেয়ে-দের একখানা করে রাঙা-পেড়ে কাপড় দেবে ?

দ্বিতীয় ভিক্ষুক। দেবে, দেবে। যে যা চাইবে। রায়মশায়ের মেয়ে হৈমবতী কাউকে না বলতে জানে না।

আজ মিথ্যে রে তোর খোঁজা খুঁজি

মিথ্যে চোখের জল,

তারে কোথায় পাৰি বল,

( তোর ) অতল তলে তলিয়ে গেল

শেষ সাধনার ধন।

ভিক্ষুক-কন্ঠা। বাবা, চাইলে হয় ত তুমিও পাবে একখানা কাপড়, না ?

দ্বিতীয় ভিক্ষুক। পাবে পাবে, একটু পা চালিয়ে এসো—

তোর পাওয়ার সময় ছিল যখন

ওরে অবোধ মন,

মরণ-খেলার নেশায় মেতে রইলি অচেতন।

সকলের প্রস্থান

কথা কহিতে কহিতে ষোড়শী ও ফকিরসাহেব প্রবেশ করিলেন

ফকির। যে সব কথা আমার কানে গেছে মা, চুপ করে থাকতে পারলাম না চলে এলাম। কিন্তু আমি ত কিছুতেই ভেবে পাই নে

ষোড়শী, সেদিন কিসের জ্ঞান ও লোকটাকে তুমি এমন ক'রে বাঁচিয়ে দিলে।

ষোড়শী। ঐ পীড়িত লোকটিকে জেলে পাঠানোই কি উচিত হ'তো ফকিরসাহেব ?

ফকির। সে বিবেচনার ভার ত তোমার ছিল না মা, ছিল রাজার, তাই তাঁর জেলের মধ্যেও হাসপাতাল আছে, পীড়িত অপরাধীরও তিনি চিকিৎসা করেন। কিন্তু শুধু এই যদি কারণ হয়ে থাকে ত তুমি অত্যাচারেছ বলতে হবে।

ষোড়শী নিঃশব্দে মুখের প্রতি চাহিয়া রহিল

ফকির। যা হবার হয়ে গেছে, কিন্তু ভবিষ্যতে এ ত্রুটি তোমাকে শুধু'রে নিতে হবে ষোড়শী।

ষোড়শী। তার অর্থ ?

ফকির। ওই লোকটার অপরাধ ও অত্যাচারের অন্ত নেই এ তুমি জানো। শাস্তি হওয়া উচিত।

ষোড়শী। ( ক্রণেক স্তব্ধ থাকিয়া ) আমি সমস্ত জানি। তাঁকে শাস্তি দেওয়াই হয় ত আপনাদের কর্তব্য, কিন্তু আমার কথা কাউকে বলবার নয়। তাঁর বিরুদ্ধে সাক্ষী দিতে আমি কোন দিন পারব না।

ফকির। সেদিন পারো নি সত্য, কিন্তু ভবিষ্যতেও কি পারবে না ?

ষোড়শী। না।

ফকির। আত্মরক্ষার জন্তেও না !

ষোড়শী। না, আত্মরক্ষার জন্তেও না।

ফকির। আশ্চর্য্য। (ক্ষণকাল মৌন থাকিয়া) তুমি ত এখন মন্দিরে যাচ্চো ষোড়শী, আমি তা হ'লে চল্লম।

ষোড়শী হেঁট হইয়া নমস্কার করিল; ফকির প্রস্থান করিলেন। অন্তঃমনস্কের

স্থায় ষোড়শী চলিবার উপক্রম করিতেই সাগর দ্রুতবেগে

আসিয়া সম্মুখে উপস্থিত হইল

সাগর। হাঁ মা, তোমার বাবা তারাদাস ঠাকুর নাকি ঘরে ঘরে তালা বন্ধ ক'রে তোমাকে বাড়ী থেকে বার করে দিয়েছে? তারা সবাই মিলে নাকি মংলব করেছে, তোমাকে চণ্ডীমন্দির থেকে বিদায় করে আবার নতুন ভৈরবা আনবে? সে হবে না, সাগর সর্দার বেঁচে থাকতে তা হবে না বলে দিচ্ছি।

ষোড়শী। এ খবর তুই কোথায় শুন্লি সাগর?

সাগর। শুনেছি মা, এইমাত্র শুন্তে পেয়ে তোমার কাছে জানতে ছুটে এসেছি। তুমি মেয়েমানুষ, তোমাকে একলা পেয়ে যদি জমিদারের লোক বাড়ী থেকে ঘরে নিয়ে গিয়ে থাকে সে কি তোমার অপরাধ? অপরাধ সমস্ত গ্রামের। অপরাধ এই সাগরের, যে কুটুম বাড়ীতে গিয়ে আমোদে মেতেছিল—মায়ের খবর রাখতে পারে নি। অপরাধ তার খুড়ো হরিহর সর্দারের, যে গাঁয়ের মধ্যে উপস্থিত থেকেও এতবড় অপমানের শোধ নিতে পারে নি।

ষোড়শী। কিন্তু এই যদি সত্যি হয়ে থাকে সাগর, তোরা দু'জন খুড়ো ভাইপোতে উপস্থিত থাকলেই বা কি করতিস্ বল্ ত? জমিদারের কত লোকজন একবার ভেবে দেখ্ দিকি।

সাগর। তাও দেখেচি মা। তাঁর ঢের লোক, ঢের পাইক পিয়াদা। গরীব বলে আমাদের ছুঃখ দিতেও তারা কম করে না। কিন্তু দিক্

আমাদের দুঃখ, আমরা ছোটলোক বই ত না। কিন্তু তোমার হুকুম পেলে মা ভৈরবীর গায়ে হাত দেবার একবার শোধ দিতে পারি। গলায় দড়ি বেঁধে টেনে এনে ওই হুজুরকেই রাতারাতি মায়ের স্থানে বলি দিতে পারি মা, কোন শালা আটকাতে পারবে না।

ষোড়শী। ( শিহরিয়া ) বলিস্ কি সাগর, তোরা কি এত নিষ্ঠুর এমন ভয়ঙ্কর হতে পারিস্? এইটুকুর জন্তে একটা মানুষ খুন করবার ইচ্ছে হয় তোদের?

সাগর। এইটুকু? তোমার গায়ে হাত দেওয়াকে তুমি এইটুকু বল মা? তারাদাস ঠাকুরকেও আমরা মাপ করতে পারি, জনার্দন রায়কেও হয় ত পারি, কিন্তু স্রবিশে পেলে জমিদারকে আমরা সহজে ছাড়ব না। ( ক্ষণেক থামিয়া ) কিন্তু ওরা যে সব বলাবলি করে মা, তুমি নাকি ওঁকেই সে রাত্রে হাকিমের হাত থেকে রক্ষা করেছ? না কি বলেছ, তোমাকে ধরে নিয়ে কেউ যায় নি, নিজে ইচ্ছে করেই গিয়েছিলে?

ষোড়শী। এমন ত হতে পারে সাগর, আমি সত্যি কথাই বলেছিলাম।

সাগর। তাই ত বিষম খটকা লেগেছে মা, তোমার মুখ দিয়ে ত কখনো মিছে কথা বার হয় না। তবে এ কি!

সাগর। কিন্তু সে যাই হোক, যাই কেন না গ্রামগুচ্ছ লোকে বলে বেড়াক, আমরা ক'ঘর ছোটজাত তোমার ভূমিজ প্রজারা তোমাকেই মা বলে জেনেছি; যদি চণ্ডীগড় ছেড়ে চলে যাও মা, আমরাও তোমার সঙ্গে যাবো, কিন্তু যাবার আগে একবার জানিয়ে দিয়ে যাবো যে কারা গেল!

দ্রুতপদে প্রস্থান

ষোড়শী। সাগর! একটা কথা তোকে বলতে পারলেম না বাবা, তোদের দায়িত্ব হয় ত আর বইতে পারব না।

এককড়ির প্রবেশ

ষোড়শী। কে, এককড়ি ?

এককড়ি। (সসন্ত্রমে) আপনার কাছেই এলাম। হজুর একবার আপনাকে স্মরণ করেছেন।

ষোড়শী। কোথায় ?

এককড়ি। কাছারিতে বসে প্রজাদের নালিশ শুন্ছেন। যদি অলুমতি করেন ত পাল্কি আনতে পাঠাই।

ষোড়শী। পাল্কি ? এটি তাঁর প্রস্তাব, না তোমার সুবিবেচনা এককড়ি ?

এককড়ি। আজ্ঞে, আমি ত চাকর, এ হজুরের স্বয়ং আদেশ।

ষোড়শী। (হাসিয়া) তোমার হজুরের বিবেচনা আছে তা মানি, কিন্তু সম্প্রতি পাল্কি চড়বার আমার ফুরসৎ নেই এককড়ি। হজুরকে ব'লো আমার অনেক কাজ।

এককড়ি। ও বেলায় কিষা কাল সকালেও কি সময় হবে না ?

ষোড়শী। না।

এককড়ি। কিন্তু হলে ভাল হ'তো। আরও দশজন প্রজার নালিশ আছে কিনা।

ষোড়শী। (কঠোর স্বরে) তাঁকে ব'লো এককড়ি, বিচার করার মত বৃদ্ধি থাকে ত তাঁর নিজের প্রজাদের করুন গে। আমি তাঁর প্রজা নই, আমার বিচার করবার জন্তে রাজার আদালত আছে।

ষোড়শী দ্রুত পদে প্রস্থান করিল, এবং এককড়ি কিছুক্ষণ শুদ্ধভাবে থাকিয়া

ধীরে ধীরে চলিয়া গেল। অপর দিক দিয়া হৈম ও নির্মল

প্রবেশ করিল। হৈমর হাতে পূজার উপকরণ

হৈম। যে দয়ালু লোকটা তোমাকে সেদিন অন্ধকার রাতে বাড়ী পৌছে দিয়েছিলেন, সত্যি বল ত তিনি কে? তাঁকে আমি চিনেছি।

নির্মল। চিনেছ? কে বল ত তিনি?

হৈম। আমাদের ভৈরবী। কিন্তু তুমি তাঁকে পেলে কোথায় তাই শুধু আমি ঠাউরে উঠতে পারি নি।

নির্মল। পারো নি? পেয়েছিলাম তাঁকে অনেক দূরে। তোমাদের ফকিরসাহেবের সম্বন্ধে অনেক আশ্চর্য্য কথা শুনে ভারি কৌতূহল হয়েছিল তাঁকে দেখবার। খুঁজে খুঁজে চলে গেলাম। নদীর পারে তাঁর আশ্রম, সেখানে গিয়ে দেখি তোমাদের ভৈরবী আছেন বসে।

হৈম। তার কারণ, ফকিরকে তিনি গুরুর মত ভক্তি-শ্রদ্ধা করেন। কিন্তু সত্যিই কি তোমাকে একেবারে হাত ধরে অন্ধকারে বাড়ী পৌছে দিয়ে গেলেন?

নির্মল। সত্যিই তাই। যে মুহূর্ত্তে তিনি নিশ্চয় বুঝলেন প্রচণ্ড ঝড় জলের মধ্যে ভয়ঙ্কর অন্ধকার অজানা পথে আমি অন্ধের সমান, নারী হয়েও তিনি অসঙ্কোচে হাত বাড়িয়ে দিয়ে বল্লেন, আমার হাত ধরে আসুন। কিন্তু পরের জন্ম এ কাজ তুমি পারতে না হৈম।

হৈম। না।

নির্মল। তা জানি। (ক্ষণেক থামিয়া) দেখ হৈম, তোমাদের দেবীর এই ভৈরবীটিকে আমি চিনতে পারি নি সত্যি, কিন্তু এটুকু নিশ্চয় বুঝেছি এঁর সম্বন্ধে বিচার করার ঠিক সাধারণ নিয়ম খাটে না। হয়, সত্যীত্ব জিনিসটা এঁর কাছে নিতান্তই বাহ্যিক বস্তু—তোমাদের মত তার যথার্থ রূপটা ইনি চেনেন না, না হয়, স্নানাম জর্নাম এঁকে স্পর্শ পর্য্যন্তও করতে পারে না।

‘হৈম। তুমি কি সেদিনের জমিদারের ঘটনা মনে ক’রেই এই সব বলচো ?

নির্মল। আশ্চর্য্য নয়। শাস্ত্রে বলে সাত পা একসঙ্গে গেলেই বন্ধুত্ব হয়। অত বড় পথটায় ওই দুর্ভেদ্য আঁধারে একমাত্র তাঁকেই আশ্রয় করে অনেক পা গুটি গুটি এক সঙ্গে গেলাম, একটি একটি ক’রে অনেক প্রশ্নই তাঁকে জিজ্ঞাসা করলাম, কিন্তু পূর্বেও যে-রহস্যে ঢাকা ছিলেন পরেও ঠিক তেমনি রহস্যেই গা ঢাকা দিয়ে মিলিয়ে গেলেন—কিছুই তাঁর হৃদিস্ পেলাম না।

হৈম। তোমার জেরাও মান্‌লেন না, বন্ধুত্বও স্বীকার করলেন না ?

নির্মল। না গো, না, কোনটাই না !

হৈম। ( হাসিয়া ফেলিয়া ) একটুও না ? তোমার দিক থেকেও না ?

নির্মল। এতবড় কথাটা কেবল ফাঁকি দিয়েই বার করে নিতে চাও নাকি ? কিন্তু নিজেকে জানুতেও যে দেরি লাগে হৈম।

হৈম। দেরি লাগুক তবু পুরুষের হয়। কিন্তু মেয়েমানুষের এমনি অভিশাপ আমরণ নিজের অদৃষ্ট বুঝতেই তার কেটে যায়।

নির্মল। ( হৈমর হাত ধরিয়া ) তুমি কি পাগল হয়েছ হৈম ? চল, আমরা একটু তাড়াতাড়ি যাই, হয় ত পূজোর বিলম্ব হয়ে যাবে।



## চতুর্থ দৃশ্য

### নাট্যমন্দির

গড়চণ্ডীর মন্দির ও সংলগ্ন প্রশস্ত অলিন্দ। সম্মুখে দীর্ঘ প্রাকার বেষ্টিত বিস্তীর্ণ প্রাঙ্গণ। প্রাঙ্গণে নাট্যমন্দিরের কিয়দংশ দেখা যাইতেছে। মন্দিরের দ্বার উন্মুক্ত। দক্ষিণদিকে প্রাঙ্গণে প্রবেশ করিবার পথ। সকালে কাঁচা রোদের আলো চারিদিকে পড়িয়াছে; মন্দিরের অলিন্দে ও প্রাঙ্গণে উপস্থিত জনার্দন রায়, শিরোমণি ঠাকুর, নির্মল বহু, ষোড়শী, হৈম এবং আরও কয়েকজন নরনারী

শিরোমণি। ( ষোড়শীকে ) আজ হৈমবতী তাঁর পুত্রের কল্যাণে যে পূজা দিতেছেন তাতে তোমার কোন অধিকার থাক্বে না, তাঁর এই সংকল্প তিনি আমাদের জানিয়েছেন। তাঁর আশঙ্কা তোমাকে দিয়ে তাঁর কার্য্য সুসিদ্ধ হবে না।

ষোড়শী। ( পাণ্ডুর মুখে ) বেশ, তাঁর কাজ যাতে সুসিদ্ধ হয় তিনি তাই করুন।

শিরোমণি। কেবল এইটুকুই ত নয়! আমরা গ্রামস্থ ভক্তমণ্ডলী আজ স্থির সিদ্ধান্তে উপস্থিত হয়েছি যে, দেবীর কাজ আর তোমাকে দিয়ে হবে না! মায়ের ভৈরবী তোমাকে রাখ্লে আর চল্বে না। কে আছে, একবার তারাদাস ঠাকুরকে ডাকো ত।

একজন ডাকিতে গেল

ষোড়শী। কেন চল্বে না?

জনৈক ব্যক্তি। সে তোমার বাবার মুখেই শুন্তে পাবে।

জনার্দন। আগামী চৈত্রসংক্রান্তিতে নতুন ভৈরবীর অভিষেক হবে, আমরা স্থির করেছি।

তারাদাস একটা দশ বছরের মেয়ে সঙ্গে করিয়া প্রবেশ করিল

হৈম। ( তারাদাসের দিকে চাহিয়া ) বা সমস্ত গুন্টি বাবা, তাতে কি গুঁর কথাই সত্যি বলে মেনে নিতে হবে ?

জনার্দন। নয়ই বা কেন গুনি ?

হৈম। ( ছোট মেয়েটাকে দেখাইয়া ) ঐটাকে যখন উনি যোগাড় করে এনেছেন তখন মিথ্যে বলা কি গুঁর এতই অসম্ভব ? তা ছাড়া সত্যি মিথ্যে ত যাচাই করতে হয় বাবা, ও ত এক তরফা রায় দেওয়া চলে না।

সকলেই বিস্মিত হইল

শিরোমণি। ( স্মিতহাস্যে ) বেটি কৌমুদীর গিন্নী কিনা তাই জেরা ধরেচে ! আচ্ছা, আমি দিচ্ছি থামিয়ে ( হৈমকে ) এটা দেবীর মন্দির—পীঠস্থান ! বলি এটা ত মানিস ?

হৈম। ( ঘাড় নাড়িয়া ) মানি বৈকি !

শিরোমণি। তা যদি হয়, তা হলে তারাদাস বামুনের ছেলে হয়ে কি দেবমন্দিরে দাঁড়িয়ে মিছে কথা কইচে পাগলি ?

প্রবল হাস্য করিলেন

হৈম। আপনি নিজেও ত তাই শিরোমণিমশাই ! অথচ এই দেবমন্দিরে দাঁড়িয়েই ত মিছে কথার রুষ্টি করে গেলেন। আমি ত একবারও বলি নি গুঁকে দিয়ে কাজ করালে আমার সিদ্ধ হবে না।

শিরোমণি হতবুদ্ধির মত হইলেন

জনার্দন। ( কুপিত হইয়া তীক্ষ্ণকণ্ঠে ) বল নি কি রকম ?

হৈম। না বাবা বলি নি। বলা দূরে থাক, ও কথা আমি মনেও করি নে। বরঞ্চ গুঁকে দিয়েই আমি পূজো করাবো, এতে ছেলের আমার

কল্যাণই হোক, আর অকল্যাণই হোক। (ষোড়শীর প্রতি) চলুন মন্দিরের মধ্যে—আমাদের সময় বয়ে যাচ্ছে।

জনার্দন। (ধৈর্য হারাইয়া অকস্মাৎ উঠিয়া দাঁড়াইয়া ভীষণ কণ্ঠে) কণ্ঠনো না। আমি বেঁচে থাকতে ওকে কিছুতেই মন্দিরে ঢুকতে দেব না। তারাদাস, বল ত ওর মায়ের কথাটা! একবার শুনুক সবাই।

শিরোমণি। (সঙ্গে সঙ্গে দাঁড়াইয়া উঠিয়া) না তারাদাস, থাক। ওর কথা আপনার মেয়ে হয় ত বিশ্বাস করবে না রায়মশায়। ও-ই বলুক। চণ্ডীর দিকে মুখ করে ওই নিজের মায়ের কথা নিজে বলে যাক। কি বল চাটুষ্যে? তুমি কি বল হে যোগেন তটচাষ? কেমন? ও-ই নিজে বলুক।

ষোড়শীর মুখ বিবর্ণ হইয়া গেল

হৈম। আপনারা ঠাঁর বিচার করতে চান্ নিজেরাই করুন, কিন্তু ঠাঁর মায়ের কথা ঠাঁর নিজের মুখ দিয়ে কবুল করিয়ে নেবেন, এত বড় অত্যাচার আমি কোনমতে হতে দেবো না। (ষোড়শীর প্রতি) চলুন আপনি আমার সঙ্গে মন্দিরের মধ্যে—

ষোড়শী। না বোন, আমি পূজো করি নে, যিনি একাজ নিত্য করেন তিনিই করুন, আমি কেবল এইখানে দাঁড়িয়ে তোমার ছেলেকে আশীর্বাদ করি, সে যেন দীর্ঘজীবী হয়, নীরোগ হয়, মাছুষ হয়! (পূজারীর প্রতি) কিন্তু—ছোট্টাকুরমশাই, তুমি ইতস্ততঃ করচ কিসের জন্তে? আমার আদেশ রইলো দেবীর পূজা যথারীতি সেরে তুমি নিজের প্রাপ্য নিয়ো। বাকী মন্দিরের ভাঁড়ারে বন্ধ ক'রে চাবি আমাকে পাঠিয়ে দিয়ো! (হৈমর প্রতি) আমি আবার আশীর্বাদ করে যাচ্ছি এতেই তোমার ছেলের সর্বাদীন কল্যাণ হবে।

ষোড়শী প্রাঙ্গণ হইতে নিজান্ত হইয়া গেলেন এবং পুরোহিত পূজার জন্ত  
মন্দিরের অভ্যন্তরে প্রবেশ করিলেন

জনার্দন । ( নিশ্চল ও হৈমর প্রতি ) যাও মা তোমরাও পূজারী  
ঠাকুরের সঙ্গে যাও—পূজোটি বাতে সুসম্পন্ন হয় দেখো গে ।

নিশ্চল ও হৈম মন্দিরের অভ্যন্তরে প্রবেশ করিলেন

জনার্দন । যাক্ বাঁচা গেছে শিরোমণিমশায়, ষোড়শী আপনিই  
চলে গেল । ছুঁড়ি জিদ করে যে আমার নাতির মানস-পূজাটি পণ্ড করে  
দিলে না এই ঢের ।

শিরোমণি । এ যে হতেই হবে ভায়া, মা মহামায়ার মায়া কি কেউ  
রোধ করতে পারে ? এ যে ঠুঁরই হচ্ছে ।

এই বলিয়া তিনি যুক্তকরে মন্দিরের উদ্দেশে প্রণাম করিলেন

যোগেন ভট্টাচার্য । ( গলা বাড়াইয়া দেখিয়া ) জ্যা, এ যে স্বয়ং  
হুজুর আসছেন ।

সকলেই ত্রস্ত এবং চকিত হইয়া উঠিল । জীবানন্দ ও তাঁহার পশ্চাতে  
কয়েকজন পাইক ও ভৃত্য প্রভৃতি প্রবেশ করিল

শিরোমণি ও জনার্দন । আস্থন, আস্থন, আস্থন ।

কেহ নমস্কার করিল, অনেকেই প্রণাম করিল

জনার্দন । আমার পরম সৌভাগ্য যে আপনি এসেছেন । আজ  
আমার দৌহিত্রের কল্যাণে মায়ের পূজা দেওয়া হচ্ছে ।

জীবানন্দ । বটে ? তাই বুঝি বাইরে এত জন সমাগম ?

জনার্দন সবিনয়ে মুখ নত করিলেন

শিরোমণি । হুজুরের দেহটি ভাল আছে ?

জীবানন্দ । দেহ ? ( হাসিয়া ) হাঁ, ভালই আছে । তাই ত আজ হঠাৎ বেরিয়ে পড়লাম । দেখি, বহুলোকে ভিড় করে এই দিকে আসচে । সঙ্গ নিলাম । অদৃষ্ট প্রসন্ন ছিল, দেবতা ব্রাহ্মণ এবং সাধু-সঙ্গ তিনটেই বরাতে জুটে গেল । কিন্তু রায়মশায়কেই জানি, আপনাকে ত বেশ চিনতে পারলাম না ঠাকুর ?

জনাৰ্দ্দন । ইনি সৰ্ব্বেশ্বর শিরোমণি । প্রাচীন নিষ্ঠাবান ব্রাহ্মণ, গ্রামের মাথা বল্লেই হয় ।

জীবানন্দ । বটে ? বেশ, বেশ, বড় আনন্দ লাভ করলাম । তা এইখানেই একটু বসা যাক না কেন ?

বসিতে উত্তত হইলে সকলেই ব্যস্ত হইয়া উঠিল

শিরোমণি । ( চোৎকার করিয়া ) আসন, আসন, বস্বার একটা আসন নিয়ে এসো কেউ—

জীবানন্দ । ব্যস্ত হবেন না শিরোমণিমশাই, আমি অতিশয় বিনয়ী লোক । সময় বিশেষে রাস্তায় গুয়ে পড়তেও অভিমান বোধ করি নে— এ ত ঠাকুর বাড়ী । বেশ বসা যাবে ।

জীবানন্দ উপবেশন করিলেন

জনাৰ্দ্দন । একটা গুরুতর কার্য্যোপলক্ষে আমরা সবাই আপনার কাছে যাবো স্থির করেছিলাম, শুধু আপনি পীড়িত মনে করেই যেতে পারি নি ।

জীবানন্দ । গুরুতর কার্য্যোপলক্ষে ?

শিরোমণি । হাঁ ছজুর, গুরুতর বই কি । ষোড়শী ভৈরবীকে আমরা কেউ চাই নে ।

জীবানন্দ । চান্ না ?

শিরোমণি । না, হজুর ।

জীবানন্দ । একটুখানি জনশ্রুতি আমার কানেতেও পৌছেছে !  
ভৈরবীর বিরুদ্ধে আপনাদের নালিশটা কি শুনি ?

সকলেই নীরব রহিল

জীবানন্দ । বলতে কি আপনাদের করুণা বোধ হচ্ছে ?

জনার্দন । হজুর সর্বজ্ঞ, আমাদের অভিযোগ—

জীবানন্দ । কি অভিযোগ ?

জনার্দন । আমরা গ্রামস্থ ষোল-আনা ইতর ভদ্র একত্র হয়ে—

জীবানন্দ । ( একটু হাসিল ) তা দেখতে পাচ্ছি । ( অঙ্গুলি নির্দেশ  
করিয়া ) ওইটা কি সেই ভৈরবীর বাপ তারাদাস ঠাকুর নয় ?

তারাদাস সাড়া দিল না, মাটিতে দৃষ্টি-নিবদ্ধ করিল

শিরোমণি । ( সবিনয়ে ) রাজার কাছে প্রজা সন্তান-তুল্য, তা সে  
দোষ করলেও সন্তান, না করলেও সন্তান । আর কথাটা একরকম  
ওরই । ওর কথা ষোড়শীকে আমরা নিশ্চয় স্থির করেছি, তাকে আর  
মহাদেবীর ভৈরবী রাখা যেতে পারে না । আমার নিবেদন, হজুর  
তাকে সেবায়ের কাজ থেকে অব্যাহতি দেবার আদেশ করুন ।

জীবানন্দ । ( চকিত ) কেন ? তার অপরাধ ?

দু'তিন জন ব্যক্তি । ( সমস্বরে ) অপরাধ অতিশয় গুরুতর ।

জীবানন্দ । তিনি হঠাৎ এমন কি ভয়ানক দোষ করেছেন রায়মশায়,  
যার জন্তে তাঁকে তাড়ানো আবশ্যক ?

জনার্দন শিরোমণিকে বলিতে চোখের ইঙ্গিত করিল

জীবানন্দ । না, না, উনি অনেক পরিশ্রম করেছেন, বুড়ো মানুষকে  
আর কষ্ট দিয়ে কাজ নেই, ব্যাপারটা আপনিই বাস্তব করুন ।

জনার্দন । ( চোখে ও মুখে দ্বিধা ও সঙ্কোচের ভাব আনিয়া ) ।  
ব্রাহ্মণকন্যা—এ আদেশ আমাকে করবেন না ।

জীবানন্দ । গো-ব্রাহ্মণে আপনার অচলা ভক্তির কথা এদিকে কারও  
অবিদিত নেই । কিন্তু এতগুলি ইতর ভদ্রকে নিয়ে আপনি নিজে যখন  
উঠে পড়ে লেগেছেন তখন ব্যাপার যে অতিশয় গুরুতর তা আমার  
বিশ্বাস হয়েছে । কিন্তু সেটা আপনার মুখ থেকেই শুনতে চাই ।

জনার্দন । ( শিরোমণির প্রতি ক্রুদ্ধ দৃষ্টি হানিয়া ) হজুর যখন নিজে  
শুনতে চাচ্ছেন তখন আর ভয় কি ঠাকুর ? নির্ভয়ে জানিয়ে দিন না ।

শিরোমণি । ( ব্যস্ত হইয়া ) সত্যি কথায় ভয় কিসের জনার্দন ?  
তারাদাসের মেয়েকে আর আমরা কেউ রাখবো না হজুর ! তার স্বভাব-  
চরিত্র ভারি মন্দ হয়ে গেছে—এই আপনাকে আমরা জানিয়ে দিচ্ছি ।

জীবানন্দের পরিহাস-দীপ্ত প্রফুল্ল মুখ অকস্মাতঃ গম্ভীর ও কঠিন হইয়া উঠিল

জীবানন্দ । তাঁর স্বভাব-চরিত্র মন্দ হবার খবর আপনারা নিশ্চয় জেনেছেন ?

সকলে ষাড় নাড়িল

জীবানন্দ । তাই স্মবিচারের আশায় বেছে বেছে একেবারে তীক্ষ্ণ  
দেবের শরণাপন্ন হয়েছেন রায়মশায় ?

শিরোমণি । আপনি দেশের রাজা—স্মবিচার বলুন, অবিচার বলুন  
আপনাকেই কল্পতে হবে । আমাদেরও তাই মাথা পেতে নিতে হবে ।  
সমস্ত চণ্ডীগড় ত আপনারই ।

জীবানন্দ । ( মুহূ হাসিয়া ) দেখুন শিরোমণিমশায়, অতি-বিনয়ে  
আপনাদেরও খুব হেঁট হয়ে কাজ নেই, অতি-গৌরবে আমাদেরও আকাশে  
তোলবার প্রয়োজন নেই । আমি শুধু জানতে চাই এ অভিযোগ কি সত্য ?

অনেকেই উত্তেজনা চঞ্চল হইয়া উঠিল

শিরোমণি । অভিযোগ ? সত্য কিনা !—আচ্ছা, আমরা না হয় পর, কিন্তু তারাদাস, তুমিই বল ত । রাজদ্বার, যথাধর্ম্য বলো—

তারাদাস একবার পাংশু একবার রাঙা হইয়া উঠিতে লাগিল । জনার্দনের ক্রুদ্ধ

একাগ্র দৃষ্টি খোঁচা মারিয়া যেন তাহাকে বারবার ভাড়া করিতে লাগিল ।

সে একবার ঢোঁক গিলিয়া একবার কণ্ঠের জড়িমা সাফ করিয়া

অবশেষে মরিয়ার মত বলিয়া উঠিল

তারাদাস । হজুর—

জীবানন্দ । ( হাত তুলিয়া তাহাকে থামাইয়া দিয়া ) ওর মুখ থেকে ওর নিজের মেয়ের কলঙ্কের কথা আমি যথাধর্ম্য বললেও গুনব না । বরঞ্চ আপনাদের কেউ পারেন ত যথাধর্ম্য বলুন ।

ভৃত্য অন্তরালে ছিল, সে টম্বুর ভরিয়া হইক্ষি সোডা জ্বুর হাতে আনিয়া দিল । তিনি এক নিশ্বাসে পান করিয়া বেহারার হাতে ফিরাইয়া দিলেন

জীবানন্দ । আঃ—বাঁচলাম । আপনাদের অজস্র বাক্য-সুধা পান করে তেষ্ঠায় বুক পর্য্যন্ত কাঠ হয়ে গিয়েছিল । কিন্তু চুপ্‌চাপ্‌ যে ! কি হ'ল আপনাদের যথাধর্ম্যের ?

শিরোমণি নাকে কাপড় দিয়াছিলেন

জীবানন্দ । ( সহাস্তে ) শিরোমাণিমশায় কি ভ্রাণে অর্দ্ধভোজনের কাজটা সেরে নিলেন নাকি ?

অনেকেই হাসিয়া মুখ ফিরাইল

শিরোমণি । ( হতবুদ্ধি হইয়া ) এই যে বলি হজুর । আমি যথাধর্ম্যই বলব ।

জীবানন্দ । ( ঘাড় নাড়িয়া ) সম্ভব বটে । আপনি শাস্ত্রজ্ঞ প্রবীণ



ব্রাহ্মণ, কিন্তু একজন স্ত্রীলোকের নষ্ট চরিত্রের কাহিনী তার অসাক্ষাতে বলার মধ্যে আপনার যথার্থ যদিই বা থাকে, ধর্ম্মটা থাকবে কি? আমার নিজের কোন বিশেষ আপত্তি নেই—ধর্ম্মাধর্ম্মের বালাই আমার বহুদিন যুচে গেছে—তবু আমি বলি, ওতে কাজ নেই। বরঞ্চ আমি যা জিজ্ঞাসা করি তার জবাব দিন। বর্তমান ভৈরবীকে আপনারা তাড়াতে চান—এই না?

সকলে। ( মাথা নাড়িয়া ) হাঁ, হাঁ।

জীবানন্দ। এঁকে নিয়ে আর সুবিধা হচ্ছে না?

জনার্দন। ( প্রতিবাদের ভঙ্গিতে মাথা তুলিয়া ) সুবিধে অসুবিধে কি হজুর, গ্রামের ভালর জত্নেই প্রয়োজন।

জীবানন্দ। ( হাসিয়া ফেলিয়া ) অর্থাৎ গ্রামের ভাল মন্দের আলোচনা না তুলেও এটা ধরে নেওয়া বেতে পারে যে আপনার ভাল মন্দ কিছু একটা আছেই। তাড়াবার আমার ক্ষমতা আছে কিনা জানি নে, কিন্তু আপত্তি বিশেষ নেই। কিন্তু আর কোন একটা অজুহাত তৈরি করা যায় না? দেখুন না চেষ্টা করে। বরঞ্চ আমাদের এককড়িটিকেও না হয় সঙ্গে নিন্, এ বিষয়ে তার বেশ একটু হাতঘশ আছে।

সকলে অবাধ হইয়া রহিল

জীবানন্দ। এঁদের সতীপনার কাহিনী অত্যন্ত প্রাচীন এবং প্রসিদ্ধ; সুতরাং তাকে আর নাড়াচাড়া করে কাজ নেই। ভৈরবী থাকলেই ভৈরব এসে জোটে এবং ভৈরবদেরও ভৈরবী নইলে চলে না, এ অতি সনাতন প্রথা—সহজে টলানো যাবে না। দেশভুক্ত ভক্তের দল চটে যাবে, হয় ত বা দেবী নিজেও খুসী হবেন না—একটা হান্ধামা বাধবে। মাতঙ্গী ভৈরবীর গোটা-পাঁচেক ভৈরব ছিল, এবং তাঁর পূর্বে যিনি

ছিলেন, তাঁর নাকি হাতে গোণা যেত না। কি বলেন, শিরোমণিমশাই, আপনি ত এ অঞ্চলের প্রাচীন ব্যক্তি, জানেন ত সব ?

শিরোমণি। ( শুষ্কমুখে জনান্তিকে ) কি জানি, শুনেছে না কি ?

প্রফুল্ল প্রবেশ করিল, তার হাতে ইংরিজি বাংলা কয়েকখানা সংবাদপত্র  
ও কতগুলো খোলা চিঠি-পত্র

জীবানন্দ। কিহে প্রফুল্ল, এখানেও ডাকঘর আছে নাকি ? আঃ—  
কবে এইগুলো সব উঠে যাবে।

প্রফুল্ল। ( ঘাড় নাড়িয়া ) সে ঠিক। গেলে আপনার সুবিধে হ'তো। কিন্তু সে যখন হয় নি তখন এগুলো দেখবার কি এখন সময় হবে ? অত্যন্ত জরুরী।

জীবানন্দ। তা বুঝেছি, নইলে এখানে আনবে কেন ? কিন্তু দেখবার সময় আমার এখনও হবে না, অল্প সময়েরও হবে না। কিন্তু ব্যাপারটা বাইরে থেকেই উপলব্ধি হচ্ছে। ওই যে হীরালাল-মোহন-লালের দোকানের ছাপ। পত্রখানি তাঁর উকিলের, না একেবারে আদালতের হে ? ও খামখানা ত দেখছি সলোমন সাহেবের। বাবা, বিলিতি সুধার গন্ধ যেন কাগজ ফুঁড়ে বার হচ্ছে। কি বলেন সাহেব ? ডিক্রী-জারি করবেন, না এই রাজবপুখানি নিয়ে টানা হেঁচ-ড়া করবেন—জানাচ্ছেন ? আঃ—সেকালের ব্রাহ্মণ্য তেজ কিছু যদি বাকি থাকত ত এই ইহুদি ব্যাটাকে একেবারে ভস্ম করে দিতাম। মদের দেনা আর শুধতে হ'তো না।

প্রফুল্ল। ( ব্যাকুল হইয়া ) কি বলছেন দাদা ? থাক, থাক, আর এক সময় হবে।

কিরিতে উত্তত হইল

জীবানন্দ । ( সহাস্ত্রে ) আরে লজ্জা কি ভায়া, এঁরা সব আপনার লোক, জ্ঞাতগোষ্ঠী, এমন কি মণিমাণিক্যের এপিঠ ওপিঠ বল্লেও অত্যাঙ্কি হয় না ! তা ছাড়া তোমার দাদাদি যে কস্তুরী-মৃগ ; স্নগন্ধ আর কতকাল চেপে রাখবে ভাই ? প্রফুল্ল, রাগ ক'রো না ভায়া, আপনার বল্লে আর কাউকে বড় বাকি রাখি নি, কিন্তু এই চল্লিশটা বছরের অভ্যাস ছাড়তে পারবো বল্লেও ভরসা নেই, তার চেয়ে বরঞ্চ নোট টোট জাল করতে পারে এমন যদি কাউকে যোগাড় করে আনতে পারতে হে—

প্রফুল্ল । ( অত্যন্ত বিরক্ত হইয়াও হাসিয়া ফেলিয়া ) দেখুন, সবাই আপনার কথা বুঝবে না । সত্য ভেবে যদি কেউ—

জীবানন্দ । ( গভীর হইয়া ) সন্ধান করে নিয়ে আসেন ? তা হলে ত বেঁচে যাই প্রফুল্ল । রায়মশায়, আপনি ত শুনি অতি বিচক্ষণ ব্যক্তি, আপনার জানাশুনা কি এমন কেউ—

জনার্দন । ( স্নান মুখে উঠিয়া ) বেলা হ'ল যদি অল্পমতি করেন ত—

জীবানন্দ । বহুন, বহুন, নইলে প্রফুল্লর জাঁক বেড়ে যাবে । তা ছাড়া ভৈরবীর কথাটাও শেষ হয়ে যাক । কিন্তু আমি যাও বল্লেই কি সে যাবে ?

জনার্দন । সে তার আমাদের ।

জীবানন্দ । কিন্তু আর কাউকে ত বাহাল করা চাই । ও ত খালি থাকতে পারে না ।

অনেকে । সে তারও আমাদের ।

জীবানন্দ । যাক বাঁচা গেল, তবে সে যাবেই । এতগুলো মাহুঘের নিশ্বাসের তার একা ভৈরবী কেন, স্বয়ং মা-চণ্ডীও সামুলাতে পারেন

না। আপনাদের লাভ লোকসান আপনারাই জানেন, কিন্তু আমার এমন অবস্থা যে টাকা পেলে আমার কিছুতেই আপত্তি নেই। নতুন বন্দোবস্তে আমার কিছু পাওয়া চাই। ভাল কথা, কেউ দেখত রে এককড়ি আছে না গেছে? কিন্তু গলাটা এদিকে যে মরুভূমি হয়ে গেল।

বেয়ারা। ( প্রবেশ করিয়া প্রভুর ব্যগ্র-বাকুল হস্তে পূর্ণ-পাত্র দিয়া )  
তিনি রান্না-বাড়ীর ঘরগুলো দেখেছেন।

জীবানন্দ। এর মধ্যেই? ডাক তাকে।

মতপান

ইহার পর হইতে পূজার্থীরা মন্দিরে প্রবেশ করিতে লাগিল ও পূজা শেষ

করিয়া বাহির হইয়া যাইতে লাগিল—তাদের সংখ্যা

ক্রমশই বাড়িতে লাগিল

এককড়ি প্রবেশ করিল

জীবানন্দ। আজ যে ভৈরবীকে তলব করেছিলাম, কেউ তাঁকে খবর দিয়েছিল?

এককড়ি। আমি নিজে গিয়েছিলাম।

জীবানন্দ। তিনি এসেছিলেন?

এককড়ি। আজ্ঞে না।

জীবানন্দ। না কেন। ( এককড়ি অধোমুখে নীরব ) তিনি কখন আসবেন জানিয়েছেন?

এককড়ি। ( তেমনি অধোমুখে ) এত লোকের সামনে আমি সে কথা হুজুরে পেশ করতে পারব না।

জীবানন্দ। এককড়ি তোমার গোমস্তাগিরি কায়দাটা একটু ছাড়।  
তিনি আসবেন, না, না?

এককড়ি। না।

জীবানন্দ। কেন ?

এককড়ি। তিনি আসতে পারবেন না। তিনি বল্লেন, তোমার হুজুরকে ব'লো এককড়ি, তাঁর বিচার করবার মত বিত্তে বুদ্ধি থাকে ত নিজের প্রজাদের করুন গে—আমার বিচার করবার জন্তে আদালত খোলা আছে।

জীবানন্দ। ( অন্ধকারমুখে ) হুঁ। আচ্ছা তুমি যাও।

এককড়ির প্রস্থান

প্রফুল্ল, সেই যে চিনির কোম্পানীর সঙ্গে হাজার বিঘে জমি বিক্রীর কথা হয়েছিল তার দলিল লেখা হয়েছে ?

প্রফুল্ল। আজ্ঞে হয়েছে ?

জীবানন্দ। এক্ষুনি তুমি গিয়ে সেটা পাকাপাকি কর গে। লিখে দাও জমি তারা পাবে।

প্রফুল্ল। তাই হবে।

পূজার্থী ও পূজার্থিনীরা যাইতেছে আসিতেছে

জীবানন্দ। আজ যে পূজার বড় ভিড় দেখছি। না, রোজই এই রকম ?

জনার্দন। আজকের একটু বিশেষ আয়োজন ত আছেই, তা ছাড়া এই চড়কের সময়টায় কিছুদিন ধরে এমনিই হয়। লোকজনের ভিড় এখন বাড়তেই থাকবে।

জীবানন্দ। তাই না কি ? বেলা হ'ল এখন তা হ'লে আসি।

( হাসিয়া ) একটা মজা দেখেছেন রায়মশায়, চণ্ডীগড়ের লোকগুলো প্রায়ই ভুলে যায় যে জমিদার এখন কালিমোহন নয়—জীবানন্দ চৌধুরী। অনেক প্রভেদ না ?

জনার্দন কি যে জবাব দিবে ভাবিয়া পাইল না। শুধু তাঁহার  
মুখের দিকে চাহিয়া রহিল

জীবানন্দ। এখানে বীজগাঁ'র প্রজা নয় এমন একটা প্রাণীও নেই।  
ঠিক না শিরোমণিমশায় ?

শিরোমণি। তাতে আর সন্দেহ কি হজুর !

জীবানন্দ। না, আমার সন্দেহ নেই, তবে আর কারও না সন্দেহ থাকে। আচ্ছা, নমস্কার শিরোমণিমশায়, চল্লাম। ( হাসিয়া ) কিন্তু ভৈরবী বিদায়ের পালাটা শেষ করা চাই। প্রফুল্ল, যাওয়া বাক্।

প্রস্থান

শিরোমণি। ( জমিদার সত্যই গেল কিনা উকি মারিয়া দেখিয়া )  
জনার্দন, কিরূপ মনে হয় ভায়া ?

জনার্দন। মনে ত অনেক কিছুই হয়।

শিরোমণি। মহাপাপিষ্ঠ—লজ্জা সরম আদৌ নেই।

জনার্দন। ( গভীরমুখে ) না।

শিরোমণি। ভারি দুশ্রু'থ। মানীর মান-মর্যাদার জ্ঞান নেই।

জনার্দন। না।

শিরোমণি। কিন্তু দেখলে ভায়া কথার ভঙ্গী ? সোজা না বাঁকা,  
সত্য না মিথ্যা, তামাসা না তিরস্কার, ভেবে পাওয়াই দায়। অর্দ্ধেক

কথা ত বোঝাই গেল না যেন হেঁয়ালি। পাষণ্ড সত্যি বল্লে না আমাদের বাদর নাচালে ঠিক ঠাহর করা গেল না। জানে সব, কি বল ?

জনার্দন নিরুত্তর

শিরোমণি। যা ভাবা গিয়েছিল ব্যাটা হাবা গোবা নয়—বিশেষ স্রুবিধে হবে না বলেই যেন শঙ্কা হচ্ছে, না ?

জনার্দন। মায়ের অভিরুচি।

শিরোমণি। তার আর কথা কি ! কিন্তু ব্যাপারটা যেন থিচুড়ি পাকিয়ে গেল। না গেল একে ধরা, না গেল তাকে মারা। তোমার কি ভায়া, পয়সার জোর আছে, ছুঁড়ী যক্ষের মত আগলে আছে, গেলে স্রুমুখের বাগান-বেড়াটা তোমার টানা দিয়া চৌকোশ হতে পারবে। কিন্তু বাঘের গর্ভের মুখে ফাঁদ পাততে গিয়ে না শেষে আমি মারা পড়ি।

জনার্দন। আপনি কি ভয় পেয়ে গেলেন না কি ?

শিরোমণি। না না, ভয় নয়, ভয় নয়—কিন্তু তুমিও যে খুব ভরসা পেলে তা ত তোমারও মুখ দেখে অনুভব হচ্ছে না। হজুরটি ত কান-কাটা সেপাই—কথাও যেমন হেঁয়ালি, কাজও তেমনি অদ্ভুত। ও যে ধরে গলা টিপে মদ খাইয়ে দেয় নি এই আশ্চর্য্য। এককড়ির মুখে ভৈরবী ঠাকুরগের হুমকিও ত শুনলে ? তোমরা চুপ করে ছিলে আমিই মেলা কথা কয়েছি—ভাল করি নি। কি জানি, এককোড়ে ব্যাটা ভেতরে ভেতরে সব বলে দেয় না কি। ছুয়ের মাঝখানে পড়ে শেষকালে না বেড়াজালে ধরা পড়ি।

জনার্দন। ( উদাসকণ্ঠে ) সকলই চণ্ডীর ইচ্ছে। বেলা হ'ল, সন্ধ্যার পর একবার আসবেন।

শিরোমণি। তা আসব। কিন্তু ঐষে আবার এঁরা কিরে আসছেন হে !

মন্দির-প্রাঙ্গণের একটা দ্বার দিয়া ষোড়শী ও তাহার পশ্চাতে সাগর ও তাহার  
সঙ্গী প্রবেশ করিল। অশ্রুদ্বার দিয়া জীবানন্দ, প্রফুল্ল,  
ভৃত্য ও কয়েকজন পাইক প্রবেশ করিল

জীবানন্দ। চলে যাচ্ছিলাম, শুধু তোমাকে আসতে দেখে ফিরে  
এলাম। এককড়িকে দিয়ে তোমাকে ডেকে পাঠিয়েছিলাম, এবং তারই  
মুখে তোমার জবাবও শুন্লাম। তোমার বিরুদ্ধে রাজার আদালতে  
গিয়ে দাঁড়াবার বুদ্ধি আমার নেই, কিন্তু নিজের প্রজাদের শাসনে রাখবার  
বিধেও জানি। সমস্ত গ্রামের প্রার্থনা মত তোমার সম্বন্ধে কি আদেশ  
করেছি শুনেছ!

ষোড়শী। না।

জীবানন্দ। তোমাকে বিদায় করা হয়েছে। নতুন ভৈরবী করে,  
তাকে মন্দিরের ভার দেওয়া হবে। অভিষেকের দিনও স্থির হয়ে গেছে!  
তুমি রায়মশায় প্রভৃতির হাতে দেবীর সমস্ত অস্থাবর সম্পত্তি বুঝিয়ে দিয়ে  
আমার গমস্তার হাতে সিন্দূকের চাবি দেবে। এ বিষয়ে তোমার কিছু  
বলবার আছে?

ষোড়শী। আমার বক্তব্যে আপনার কি কিছু প্রয়োজন আছে?

জীবানন্দ। না, নেই। তবে আজ সন্ধ্যার পরে এইখানেই একটা  
সভা হবে। ইচ্ছে কর ত দশের সামনে তোমার হুঁখ জানাতে পারো।  
ভাল কথা, শুনতে পেলাম আমার বিরুদ্ধে আমার প্রজাদের না কি তুমি  
বিদ্রোহী করে তোলবার চেষ্টা করচ?

ষোড়শী। তা জানি নে। তবে, আমার নিজের প্রজাদের আপনার  
উদ্ভাব থেকে বাঁচাবার চেষ্টা করচি।



জীবানন্দ । ( অধর দংশন করিয়া ) পারবে ?

ষোড়শী । পারা না পারা মা চণ্ডীর হাতে ।

জীবানন্দ । তারা মরবে ।

ষোড়শী । মানুষ অমর নয় সে তারা জানে ।

ক্রোধে ও অপমানে সকলের চোখ মুখ আরক্ত হইয়া উঠিল । এককড়ি এমন ভাব

দেখাইতে লাগিল যে সে কষ্টে আপনাকে সংযত করিয়া রাখিয়াছে

জীবানন্দ । ( এক মুহূর্ত্ত স্তব্ধ থাকিয়া ) তোমার নিজের প্রজা আর কেউ নাই । তারা যার প্রজা তিনি নিজে দস্তখত করে দিয়েছেন । তাঁকে কেউ ঠেকাতে পারবে না ।

ষোড়শী । ( মুখ তুলিয়া ) আপনার আর কোন হুকুম আছে ?  
নেই ? তা হলে দয়া করে এইবার আমার কথাটা শুনুন ।

জীবানন্দ । বল ।

ষোড়শী । আজ দেবীর অস্থাবর সম্পত্তি বুঝিয়ে দেবার সময় আমার নেই, এবং সন্ধ্যায় মন্দিরের কোথাও সভা-সমিতির স্থানও হবে না । এগুলো এখন বন্ধ রাখতে হবে ।

শিরোমণি । ( সহসা চীৎকার করিয়া ) কখনো না ! কিছুতেই নয় ! এসব চালাকি আমাদের কাছে খাটবে না বলে দিচ্ছি—

জীবানন্দ ছাড়া সকলেই ইহার প্রতিবন্ধি করিয়া উঠিল

জনার্দন । ( উদ্ভার সহিত ) তোমার সময় এবং মন্দিরের ভেতর জায়গা কেন হবে না গুনি ঠাকুরণ ?

ষোড়শী । ( বিনীতকণ্ঠে ) আপনি ত জানেন রায়মশাই, এখন চড়কের উৎসব । যাত্রীর ভিড়, সন্ন্যাসীর ভিড়, আমারই বা সময় কোথায়, তাদেরই ধা সরাই কোথায় ?

জনার্দন । ( আত্মবিস্মৃত হইয়া সগর্জনে ) হতেই হবে ! আমি বল্টি হতে হবে !

ষোড়শী । ( জীবানন্দকে ) বগড়া করতে আমার স্বর্ণা বোধ হয় । তবে ওসব করবার এখন সুযোগ হবে না, এই কথাটা আপনার অনুচরদের বুঝিয়ে বলে দেবেন । আমার সময় অল্প ; আপনাদের কাজ মিটে থাকে ত আমি চললাম ।

জীবানন্দ । ( তপ্তস্বর ) কিন্তু আমি হুকুম দিয়ে যাচ্ছি, আজই এসব হতে হবে এবং হওয়াই চাই ।

ষোড়শী । জোর ক'রে ?

জীবানন্দ । হাঁ, জোর ক'রে ।

ষোড়শী । সুবিধে অসুবিধে যাই-ই হোক ?

জীবানন্দ । হাঁ, সুবিধে অসুবিধে যাই-ই হোক ।

ষোড়শী । ( পিছনে চাহিয়া ভিড়ের মধ্যে সাগরকে অঙ্গুলি সন্ধেতে আহ্বান করিয়া ) সাগর, তোদের সমস্ত ঠিক আছে ?

সাগর । ( সবিনয়ে ) আছে মা, তোমার আশীর্বাদে অভাব কিছুই নেই ।

ষোড়শী । বেশ । জমিদারের লোক আজ একটা হাদ্জামা বাধাতে চায়, কিন্তু আমি তা চাই নে । এই গাজনের সময়টায় রক্তপাত হয় আমার ইচ্ছে নয়, কিন্তু দরকার হলে করতেই হবে । এই লোকগুলোকে তোরা দেখে রাখ্, এদের কেউ যেন আমার মন্দিরের ত্রিসীমানায় না আসতে পারে । হঠাৎ মারিস নে—গুধু বার করে দিবি ।

# দ্বিতীয় অঙ্ক

## প্রথম দৃশ্য

### ষোড়শীর কুটীর

সন্ধ্যা এইমাত্র উত্তীর্ণ হইয়াছে। গৃহের অভ্যন্তরে প্রদীপ জ্বলিতেছে। বাহিরে ষোড়শী উপবিষ্ট। এমনি সময়ে নির্মল ও হৈম প্রবেশ করিল। পিছনে ভৃত্য

ষোড়শী। এস, এস, কিন্তু এ কি কাণ্ড! তোমাদের যে আজ দুপুরের গাড়ীতে যাবার কথা ছিল?

নির্মল ও হৈম নিকটে উপবেশন করিল

হৈম। কথা ছিল, কিন্তু যাই নি। এঁকেও যেতে দিই নি। দিদির এই নতুন ঘরখানি চোখে দেখে না গেলে দুঃখ করতে হ'তো।

নির্মল। চোখে দেখে গিয়েও দুঃখ কম করতে হবে মনে হয় না।

হৈম। সে ঠিক। হয় ত চোখে না দেখলেই ছিল ভাল। এ ঘরের আর যা দোষ থাক, অপব্যয়ের অপবাদ শিরোমণিমশায় কেন, বোধ হয় আমার বাবাও দিতে পারেন না। কিন্তু এ পাগলামি কেন করতে গেলে দিদি, এ ঘরে ত তুমি থাকতে পারবে না!

ষোড়শী। এর চেয়েও কত খারাপ ঘরে কত মানুষকে ত থাকতে হয় ভাই।

হৈম। তা হলে সত্যিই কি তুমি সব ছেড়ে দেবে?

নির্মল। তা ছাড়া কি উপায় আছে বলতে পারো? সমস্ত গ্রামের

সঙ্গে ত একজন অসহায় স্ত্রীলোক দিবানিশি বিবাদ করে টিক্তে পারে না।

হৈম। আমরা সমস্তই শুনেছি। তুমি সন্ন্যাসিনী, সবই তোমার সহিবে কিন্তু এর সঙ্গে যে মিথ্যে দুর্নাম লোগে রইল সেও কি সহিবে দিদি ?

ষোড়শী। দুর্নাম যদি মিথ্যেই হয় সহিবে না কেন ? হৈম, সংসারে মিথ্যে কথার অভাব নেই, কিন্তু সেই মিথ্যে কথার সঙ্গে বগড়া করে মিথ্যে কাজের সৃষ্টি করতে আমার লজ্জা করে বোন।

হৈম। দিদি, তুমি সন্ন্যাসিনী, তোমার সব কথা আমরা বুঝতে পারি নে, কিন্তু তোমাকে দেখে কি আমার মনে হয় জানানো ? আমার শ্বশুরকে কোন্ এক রাজা একখানি তলোয়ার খিলাত দিয়েছিলেন। খাপখানা তার ধূলো বালিতে মলিন হয়ে গেছে কিন্তু আসল জিনিসে কোথাও এতটুকু ময়লা ধরে নি। সে যেমন সোজা, তেমনি খাঁটি, তেমনি কঠিন। তার কথা আমার তোমার পানে চাইলেই মনে পড়ে। মনে হয় দেশশুদ্ধ লোকে সবাই ভুল করেছে, আসল কথা কেউ কিছুই জানে না।

ষোড়শী। ( হৈমের হাতখানি নিজের হাতের মধ্যে টানিয়া লইয়া ) আজ তোমাদের কেন যাওয়া হ'ল না হৈম ? বোধ হয় কাল যাওয়া হবে, না ?

হৈম। আমার ছেলের কথা তুললেই তুমি রাগ কর, সে আর বলব না, কিন্তু ভয়ঙ্কর দুর্ঘ্যোগের রাতে আমার এই অন্ধ মাহুযটিকে যিনি হাতে ধ'রে নদী পার ক'রে এনে নিঃশব্দে দিয়ে গেছেন, তাঁর পায়ের ধূলো না নিয়েই বা আমরা যাই কি ক'রে ? কিন্তু যাবার আগে এই কথাটি আজ দাও দিদি, আপনার লোকের যদি কখনো দরকার হয়, এই প্রবাসী বোনটিকে তখন তুলো না।

হৈম । ( ষোড়শীকে নীরব দেখিয়া ) কথা দিতে বুঝি চাও না দিদি ?

ষোড়শী । কথা দিলাম, ভুলব না । ভুলিও নি হৈম । আঘাত পেয়ে আজই তোমাকে একখানা চিঠি লিখছিলাম, ভেবেছিলাম, তুমি চলে গেলে সেখানা তোমাকে ডাকে পাঠিয়ে দেব । কিন্তু শেষ করতে পারলাম না, হঠাৎ মনে পড়লো এর জন্তে হয় ত তোমার বাবার সঙ্গেই শেষ বিবাদ বেধে যাবে ।

হৈম । যেতেও পারে । কিন্তু আরও যে একটা মস্ত কথা আছে দিদি । আমার এই অন্ধ মানুষটিকে তুমি রক্ষা করেছ তার চেয়ে বড় সংসারে ত আমার কিছুই নেই ।

ষোড়শী । সত্যিই কিছু নেই হৈম ?

হৈম । না, নেই । আর এই সত্যি কথাটিই বলে যাবো বলে আজ যেতে পারি নি ।

ষোড়শী । ( হাসিয়া ) কিন্তু এই ছোট্ট কথাটুকুর জন্তে ত একজনই যথেষ্ট ছিল ভাই, নিশ্চলবাবুকে ত অনায়াসে যেতে দিতে পারতে ?

হৈম । এঁকে ? একলা ? হায়, হায়, দিদি, বাইরে থেকে তোমরা ভাবো প্রচণ্ড ব্যারিষ্টার, মস্তলোক । কিন্তু আমিই জানি শুধু এই বিনিমাইনের দাসীটিকে পেয়েছিলেন বলেই উনি জগতে টিকে গেলেন । বাস্তবিক দিদি, পুরুষমানুষদের এই এক আশ্চর্য ব্যাপার । বাইরের দিকে যিনি যতবড়, যত দুর্দাম, যত শক্তিশালী, ভিতরের দিকে তিনি তেমনি অক্ষম, তেমনি দুর্বল, তেমনি অপটু । দরকারের সময় কোথায় হারাবে এঁদের কাগজ-পত্র, বার হবার সময়ে কোথায় যাবে জামাকাপড়-পোষাক, রাস্তায় বেরিয়ে কোথায় ফেলবে পকেটের টাকাকড়ি—কোন ভরসায় একলা ছেড়ে দিই বল ত ? ( সহাস্তে ) একটুখানি চোখের

আড়াল করেছিলাম বলেই ত সেদিন অমন বিজাট বাধিয়েছিলেন।  
ভাগ্যে তুমি ছিলে।

ভৃত্য। মা, কালকের মত আজও ঝড় জল হতে পারে—মেঘ  
উঠেচে।

হৈম। আজ তা হ'লে উঠি। মেঘের জন্তে নয় দিদি, তোমার কাছ  
থেকে উঠতে ইচ্ছে করে না। কিন্তু কাল সকালেই যাত্রা করতে হবে—  
আজ যেন আর কাজের অন্ত নেই। এঁকে নিয়ে পালিয়ে এসেছি, লুকিয়ে  
বাড়ী ঢুকতে হবে—বাবা না দেখতে পান। এতক্ষণে খোকা হয় ত ঘুম  
ভেঙে উঠে বসে কাঁদচে, তাকে আবার দুধ খাইয়ে ঘুম পাড়াতে হবে,  
এঁর খাওয়া-দাওয়া আমি ছাড়া আর কেউ বোঝে না, আড়ালে থেকে সে  
ব্যবস্থা করতে হবে—তার পরে রেলগাড়ীতে দীর্ঘ পথের সমস্ত আয়োজনই  
আমাকে নিজের হাতে ক'রে নিতে হবে। কারও উপর নির্ভর করবার  
যো নেই। স্বামী, পুত্র, চাকর বাকর—তার কত ঝগাট, কত ভার—  
আমার নিশ্বাস ফেলবারও সময় নেই দিদি।

ষোড়শী। এতে ত তোমার কষ্ট হয় বোন ?

হৈম। (হাসিমুখে) তা হয়। তবু এই আশীর্বাদ আমাকে কর  
তুমি, যেন এই কষ্ট মাথায় নিয়েই একদিন যেতে পারি। আর ফিরে যদি  
আবার জন্ম নিতেই হয় যেন এমনি কষ্টই বিধাতা আমার অদৃষ্টে  
লিখে দেন। সেদিনও যেন এমনি নিশ্বাস ফেলবারও অবকাশ  
না পাই।

ষোড়শী। তোমার কথাটা আমি বুঝেচি হৈম। এ যেন তোমার  
আনন্দের মধুচক্র। ভার যতই বাড়চে ততই এর অঙ্গ রঙ্গ মধুতে ভরে ভরে  
উঠচে। তাই হোক, এই আশীর্বাদই তোমাকে আজ করি।

হৈম । ( সহসা পদধূলি লইয়া ) তাই কর দিদি, মেয়েমানুষের জীবনের এর বড় আশীর্বাদ কি আছে !

নির্মল । আঃ, কি বকে যাচ্ছে বল ত ? আজ তোমার হ'ল কি ?

হৈম । কি যে হয়েছে তুমি তার জান্বে কি ?

ষোড়শী । জানার শক্তিই আছে না কি আপনাদের ?

নির্মল । আপনাদের অর্থাৎ পুরুষদের ত ? না, এতবড় কঠিন তত্ত্ব হৃদয়ঙ্গম করবার সাধ্য নেই আমাদের সে কথা মানি, কিন্তু আপনিই বা এ সত্য জানলেন কি করে ?

হৈম । কেন ? দেবীর ভৈরবী বলে ? কিন্তু ভৈরবী কি নারী নয় ? ওগো মশায়, এ তত্ত্ব আমাদের চেষ্টা করে শিখতে হয় না । আমাদের জন্মকালে বিধাতা স্বহস্তে তাঁর দুই হাত পূর্ণ করে আমাদের বুকের মধ্যে ঢেলে দেন । সে সম্পদের কাছে ইন্দ্রাণীর ঐশ্বর্য্যও কামনা করি নে, এ কি সত্য নয় দিদি ?

ষোড়শী । সত্যি বই কি ভাই ।

ভৃত্য । মা, মেঘ যে বেড়েই আসছে ?

হৈম । এই যে উঠি বাবা । অনেক বাচালতা করে গেলাম দিদি, মাপ ক'রো ।

নির্মল । হৈমকে যে চিঠিখানা লিখছিলেন তাঁর হাতে দিলে সময়ও বাঁচতো, খরচও বাঁচতো ।

ষোড়শী । ( হাসিয়া ) না দিলেও বাঁচবে । হয় ত আর তার প্রয়োজনই হবে না ।

নির্মল । ঈশ্বর করুন নাই যেন হয়, কিন্তু হলে আপনার প্রবাসী ভক্ত দু'টিকে বিস্মৃত হবেন না ।

হৈম। আসি দিদি। (পদধূলি লইয়া উঠিয়া দাঁড়াইল) তোমার মুখের পানে চেয়ে আজ কত-কি যেন মনে হচ্ছে। দিদি! মনে হচ্ছে, এমন যেন তোমাকে আর কখনো দেখি নি—যেন সহসা কোথায় কত দূরেই চলে গিয়েছ।

নির্মল। নমস্কার। প্রয়োজনে যেন ডাক পাই।

সকলের প্রস্থান

ষোড়শী। হৈম, তুমি যেন আজ আমার কত যুগের চোখের ঝুঁলি খুলে দিয়ে গেলে বোন।—কে?

সাগরের প্রবেশ

সাগর। আমি সাগর।

ষোড়শী। তোদের আর সবাই? কাল যারা নল বেঁধে এসেছিল?

সাগর। আজও তারা তেমনি দল বেঁধেই গেছে হুজুরের কাছারি বাড়ীতে। আর বোধ হয় তোমারই বিরুদ্ধে—

ষোড়শী। বলিস্ কি সাগর? আমারই বিরুদ্ধে?

সাগর। আশ্চর্য্য হবার ত কিছু নেই মা! সর্ব প্রকার আপদে বিপদে চিরকাল তোমার কাছে এসে দাঁড়ানোই সকলের অভ্যাস। প্রথমটা সেই অভ্যাসটাই বোধ হয় তারা কাটিয়ে উঠতে পারে নি। কিন্তু আজ জমিদারের একটা চোখ রাঙানিতেই তাদের হুঁস হয়েছে।

ষোড়শী। ভাল। কিন্তু সভাটা যে শুনেছিলাম মন্দিরে হবার কথা ছিল?

সাগর। কথাও ছিল, হুজুরের ভোজপুরীগুলোর ইচ্ছেও ছিল, কিন্তু গ্রামের কেউ রাজী হলেন না। তাঁরা ত এদিক্কার মানুষ—আমাদের খুড়ো ভাইপোকে হয় ত চেনেন।



ষোড়শী। কি স্থির হ'ল সভাতে ?

সাগর। তা সব জ্বল। এই মঙ্গলবারেই মেয়েটার অভিষেক শেষ হবে। তোমারও ভাবনা নাই—কাশীবাসের বাবদে প্রার্থনা জানালে শ'খানেক টাকা পেতে পারবে।

ষোড়শী। প্রার্থনা জানাতে হবে বোধ করি হজুরের কাছে ?

সাগর। বোধ হয় তাই।

ষোড়শী ! আচ্ছা, জমি-জমা যাদের সমস্ত গেল, তাদের উপায় কি স্থির হ'ল ?

সাগর। ভয় নেই মা, চিরকাল ধরে যা হয়ে আস্চে তার অন্তথা হবে না।

ষোড়শী। আর তোদের ?

সাগর। আমাদের খুড়ো ভাইপোর ? ( একটু হাসিয়া ) সে ব্যবস্থাও রায়মশায় করেছেন, নিতান্ত চুপ করে বসে ছিলেন না। পাকা লোক, দারোগা পুলিশ মুঠোর মধ্যে, কোশ-দশেকের মধ্যে একটা ডাকাতি হতে যা দেরি।

ষোড়শী। ( ভয় পাইয়া ) হাঁরে, একি তোরা সত্যি বলে মনে করিস্ ?

সাগর। মনে করি ? এ ত চোখের উপর স্পষ্ট দেখতে পাচ্ছি মা। আমাদের জেলের বাইরে রাখতে পারে এ সাধ্য আর কারও নেই। ( একটু থামিয়া ) ভা বলে, যাদের জেল হবে না তাদের দুর্ভাগ্য কিছু কম নয় মা।

ষোড়শী। কেন রে ?

সাগর। তাদের অবস্থা আমাদের চেয়েও মন্দ। জেলের মধ্যে

থেতে দেয়, যা হোক আমরা দু'টো থেতে পাবো, কিন্তু এরা তাও পাবে না। রায়মশায়ের কাছে ধার করে জমিদারের সেলামি জুগিয়েছে, সেই খত গুলো সব ডিক্রী হতে যা বিলম্ব, তারপরে তাঁর নিজ জোতে জন থেটে দু'মুঠো জোটে ভালো, না হয়—

ষোড়শী। না হয় কি ?

সাগর। না হয় আসামের চা-বাগান আছেই। কেন মা তোমারই কি মনে পড়ে না ওই বেল-ডাঙাটায় আগে আমাদের কত ঘর ভূমিজ বাড়ির বসতি ছিল ?

ষোড়শী। ( ঘাড় নাড়িয়া ) পড়ে।

সাগর। আজ তারা কোথায় ? কতক গেল কয়লা খুঁড়তে, কতক গেল চালান হয়ে চা বাগানে। কিন্তু আমি দেখেছি ছেলে-বেলায় তাদের জমি জমা, হাল বদল। দু'মুঠো ধানের সংস্থান তাদের সবাইয়ের ছিল। আজ তাদের অর্ধেক এককড়ি নন্দীর, অর্ধেক রায়মশায়ের।

ষোড়শী। ( শুক থাকিয়া ) আচ্ছা সাগর, এসব তুই গুলি কার মুখে ?

সাগর। স্বয়ং হজুরের মুখেই।

ষোড়শী। তা হ'লে এ সকল তাঁরই মতলব ?

সাগর। ( চিন্তা করিয়া ) কি জানি মা, কিন্তু মনে হয় রায়মশায়ও আছেন।

ষোড়শী। এ ত গেল তাদের কথা সাগর। কিন্তু আমি ত একা। জমিদার ইচ্ছে করলে ত আমারও প্রতি অত্যাচার করতে পারেন ?

সাগর। তা জানি নে মা, শুধু জানি তুমি একা নও। ( ক্ষণকাল নিঃশব্দে থাকিয়া ) মা, আমাদের নিজের পরিচয় নিজেকে দিতে নেই, গুরু

নিষেধ আছে (বংশদণ্ড সুজোরে মুষ্টিবদ্ধ করিয়া)—হরিহর সর্দারের ভাইপো সাগরের নাম দশ-বিশ ক্রোশের লোকে জানে—তোমার উপর অত্যাচার করবার মানুষ ত মা পঞ্চাশখানা গ্রামে কেউ খুঁজে পাবে না।

ষোড়শী। (দুইচক্ষু অকস্মাৎ জলিয়া উঠিল) সাগর, এ কি সত্যি ?

সাগর। (তৎক্ষণাৎ হেঁট হইয়া হাতের লাঠি ষোড়শী পায়ের কাছে রাখিয়া) বেশ ত মা, সেই আশীর্বাদই কর না যেন কথা আমার মিথ্যে না হয়।

ষোড়শী। (চোখের দৃষ্টি একবার একটু খানি কোমল হইয়া আবার তেমনি জলিতে লাগিল) আচ্ছা সাগর, আমি ত শুনেছি তোদের প্রাণের ভয় করতে নেই ?

সাগর। (সহাস্ত্রে) মিথ্যে শুনেচ তাও ত আমি বলছি নে মা।

ষোড়শী। কেবল প্রাণ দিতেই পারিস আর নিতে পারিস নে ?

সাগর। পারি নে ? এই আদেশের জন্তে কত ভিক্ষেই না চাইলাম, কিন্তু কিছুতেই যে হুকুমটুকু তোমার মুখ থেকে বার করতে পারলাম না মা।

ষোড়শী। না সাগর, না। অমন কথা তোরা মুখেও আনিম্ নে বাবা।

সাগর। কিন্তু মন থেকে যে কথাটা তাড়াতে পারছি নে মা।

পূজারী প্রবেশ করিল

পূজারী। মন্দিরের দোর বন্ধ করে এলাম মা।

ষোড়শী। চাবি ?

পূজারী। এই যে মা। (চাবির গোছা হাতে দিয়া) রাত হ'ল এখন তা হ'লে আঁসি ?

ষোড়শী। এস, বাবা।

পূজারীর প্রস্থান

সাগর, ফকির সাহেব চলে গেছেন। তিনি কোথায় আছেন, খোঁজ নিয়ে তাকে জানাতে পারিস্ বাবা ?

সাগর। কেন মা ?

ষোড়শী। তাঁকে আমার বড় প্রয়োজন। তোরা ছাড়া তাঁর চেয়ে শুভাকাজ্জী আমার কেউ নেই

সাগর। কিন্তু তোমার কাছেই ত কতবার শুনেছি তিনি সাধু পুরুষ। যেখানেই থাকুন তাঁকে যথার্থ মন দিয়ে ডাকলেই এসে উপস্থিত হন।

ষোড়শী। (চমকিয়া) তাই ত সাগর, এতবড় কথাটা আমি কি করে ভুলেছিলাম! আর আমার চিন্তা নেই, আমার এতবড় দুঃসময়ে তিনি না এসে কিছুতেই পারবেন না।

সাগর। আমারও বিশ্বাস তাই। কিন্তু কথায় কথায় রাত্রি অনেক হ'ল মা, তুমি বিশ্রাম কর, আসি ?

ষোড়শী। এসো।

সাগর। (ঈষৎ হাসিয়া) ভয় নেই মা, সাগর তোমাকে একলা রেখে কোথাও বেশিক্ষণ থাকবে না।

প্রস্থান

তখন পর্যন্ত ষোড়শীর আত্মিক প্রভৃতি নিত্যকার্য্য সমাধা হয় নাই, সে এই

আয়োজনে ব্যাপৃত থাকিয়া

ষোড়শী। সাগর আমাকে কতবড় কথাই না স্মরণ করিয়ে দিলে। ফকিরসাহেব! যেখানে থাকুন, এ বিপদে আপনাদের দেখা আমি পাবোই পাবো।

নেপথ্যে । আসতে পারি কি ?

ষোড়শী । ( সচকিতে উঠিয়া দাঁড়াইয়া ব্যাকুল কণ্ঠে ) আস্থন  
আস্থন—আমি যে সমস্ত মন দিয়ে শুধু আপনাকেই ডাকছিলাম !

জীবানন্দ প্রবেশ করিল

জীবানন্দ । এত বড় পতিভক্তি কলিকালে দুর্লভ । আমার পাচ  
অর্থ্য আসনাদি কই ?

ষোড়শী । ( ক্ষণকাল স্তব্ধভাবে থাকিয়া, সভয়ে ) আপনি ? আপনি  
এসেছেন কেন ?

জীবানন্দ । তোমাকে দেখতে । একটু ভয় পেয়েছ বোধ হচ্ছে ।  
পাবারই কথা । কিন্তু চৈঁচিও না । সঙ্গে পিস্তল আছে তোমার ডাকাতের  
দল শুধু মারাই পড়বে, আর বিশেষ কিছু করতে পারবে না ।

ষোড়শী নির্বাক হইয়া রহিল

জীবানন্দ । তবু, দোরটা বন্ধ করে একটু নিশ্চিন্ত হওয়া যাক ।  
কি বল ?

এই বলিয়া জীবানন্দ অগ্রসর হইয়া দ্বার অর্গল বন্ধ করিয়া দিল

ষোড়শী । ( ভয়ে কণ্ঠস্বর তাহার কাঁপিতেছিল ) সাগর নেই—

জীবানন্দ । নেই ? ব্যাটা গেল কোথায় ?

ষোড়শী । আপনারা জানেন বলেই ত—

জীবানন্দ । জানি বলে ? কিন্তু আপনারা কারা ? আমি ত  
বাপ্পও জান্তাম না ।

ষোড়শী । নিরাশ্রয় বলেই ত লোক নিয়ে আমার প্রতি অত্যাচার  
করতে এসেছেন ? কিন্তু আপনার কি করেছে আমি ?

জীবানন্দ। লোক নিয়ে অত্যাচার করতে এসেছি? তোমার প্রতি? মাইরি না। বরঞ্চ, মন কেমন কঁরছিল বলে ছুটে দেখতে এসেছি।

ষোড়শীর চোখে জল আসিতেছিল, এই উপহাসে তাহা একেবারে শুকাইয়া

গেল। জীবানন্দ অদূরে বসিয়া তাহার আনত মুখের প্রতি

লুপ্ত তুষিত চক্ষে চাহিয়া রহিল

জীবানন্দ। অলকা?

ষোড়শী। বলুন।

জীবানন্দ। তোমার এখানে তামাক-টামাকের ব্যবস্থা নেই বুঝি?

ষোড়শী একবার মুখ তুলিয়াই অধোমুখে স্থির হইয়া রহিল

জীবানন্দ। (দীর্ঘনিশ্বাস মোচন করিয়া) ব্রজেশ্বরের কপাল ভাল ছিল। দেবীরাণী তাকে ধরিয়ে আনিয়া ছিল সত্যি, কিন্তু অশ্বুরি তামাকও খাইয়েছিল, এবং ভোজনান্তে দক্ষিণাও দিয়েছিল। বিদায়ের পালাটা আর তুলব না, বলি বন্ধিমবাবুর বইখানা পড়েচ ত? -

ষোড়শী। আপনাকে ধরে আন্লে সেইমত ব্যবস্থাও থাকত—  
অনুরোধ করতে হ'ত না।

জীবানন্দ। (হাসিয়া) তা বটে। টানা হেঁচড়া দড়িদড়ার বাঁধাবাঁধিই মাহুষের নজরে পড়ে। ভোজপুরী পেয়াদা পাঠিয়ে ধরে আনাটাই পাড়াশুদ্ধ সকলেই দেখে; কিন্তু যে পেয়াদাটিকে চোখে দেখা যায় না—হাঁ অলকা, তোমাদের শাজ্ঞগ্রন্থে তাঁকে কি বলে? অতন্ন, না? বেশ তিনি। (ক্ষণেক নীরব থাকিয়া) যৎসামান্য অনুরোধ ছিল; কিন্তু আজ উঠি। তোমার অনুরোধগুলো সুদ্ধান পেলে জামাই

আদর করবে না। এমন কি, শ্বশুরবাড়ী এসেচি বলে হয় ত বিশ্বাস করতেই চাইবে না—ভাব্বে প্রাণের দায়ে বুঝি মিথ্যেই বলচি।

লজ্জায় ষোড়শী আরও অবনত হইল

জীবানন্দ। তামাকের ধূঁয়া আপাততঃ পেটে না গেলেও চলত কিন্তু ধূঁয়া নয় এমন কিছু একটা পেটে না গেলে আর ত দাঁড়াতে পারি নে। বাস্তবিক, নেই কিছু অলকা?

ষোড়শী। কিছু কি? মদ?

জীবানন্দ। (হাসিয়া মাথা নাড়িয়া) এবারে তুল হ'ল। ওর জন্তে অন্য লোক আছে, সে তুমি নয়। তোমাকে বুঝতে পারার যথেষ্ট সুবিধে দিয়েছ—আর যা অপবাদ দিই, অস্পষ্টতার অপবাদ দিতে পারব না। অতএব তোমার কাছে যদি চাইতেই হয়, চাই এমন কিছু যা মানুষকে বাঁচিয়ে রাখে, মরণের পথে ঠেলে দেয় না। ডাল ভাত, মেঠাইমণ্ডা, চিঁড়ে মুড়ি যা হোক দাও, আমি খেয়ে বাঁচি। নেই?

ষোড়শী নির্মিমেব চক্ষে চাহিয়া রহিল

জীবানন্দ। আজ সকালে মন ভাল ছিল না। শরীরের কথা তোলা বিড়ম্বনা, কারণ স্তম্ভদেহ যে কি আমি জানি নে! সকালে হঠাৎ নদীর তীরে বেরিয়ে পড়লাম, কত যে হাঁটলাম বলতে পারি নে—ফিরতে ইচ্ছেই হ'ল না। সূর্য্যদেব অস্ত গেলেন, একলা জলের ধারে দাঁড়িয়ে কি যে ভাল লাগল বলতে পারি নে। কেবল তোমাকে মনে পড়তে লাগলো। মনে পড়লো আমার কাছারী বাড়ীতে এতক্ষণে লোক জমেছে—তোমাকে নির্বাসনে পাঠাবার ব্যবস্থাটা আজ শেষ করাই চাই। ফিরে এসে সভায় যোগ দিলাম, কিন্তু টিকতে পারলাম না। একটা ছুতো করে পালিয়ে এসে দাঁড়লাম ওই মনসাগাছটার গিছনে।

ষোড়শী । তার পরে ?

জীবানন্দ । দেখি দাঁড়িয়ে সাগর সর্দার এবং তুমি । আলাপ আলোচনা সমস্তই কানে গেল, তাৎপর্য্য গ্রহণ করতেও বিলম্ব হ'ল না । ভাবলাম, আমাদের মত সাধু ব্যক্তির যে এহেন নির্বোধ ভৈরবীকে দূর করে দিতে চেয়েছে সে ঠিকই হয়েছে । সে রাজে বাড়ি ঘেরাও করে পুলিশ পিয়াদা হাত কড়া নিয়ে হাজির, সামান্য একটা মুখের কথা'র জন্য স্বয়ং ম্যাজিস্ট্রেট সাহেব পর্য্যন্ত কি পীড়াপীড়ি—আর তুমি বললে কিনা আমি নিজের ইচ্ছেয় এসেছি । আর ছোট্ট একটুখানি হুকুমের জন্তে সাগরচাঁদের কত অল্পনয় বিনয়, কি সাধাসাধি—আর তুমি বলে বসলে কিনা অমন কথা মুখেও আনিস নে বাবা । অভিমানে বাবাজীবন মুখ-খানি স্নান করে চলে গেলেন সে ত স্বচক্ষেই দেখলাম । মনে মনে সাষ্টাঙ্গে প্রণিপাত করে বললাম, জয় মা চণ্ডীগড়ের চণ্ডী ! তোমার এই অধম সন্তানের প্রতি এত কৃপা না থাকলে কি আর এই মেয়েমানুষটির বার বার এমন ক'রে বুদ্ধি লোপ কর ! এখন একবার একে বিদায় করে আমাদের তত্তে বসাও মা, জনার্দন আর এককড়ি, এই দুই তাল-বেতালকে সঙ্গে নিয়ে আমি এম্নি সেবা তোমার স্মরণ করে দেব যে, একদিনের পূজোর চোটে তোমার মাটির মূর্ত্তি আল্লাদে একেবারে পাথর হয়ে যাবে । কিন্তু ভক্তি-তত্ত্বের এ সব বড় বড় কথা না হয় পরে ভাবা যাবে, কিন্তু এখন ক্ষিদের জ্বালায় যে আর দাঁড়াতে পারি নে । বাস্তবিক নেই কিছু অলকা ?

ষোড়শী । কিন্তু বাড়ী গিয়ে ত অনায়াসে খেতে পারবেন ।

জীবানন্দ । অর্থাৎ, আমার বাড়ীর খবর আমার চেয়ে তুমি বেশি জানো । ( এই বলিয়া সে একটুখানি হাসিল ) ।



ষোড়শী। আপনি সারাদিন খানু নি, আর বাড়ীতে আপনার খাবার ব্যবস্থা নেই, এ কি কখনো হতে পারে ?

জীবানন্দ। না পারবে কেন ? আমি খাই নি বলে আর একজন উপোস করে থালা সাজিয়ে পথ চেয়ে থাকবে এ ব্যবস্থা ত করে রাখি নি । আজ খামকা রাগ করলে চলবে কেন অলকা ? ( বলিয়া সে তেমনি মূঢ় হাসিল )

আমার যে শান্তিময় জীবনযাত্রা সেদিন চোখে দেখে এসেছ সে বোধ হয় ভুলে গেছ । আজ তা হলে আসি ?

ষোড়শী। ( ব্যাকুলকণ্ঠে ) দেবীর সামান্য একটু প্রসাদ আছে, কিন্তু সে কি আপনি খেতে পারবেন ?

জীবানন্দ। খুব পারবো। কিন্তু সামান্য একটু প্রসাদ। সে ত নিশ্চয় তোমার নিজের জন্তে আনা অলকা।

ষোড়শী। নইলে কি আপনার জন্তে রেখেছি এই আপনি মনে করেন ?

জীবানন্দ। ( হাসিমুখে ) না, তা করি নে। কিন্তু ভাবচি, তোমাকে ত বঞ্চিত করা হবে।

ষোড়শী। সে ভাবনার প্রয়োজন নেই। আমাকে বঞ্চিত করায় আপনার নূতন অপরাধ কিছু হবে না।

জীবানন্দ। না, অপরাধ আর আমার হয় না। একেবারে তার নাগালের বাইরে চলে গেছি। কিন্তু হঠাৎ একটা অদ্ভুত খেয়াল মনে উঠেছে অলকা, যদি না হাসো ত তোমাকে বলি।

ষোড়শী। বলুন।

জীবানন্দ। কি জানো, মনে হয়, হয় ত আজও বাঁচতে

পারি, হয় ত আজও মানুষের মত—কিন্তু এমন কেউ নেই যে আমার—কিন্তু তুমিই পারো শুধু এই প্লাপিষ্ঠের ভার নিতে—  
নেবে অলকা ?

ষোড়শী । কি বল্চেন ?

জীবানন্দ । ( আত্মসমর্পণের আশ্চর্য্য কণ্ঠ স্বরে ) বল্চি আমার সমস্ত ভার তুমি নাও অলকা ।

ষোড়শী । ( চমকিয়া, একমুহূর্ত্ত থামিয়া ) অর্থাৎ আমার যে কলঙ্কের বিচার করছেন, আমাকে দিয়ে তাকেই প্রতিষ্ঠিত করিয়ে নিতে চান । আমার মাকে ঠকাতে পেরেছিলেন, কিন্তু আমাকে পারবেন না !

জীবানন্দ । কিন্তু সে চেষ্টা ত আমি করি নি । তোমার বিচার করেচি, কিন্তু বিশ্বাস করি নি । কেবলি মনে হয়েছে এই কঠোর আশ্চর্য্য রমণীকে অভিভূত করেছেন সে মানুষটা কে ?

ষোড়শী । ( আশ্চর্য্য হইয়া ) তারা আপনার কাছে তার নাম বলে নি ?

জীবানন্দ । না । আমি বারবার জিজ্ঞাসা করেচি, তারা বারবার চুপ করে গেছে । যাক, এবার আমি যাই, কি বল ?

ষোড়শী । কিন্তু আপনার যে কি কাজের কথা ছিল ?

জীবানন্দ । কাজের কথা ? কিন্তু কি যে ছিল আমার আর মনে পড়চে না । শুধু এই কথাই মনে পড়চে, তোমার সঙ্গে কথা কহাই আমার কাজ । অলকা, তোমার কি সত্যিই আবার বিয়ে হয়েছিল ?

ষোড়শী । আবার কি রকম ? সত্যি বিয়ে আমার একবার মাত্রই হয়েছে ।

জীবানন্দ । আর তোমার মা যে তোমাকে আমাকে দিয়েছিলেন সেটাই কি সত্যি নয় ?

ষোড়শী। না, সে সত্যি নয়। মা আমার সঙ্গে যে টাকাটা দিয়েছিলেন আপনি তাই শুধু নিয়েছিলেন, আমাকে নেননি। ঠিকানো ছাড়া তার মধ্যে লেশমাত্র সত্য কোথাও ছিল না।

জীবানন্দ। ( কিছুক্ষণ ধ্যানমগ্নের মত বসিয়া ; যেন কতদূর হইতে কথা কহিল ) অলকা, একথা তোমার সত্য নয়।

ষোড়শী। কোন্ কথা ?

জীবানন্দ। তুমি যা জেনে রেখেচ। ভেবেছিলাম সে কাহিনী কখনো কাউকে বল্বে না, কিন্তু সেই কাউকের মধ্যে আজ তোমাকে ফেলতে পারচি নে! তোমার মাকে ঠকিয়েছিলাম, কিন্তু ভগবান তোমাকে ঠকাবার স্বেযোগ আমাকে দেন্ নি। আমার একটা অনুরোধ রাখবে ?

ষোড়শী। বলুন ?

জীবানন্দ। আমি সত্যবাদী নই ; কিন্তু আজকের কথা আমার তুমি বিশ্বাস কর। তোমার মাকে আমি জানতাম, তাঁর মেয়েকে জী বলে গ্রহণ করবার মতলব আমার ছিল না—ছিল কেবল তাঁর টাকাটাই লক্ষ্য। কিন্তু সে রাত্রে হাতে হাতে তোমাকে যখন পেলাম, তখন না বলে ফিরিয়ে দেওয়ার ইচ্ছেও আর হ'ল না।

ষোড়শী। তবে কি ইচ্ছে হ'ল ?

জীবানন্দ। থাক্, সে তুমি আর গুনতে চেয়ো না। হয় ত শেষ পর্যন্ত গুনলে আপনিই বুঝবে, এবং সে বোঝায় ক্ষতি বই লাভ আমার হবে না। কিন্তু এরা তোমাকে যা বুঝিয়েছিল তা তাই নয়, আমি তোমাকে ফেলে পালাই নি।

ষোড়শী। আপনার না পালানোর ইতিবৃত্ত এখন ব্যক্ত করুন।

জীবানন্দ । আমি নির্বোধ নই, যদি ব্যক্তই করি, তার সমস্ত ফলাফল জেনেই করব । তোমার মায়ের এত বড় ভয়ানক প্রস্তাবেও কেন রাজি হয়েছিলাম জানো ? একজন স্ত্রীলোকের হার আমি চুরি করি ; ভেবেছিলাম টাকা দিয়ে তাকে শাস্ত করব । সে শাস্ত হ'ল, কিন্তু পুলিশের ওয়ারেন্ট শাস্ত হ'ল না । ছ'মাস জেলে গেলাম—সেই যে শেষ রাত্রে বার হয়েছিলাম, আর ফেরবার অবকাশ হ'ল না ।

ষোড়শী । ( রুদ্ধ নিশ্বাসে ) তারপরে ?

জীবানন্দ । ( মুহূ হাসিয়া ) তারপরেও মন্দ নয় । জীবানন্দবাবুর নামে আরও একটা ওয়ারেন্ট ছিল । মাস-কয়েক পূর্বে রেলগাড়ীতে একজন বন্ধু সহযাত্রীর ব্যাগ নিয়ে তিনি অন্তর্হিত হন । অতএব আরও দেড় বৎসর । একুনে বছর দুই নিরুদ্দেশের পর বীজগাঁয়ের ভাবী জমিদারবাবু যখন রঙ্গমঞ্চে পুনঃ প্রবেশ করলেন, তখন কোথায় বা অলকা, আর কোথায় বা তার মা !

দু'জনেই স্বর্ণিক নিস্তব্ধ হইয়া রহিল

আর একবার সভায় যেতে হবে ! অলকা, আসি তা হলে ।

ষোড়শী । সভায় আপনার অনেক কাজ, না গেলেই নয় । কিন্তু কিছু না খেয়েও ত যেতে পারবেন না ।

জীবানন্দ । পারব না ? তা হলে আনো । কিন্তু মস্ত বড় অভ্যেস আমার, খেয়ে আর নড়তে পারি নে ।

ষোড়শী । না পারেন, এখানেই বিশ্রাম করবেন ।

জীবানন্দ । বিশ্রাম করব । যদি ঘুমিয়ে পড়ি অলকা ?

ষোড়শী । ( হাসিয়া ) সে সম্ভাবনা ত রইলই । কিন্তু পালাবেন না যেন ! আমি খাবার নিয়ে আসি ।

প্রস্থান

গৃহকোণে একখানা পত্রের খণ্ডাংশ পড়িয়াছিল, জীবানন্দের দৃষ্টি পড়িতেই তাহা সে  
তুলিয়া লইয়া দীপালোকে পুড়িয়া ফেলিল। তাহার মুহূর্ত্তকাল পূর্বের সরস  
ও প্রফুল্ল মুখের চেহারা গভীর ও অত্যন্ত কঠিন হইয়া উঠিল। ষোড়শী  
খাবারের পাত্র লইয়া প্রবেশ করিল। তাহার মনে পড়িল ঠাই  
করা হয় নাই, তাই সে পাত্রটা তাড়াতাড়ি একধারে রাখিয়া  
আসনের অভাবে কষলই পুরু করিয়া পাতিল এবং  
নিজের একখানি বস্ত্র পাট করিয়া দিতেছিল  
এমনি সময়ে জীবানন্দ কথা কহিল

জীবানন্দ। ওটা কি হচ্ছে ?

ষোড়শী। আপনার ঠাই করচি। শুধু কষলটা ফুটবে।

জীবানন্দ। ফুটবে, কিন্তু আতিশয্যটা ঢের বেশি ফুটবে। যত্ন  
জিনিসটায় মিষ্টি আছে সত্যি, কিন্তু তার ভান করাটার না আছে মধু, না  
আছে স্বাদ। ওটা বরঞ্চ আর কাউকে দিয়ে।

কথা শুনিয়া ষোড়শী বিস্ময়ে অবাক হইয়া গেল

জীবানন্দ। ( হাতের কাগজ দেখাইয়া ) ছেঁড়া চিঠি—সবটুকু নেই।  
ধাঁকে লিখেছিলে তাঁর নামটা শুনতে পাই নে ?

ষোড়শী। কার নাম ?

জীবানন্দ। যিনি দৈত্য বধের জন্য চণ্ডীগড়ে অবতীর্ণ হবেন, যিনি  
দ্রৌপদীর সখা—আর বলব ?

এই ব্যঙ্গোক্তির ষোড়শী উত্তর দিতে পারিল না, কিন্তু তাহার চোখের উপর হইতে

ক্ষণকাল পূর্বের মোহের যবনিকা খান্ খান্ হইয়া ছিঁড়িয়া গেল

জীবানন্দ। এই আহ্বান-লিপির প্রতি ছত্রটি ধীর কর্ণে অমৃত বর্ষণ  
করবে তাঁর নামটি ?

ষোড়শী। (আপনাকে সংযত করিয়া লইয়া) তাঁর নামে আপনার প্রয়োজন?

জীবানন্দ। প্রয়োজন আছে বই কি। পূর্বাহ্নে জান্তে পারলে হয় ত আত্মরক্ষার একটা উপায় করতে পারি।

ষোড়শী। আত্মরক্ষার প্রয়োজন ত একা আপনারই নয় চৌধুরী-মশায়। আমারও ত থাকতে পারে।

জীবানন্দ। পারে বই কি।

ষোড়শী। তা হলে সে নাম আপনি শুনতে পাবেন না। কারণ, আমার ও আপনার একই সঙ্গে রক্ষা পাবার উপায় নেই।

জীবানন্দ। বেশ, তা যদি না থাকে রক্ষা পাওয়াটা আমারই দরকার এবং তাতে লেশমাত্র ত্রুটি হবে না জেনো।

ষোড়শী নিরন্তর

তুমি জবাব না দিতে পারো, কিন্তু তোমার এই বীর পুরুষটির নাম যে আমি জানি নে তা নয়।

ষোড়শী। জানবেন বই কি। পৃথিবীর বীর পুরুষদের মধ্যে পরিচয় থাকবারই ত কথা।

জীবানন্দ। সে ঠিক। কিন্তু এই কাপুরুষকে বারবার অপমান করবার ভারটা তোমার বীরপুরুষটি সহিতে পারলে হয়। যাক্, এ চিঠি ছিঁড়লে কেন?

ষোড়শী। এর জবাব আমি দেব না।

জীবানন্দ। কিন্তু সোজা নির্মল সাহেবকে না লিখে তাঁর স্ত্রীকে লেখা কেন! এ শব্দভেদী বাণ কি তাঁরই শেখানো না কি?

ষোড়শী। তার পরে?

জীবানন্দ । তার পরে আজ আমার সন্দেহ গেল । বন্ধুর সম্বাদ আমি অপরের কাছে শুনেছি, কিন্তু রায়মণ্যকে যতই প্রশ্ন করেছি, ততই তিনি চুপ করে গেলেন । আজ বোঝা গেল তাঁর আক্রোশটাই সবচেয়ে কেন বেশি ।

ঘোড়শী । ( সচকিতে ) নিশ্চলের সম্বন্ধে আপনি কি শুনেছেন ?

জীবানন্দ । সমস্তই । তোমার চমক আর গলার মিঠে আওয়াজে আমার হাসি পাওয়া উচিত ছিল, কিন্তু হাসতে পারলাম না—আমার আনন্দ করবার এ কথা নয় । সেই ঝড় জল অন্ধকার রাত্রে একাকী তার হাত ধরে বাড়ী পৌছে দেওয়া মনে পড়ে ? তার সাক্ষী আছে । সাক্ষী ব্যাটারা যে কোথায় লুকিয়ে থাকে আগে থেকে কিছুই জানবার ঘো নেই । আমি যখন গাড়ী থেকে ব্যাগ নিয়ে পালাই ভেবেছিলাম কেউ দেখে নি ।

ঘোড়শী । যদি সত্যই তাই করে থাকি সে কি এত বড় দোষের ?

জীবানন্দ । কিন্তু গোপন করার চেষ্টাটা ? এই চিঠির টুকরোটা ? নিজেই একবার পড়ে দেখ ত কি মনে হয় ? আমার মত ইনিও একবার তোমার বিচার করতে বসেছিলেন না ? দেখছি, তোমার বিচার করবার বিপদ আছে ।

এই বলিয়া জীবানন্দ মুচকিয়া হাসিল

ঘোড়শী নিরন্তর

এ আমি সঙ্গে নিয়ে চললাম, আবশ্যক হলে যথাস্থানে পৌছে দেবার ক্রটি হবে না । এই ক'টা ছত্র আমার পুরুষের চোথকেই যখন ফাঁকি দিতে পারে নি, তখন আশা করি হৈমকেও ঠকাতে পারবে না ।

ঘোড়শী নিরন্তর

জীবানন্দ । কেমন অনেক কথাই জানি ? .

ষোড়শী । হাঁ ।

জীবানন্দ । এ সব তবে সত্যি বল ?

ষোড়শী । হাঁ, সত্যি ।

জীবানন্দ । ( আহত হইয়া ) ওঃ—সত্যি ! ( স্তিমিত দীপ শিখাটা উজ্জল করিয়া দিয়া ষোড়শীর মুখের প্রতি তীক্ষ্ণ চক্ষে চাহিয়া ) এখন তা হ'লে তুমি কি করবে মনে কর ?

ষোড়শী । কি আমাকে আপনি করতে বলেন ?

জীবানন্দ । তোমাকে ? ( ক্ষণকাল স্তব্ধ থাকিয়া, দীপ শিখা পুনরায় উজ্জল করিয়া দিয়া ) তা হ'লে এঁরা সকলে যে তোমাকে অসতী ব'লে—

ষোড়শী । এঁদের বিরুদ্ধে আপনার কাছে ত আমি নালিশ জানাই নি । আমাকে কি করতে হবে তাই বলুন । কারণ দেখাবার প্রয়োজন নেই ।

জীবানন্দ । তা বটে । কিন্তু সবাই মিথ্যা কথা বলে আর তুমি একাই সত্যবাদী এই কি আমাকে তুমি বোঝাতে চাও অলকা ?

ষোড়শী নিরুত্তর

একটা উত্তর দিতেও চাও না ।

ষোড়শী । ( মাথা নাড়িয়া ) না ।

জীবানন্দ । অর্থাৎ আমার কাছে কৈফিয়ৎ দেওয়ার চেয়ে দুর্নামও ভাল । বেশ, সমস্তই স্পষ্ট বোঝা গেছে !

এই বলিয়া সে ব্যঙ্গ করিয়া হাসিল



ষোড়শী। স্পষ্ট বোঝা যাবার পরে কি করতে হবে তাই শুধু বলুন !

তাহার এই উত্তরে জীবানন্দের ক্রোধ ও অধৈর্য্য শতগুণে বাড়িয়া গেল

জীবানন্দ। কি করতে হবে সে তুমি জানো, কিন্তু আমাকে দেব মন্দিরের পবিত্রতা বাঁচাতেই হবে। এর যথার্থ অভিভাবক তুমি নয়, আমি। পূর্বে কি হ'ত জানি নে, কিন্তু এখন থেকে ভৈরবীকে ভৈরবীর মতই থাকতে হবে, না হয় তাকে যেতে হবে।

ষোড়শী। বেশ তাই হবে। যথার্থ অভিভাবক কে সে নিয়ে আমি বিবাদ করব না। আপনারা যদি মনে করেন আমি গেলে মন্দিরের ভালো হবে আমি যাবো।

জীবানন্দ। তুমি যে যাবে সে ঠিক। কারণ, যাতে যাও সে আমি দেখব।

ষোড়শী। কেন রাগ করছেন, আমি ত সত্যিই যেতে চাচ্ছি। কিন্তু আপনার ওপর এই ভার রইল যেন মন্দিরের যথার্থই ভাল হয়।

জীবানন্দ। কবে যাবে ?

ষোড়শী। যখনই আদেশ করবেন। কাল, আজ, এখন—

জীবানন্দ। কিন্তু নির্মলবাবু ? জামাই সাহেব ?

ষোড়শী। ( কাতর কণ্ঠে ) তাঁর নাম আর করবেন না।

জীবানন্দ। আমার মুখে তাঁর নামটা পর্য্যন্ত তোমার সহ্য হয় না। ভাল। কিন্তু কি তোমাকে দিতে হবে ?

ষোড়শী। কিছুই না।

জীবানন্দ। এ ঘরখানা পর্য্যন্ত ছাড়তে হবে জানো ? এও দেবীর।

ষোড়শী। জানি। যদি পারি, কালই ছেড়ে দেব।

জীবানন্দ। কোথায় যাবে ঠিক করেছ ?

ষোড়শী । এখানে থাকব না এর বেশি কিছুই ঠিক করি নি । একদিন কিছু না জেনেই আমি ভৈরবী হয়েছিলাম, আজ বিদায় নেবার বেলাতেও এর বেশি ভাবব না । আপনি দেশের জমিদার, চণ্ডীগড়ের ভালমন্দের ভার আপনার পরে রেখে যেতে শেষ সময়ে আর আমি দ্বিধা করব না । কিন্তু আমার বাবা ভারি দুর্বল, তাঁর উপরে নির্ভর করে যেন আপনি নিশ্চিন্ত হবেন না !

জীবানন্দ । তুমি কি সত্যিই চলে যেতে চাও না কি ।

ষোড়শী । আর আমার দুঃখী দরিদ্র ভূমিজ প্রজারা । একদিন তাদেরই সমস্ত ছিল—আজ তাদের মত নিঃস্ব নিরুপায় আর কেউ নেই । ডাকাত বলে বিনা দোষে লোকে তাদের জেলে দিয়েছে । এদের সুখ দুঃখের ভারও আমি আপনাকেই দিয়ে গেলাম ।

জীবানন্দ । আচ্ছা, তা হবে হবে । কি তারা চায় বল ত ?

ষোড়শী । সে তারাই আপনাকে জানাবে ।

এই বলিয়া সে সহসা জানালা দিয়া বাহিরের দিকে চাহিয়া  
দড়ির আলনা হইতে গামছা ও কাপড় হাতে লইল

ষোড়শী । আমার স্নান করতে যাবার সময় হল ।

জীবানন্দ । স্নানের সময় ? এই রাত্রে ?

ষোড়শী । রাত আর নেই—এবার আপনি বাড়ী যান ।

এই বলিয়া সে যাইতে উদ্যত হইল

জীবানন্দ । ( ব্যগ্র কণ্ঠে ) কিন্তু আমার সকল কথাই যে বাকি রয়ে  
গেল ?

ষোড়শী । থাক আপনি বাড়ী যান ।

জীবানন্দ । না । কোথায় যেন আমার মস্ত ভুল হয়ে গেছে অলকা,  
কথা আমার শেষ না হওয়া পর্য্যন্ত আমি—

ষোড়শী । না সে হবে না, আপনি বাড়ী যান্ । আমার বহু ক্ষতিই  
করেছেন, এ জীবনের শেষ সর্বনাশ করতে আর আপনাকে দেব না ।

জীবানন্দ । আচ্ছা, আমি চল্লাম অলকা !

প্রস্থান

## দ্বিতীয় দৃশ্য

চণ্ডীগড় গ্রাম—গাঙ্গনের সং

গীত ( ১ )

বড় প্যাঁচে পড়েছে এবার ভোলা দিগম্বর ।  
অভিমানী উমারাগী বলে নি তায় প্রাণেশ্বর ॥  
অনেক দিনের পরে এবার এল স্বপ্নের বাড়ী ।  
ভেবেছিল আসবে গৌরী পরে পাটের শাড়ী ॥  
চাঁদ বদনে কইবে কথা  
বুচবে ভোলায় প্রাণের ব্যথা  
কোন কথা না বলে সে পালিয়ে এল ছেড়ে ঘর ।  
ভাবের ঘোরে ছিল অচেতন  
ভেবে চিন্তে পেল নাকো হ'ল এ কেমন—  
এবার শাস্ত শিষ্ট গৃহবাসী  
করবে তোমায় হে সন্ন্যাসী  
জটা বাকল ছাড়িয়ে নিয়ে সাজিয়ে দেবে প্রেমের বর ॥

গীত ( ২ )

বৌ নিতে এসেছে এবার আপনি মহেশ্বর ।

তুই নাকি সহ বলেছিলি

করবি না আর স্বামীর ঘর ॥

পাঁচ বছরে ক'রে পঞ্চতপা,

তোর হাতে তোর মা জননী সঁপেছেন ক্ষাপা

বাঁধতে যদি পারিস্ নি তায়

তাই বলে কি হবে সে পর ?

( তাই বলে পর হয়ে কি যায় )

একবার নাকি গিয়েছিল কুচুনী পাড়ায়

সত্যি কথা তোর কাছে সহ যদিই সে ভাঁড়ায় ।

ফেলার জিনিস নয় তো সে তোর বোন

ধুয়ে পুঁছে তুলগে যা তারে ঘর ॥

তৃতীয় দৃশ্য

ষোড়শীর কুটার

নির্মলের প্রবেশ

ষোড়শী । এ কি, এই রাত্রে শেষে অকস্মাৎ আপনি যে নির্মলবাবু ?

নির্মল নিরন্তর

( হাসিয়া ) ওঃ—বুঝেচি । যাবার পূর্বে লুকিয়ে বুঝি একবার দেখে  
যেতে এলেন ?

নির্মল । আপনি কি অন্তর্যামী ?

ষোড়শী। তা নইলে, কি ভৈরবী-গিরি করা যায় নিশ্চলবাবু? কিন্তু এখানটায় তেমন আলো নেই, আশুন, আমার ঘরের মধ্যে গিয়ে বসবেন চলুন।

নিশ্চল। রাত্রে একাকী আমাকে ঘরের মধ্যে নিয়ে যেতে চান, আপনার সাহস ত কম নয়?

ষোড়শী। আর সে রাত্রে অন্ধকারে যখন হাত ধরে নদী মাঠ পার করে এনেছিলাম তখন কি ভয়ের লক্ষণ দেখতে পেয়েছিলেন না কি? সেদিনও ত এমনি একাকী।

নিশ্চল। সত্যি আপনার সাহসের অবধি নেই।

ষোড়শী। অবধি থাকবে কি ক'রে নিশ্চলবাবু, ভৈরবী যে! আশুন ঘরে!

নিশ্চল। না, ঘরে আর যাবো না, আমাকে এখনি ফিরতে হবে।

ষোড়শী। তবে এইখানেই বসুন।

উভয়ের উপবেশন

ষোড়শী। আজ তা হলে চলে যাওয়াই স্থির?

নিশ্চল। না, আজ যাওয়া স্থগিত রইল। রাত্রে ফিরে গিয়ে গুন্ডে পেলাম আজ সন্ধ্যা-বেলায় মন্দিরের মধ্যে আপনার বিচার হবে। সে সভায় আমি উপস্থিত থাকতে চাই।

ষোড়শী। কিসের জন্তে? নিছক কৌতুহল, না আমাকে রক্ষা করতে চান?

নিশ্চল। প্রাণপণে চেষ্টা করব বটে।

ষোড়শী। যদি, ক্ষতি হয়, কষ্ট হয়, ঋণের সঙ্গে বিচ্ছেদ হয় তবুও?

নির্মল। হাঁ, তবুও।

ষোড়শী হাসিয়া ফেলিল

( হাসিমুখে ) আপনি হাসলেন যে বড় ? বিশ্বাস হয় না ?

ষোড়শী। হয়। কিন্তু হাস্টি আর একটা কথা ভেবে। শুনি, আগেকার দিনে ভৈরবীরা না কি বিদেশী মানুষদের ভেড়া বানিয়ে রাখতো, আচ্ছা,, ভেড়া নিয়ে তারা কি কস্তু নির্মলবাবু ? চরিয়ে বেড়াতো না লড়াই বাধিয়ে দিয়ে তামাসা দেখতো ?

বলিতে বলিতে ছেলেমানুষের মত উচ্ছ্বসিত হইয়া হাসিতে লাগিল

নির্মল। ( পরিহাসে যোগ দিয়া, নিজেও হাসিয়া ) হয় ত বা মাঝে মাঝে মায়ের স্থানে বলি দিয়ে খেতো।

ষোড়শী। সে ত ভয়ের কথা নির্মলবাবু।

নির্মল। ( সহাস্ত্রে মাথা নাড়িয়া ) ভয় একটু আছে বই কি।

ষোড়শী। একটু থাকা ভাল। হৈমকেও সাবধান করে দেওয়া উচিত।

নির্মল। তার মানে ?

ষোড়শী। মানে কি সব কথারই থাকে না কি ? ( হাসিয়া ) কুটুমের অভ্যর্থনা ত হ'ল। অবশ্য হাসি-খুসি দিয়ে যতটুকু পারি ততটুকু—তার বেশি ত সম্বল নেই ভাই—এখন আসুন দুটো কাজের কথা কওয়া যাক।

নির্মল। বলুন ?

ষোড়শী। ( গভীর হইয়া ) দু'টি লোক দেবতাকে বঞ্চিত করতে চায়। একটি রায়মশায়, আর একটি জমিদার—

নির্মল। আর একটি আপনার বাবা।

ষোড়শী। বাবা? হাঁ, তিনিও বটে!

নির্মল। আমার স্বপ্নের কথা বুঝি, আপনার বাবার কথাও কতক বুঝতে পারি, কিন্তু পারি নে এই জমিদার প্রভুটাকে বুঝতে। তিনি কিসের জন্ত আপনার শত্রুতা করছেন?

ষোড়শী। দেবীর অনেকখানি জমি তিনি নিজের বলে বিক্রী করে ফেলে চান। কিন্তু আমি থাকতে ত সে কোন মতেই হবার ঘো নেই।

নির্মল। (সহাস্ত্রে) সে আমি সামলাতে পারবো।

ষোড়শী। কিন্তু আরও অনেক জিনিস আছে, যা আপনিও হয় ত সামলাতে পারবেন না।

নির্মল। কি সে সব? একটা ত আপনার মিথ্যে দুর্নাম?

ষোড়শী। (শাস্ত্র স্বরে) সে আমি ভাবি নে। দুর্নাম সত্য হোক মিথ্যে হোক, তাই নিয়েই ত ভৈরবীর জীবন নির্মলবারু। আমি এই কথাটাই তাঁদের বলতে চাই।

নির্মল। (সবিস্ময়ে) নিজের মুখ দিয়ে এ কথা যে স্বীকার করার সমান!

ষোড়শী। তা হবে।

নির্মল। কিন্তু ওরা যে বলে—অনেকেই বলে সে সময়ে, অর্থাৎ ম্যাজিস্ট্রেটের আসার রাত্রে আপনার কোলের উপরেই নাকি—

ষোড়শী। তারা কি দেখেছিল না কি? তা হবে, আমার ঠিক মনে নেই; যদি দেখে থাকে সে সত্যি। তাঁর সেদিন তারি অসুখ, আমার কোলে মাথা রেখেই তিনি শুয়েছিলেন।

নির্মল। (ক্লণকাল গুরুভাবে থাকিয়া) তার পরে?

ষোড়শী। কোন মতে দিন কেটে যাচ্ছে, কিন্তু সেদিন থেকেই কিছুতে আর মন বসাতে পারি নে, সবই যেন মিথ্যে বলে ঠেকেছে।

নির্মল। কি মিথ্যে ?

ষোড়শী। সব। ধর্ম, কর্ম, ব্রত, উপবাস, দেবসেবা, এতদিনের যা কিছু সমস্তই—

নির্মল। তবে কিসের জন্তে ভৈরবীর আসন রাখতে চান ?

ষোড়শী। এমনিই। আর আপনি যদি বলেন এতে কাজ নেই—

নির্মল। না না, আমি কিছু বলি নে। কিন্তু এখন আমি উঠলাম। আপনার হয় ত কত কাজ নষ্ট করলাম।

ষোড়শী। কুটুম্বের অভ্যর্থনা, বন্ধুর মর্যাদা রক্ষা করা, এ কি কাজ নয় নির্মলবাবু ?

নির্মল। সকাল হ'ল, এখন আসি ?

ষোড়শী। আসুন। আমারও জ্ঞানের সময় উত্তীর্ণ হয়ে যায়, আমিও চললাম।

উভয়ের প্রস্থান

সাগর সর্দার ও ফকির সাহেবের প্রবেশ

সাগর। না, এ চলবে না—কোনমতেই চলবে না ফকির সাহেব। মা নাকি বলেচেন সমস্ত ত্যাগ করে যাবেন। আপনাকে বল্চি এ চলবে না।

ফকির। কেন চলবে না সাগর ?

সাগর। তা জানি নে। কিন্তু যাওয়া চলবে না। গেলে আমরা তাঁর দীন দুঃখী প্রজারা সব থাকবো কোথায় ? বাঁচবো কি করে ?



ফকির। কিন্তু তোমরা কি শোন নি ষোড়শী কত বড় লজ্জা এবং  
স্বর্ণায় সমস্ত ত্যাগ করে যাচ্ছেন ?

সাগর। শুনেচি। তাই আরও দশজনের মত আমরাও ভেবে  
পাই নি কিসের জন্তু মা সাহেবের হাত থেকে সে রাত্রে জমিদারকে  
বাঁচাতে গেলেন।

ক্ষণকাল স্তব্ধভাবে থাকিয়া

ভেবে নাই পেলাম ফকির সাহেব, কিন্তু এটুকু ত ভেবে পেয়েছি  
যাকে মা বলে ডেকেছি সন্তান হয়ে আমরা তাঁর বিচার করতে  
যাবো না।

ফকির। তোমরা জনকতক বিচার না করলেই কি চণ্ডীগড়ে তার  
বিচার করবার মাহুষের অভাব হবে সাগর ?

সাগর। কিন্তু তারাই কি মাহুষ ? আমরা তাঁর ছেলে—আমাদের  
অন্তরের বিশ্বাসের চেয়ে কি তাদের বাইরের বিচারটাই বড় হবে ফকির  
সাহেব ? তাদের কি আমরা চিনি নে ? একদিন যখন আমাদের সর্বস্ব  
কেড়ে নিলে তারা, সেও যেমন সত্যি-পাণ্ডনার দাবিতে, আবার জেলে  
যখন দিলে সেও তেমনি সত্যি-সাক্ষীর জোরে !

ফকির। সে আমি জানি।

সাগর। কিন্তু সব কথা ত জান না। খুড়ো ভাইপোয় জেল খেটে  
ফিরে এসে দাঁড়ালাম। বললাম, মা, আমরা যে মরি। মা রাগ করে  
বল্লেন, তোরা ডাকাত, তোদের মরাই ভাল। অভিমানে ঘরে ফিরে  
গেলাম। খুড়ো বল্লে, ভগবান ! গরীবকে বিশ্বাস করতে কেউ নেই।  
পরের দিন সকাল-বেলা মা আমাদের ডেকে পাঠিয়ে বল্লেন, তোদের  
কাছে আমি মন্ত অপরাধ করেছি বাবা, আমাকে তোরা ক্ষমা কন।

তোদের কেউ বিশ্বাস না করুক আমি বিশ্বাস করব। এখনো বিধে কুড়ি জমি আমার আছে, তাই তোরা ভাগ করে নে। চণ্ডীর খাজনা তোরা যা ইচ্ছে দিস, কিন্তু অসৎপথে কখনো পা দিবি নে এই আমার সৰ্ত্ত।

ফকির। কিন্তু লোকে যে বলে—

সাগর। বলুক। কিন্তু মা জান্লেই হ'ল সে বিশ্বাস আমরা কখনো ভাঙি নি। জানো ফকির সাহেব, আমাদের জন্মেই এককড়ি তাঁর শত্রু, আমাদের জন্মেই রায়মশায় তাঁর ছুষমন। অথচ, তারা জানেও না কার দয়ায় আজও তারা বেঁচে আছে।

ফকির। কিন্তু আমাকে তোরা ধরে আনলি কেন ?

সাগর। কেন ? শুনেছি, মুসলমান হয়েও তুমি তাঁর গুরুর চেয়ে বড়। তোমার নিষেধ ছাড়া মাকে কেউ আটকাতে পারবে না।

ফকির। কিন্তু এত বড় অগ্রায় নিষেধ আমি কিসের জন্তে করব সাগর ?

সাগর। করবে মাহুষের ভালর জন্তে।

ফকির। কিন্তু ষোড়শী ঘরে নেই। বেলা যায়, আমিও ত আর অপেক্ষা করতে পারি নে। এখন আমি চললুম।

সাগর। পারবে না থাকতে ? করবে না নিষেধ ? কিন্তু ফল তার ভাল হবে না।

ফকির। এ সব কথা মুখেও এনো না সাগর।

সাগর। মাও বলেন ও কথা মুখে আনিস নে সাগর। বেশ মুখে আর আনব না—আমাদের মনের মধ্যেই থাক।

সাগর। সন্ন্যাসী ফকির তুমি জানো না ডাকাতের বৃকের জালা।  
আমাদের সব গেছে, এর ওপার মাও যদি ছেড়ে যায় আমরা বাকি কিছুই  
রাখব না।

প্রস্থান

নির্মল ও ষোড়শীর প্রবেশ

ষোড়শী। ডেকে নিয়ে এলাম সাথে? ছি, ছি, কি দাঁড়িয়ে যা তা  
স্তুনছিলেন বলুন ত! দেবীর মন্দিরে, তার উঠনের মাঝখানে জটলা করে  
কতকগুলো কাপুরুষে ধিলে বিচারের ছলনায় দুজন অসহায় স্ত্রীলোকের  
কুৎসা রটনা করচে—তাও আবার একজন মৃত, আর একজন অল্প-  
পস্থিত। আত্মন আমার ঘরে।

দুয়ারে আসন পাতা ছিল, নির্মলকে সমাদর করিয়া তাহাতে

বসাইয়া ষোড়শী নিজে অদূরে উপবেশন করিল

ষোড়শী। আপনি না কি বলেছেন আমার মামলা মকদ্দমার সমস্ত  
ভার নেবেন। একি সত্যি।

নির্মল। হাঁ, সত্যি।

ষোড়শী। কিন্তু কেন নেবেন?

নির্মল। বোধ হয় আপনার প্রতি অত্যাচার হচ্ছে বলে।

ষোড়শী। কিন্তু আর কিছু বোধ করেন না ত? (এই বলিয়া সে  
মুচকিয়া হাসিল) থাক, সব কথাই যে জবাব দিতেই হবে এমন কিছু  
শাস্ত্রের অনুশাসন নেই। বিশেষ করে এই কুট-কচালে শাস্ত্রের, না?  
আচ্ছা সে যাক। মকদ্দমার ভার যেন নিলেন, কিন্তু যদি হারি তখন  
ভার কে নেবে? তখন পেছোবেন না ত?

নির্মল। না, তখনও না।

ষোড়শী। ইন্! পরোপকারের কি ঘট! (হাসিয়া) আমি কিন্তু হৈম হলে এই সব পরোপকার রুত্তি শ্রুতিয়ে দিতাম। অত ভাল মানুষই নই—আমার কাছে ফাঁকি চলত না। রাত্রি-দিন চোখে চোখে রেখে দিতাম।

নির্মল। (বিস্ময়ে, ভয়ে, আনন্দে) চোখে চোখে রাখলেই কি রাখা যায় ষোড়শী? এর বাঁধন যেখানে সুরু হয় চোখের দৃষ্টি যে সেখানে পৌঁছায় না, একথা কি আজও জানতে পারো নি তুমি।

ষোড়শী। গেরেছি বই কি! (হাসিল; বাহিরের শব্দ শুনিয়া গলা বাড়াইয়া চাহিয়া) এই যে ইনি এসেছেন।

নির্মল। কে? ফকির সাহেব?

ষোড়শী। না, জমিদারবাবু। বলেছিলাম সভা ভাঙলে যাবার পথে আমার কুঁড়েতে একবার একটু পদধূলি দিতে। তাই দিতেই বোধ হয় আসছেন।

নির্মল। (বিরক্তি ও সঙ্কোচে আড়ষ্ট হইয়া) তা হলে আপনি আমাকে এ কথা বলেন নি কেন?

ষোড়শী। বেশ! একবার ‘তুমি’ একবার ‘আপনি’! (হাসিয়া) ভয় নেই, উনি ভারি ভদ্রলোক; লড়াই করেন না। তা ছাড়া আপনাদের পরিচয় নেই; সেটাও একটা লাভ। (দ্বারের নিকটে অগ্রসর হইয়া অভ্যর্থনা করিয়া) আসুন।

জীবানন্দ। (প্রবেশ করিয়াই থমকিয়া দাঁড়াইয়া) ইনি? নির্মল-বাবু বোধ হয়?

ষোড়শী। হাঁ, আপনার বন্ধু বলে পরিচয় দিলে খুব সম্ভব অতি-শয়োক্তি হবে না।

জীবানন্দ । ( হাসিয়া ) বিলক্ষণ ! বন্ধু নয় ত কি ? ঠুঁদের  
কুপাতেই ত টিকে আছি, নইলে আমার জমিদারি পাওয়া পর্য্যন্ত যে সব  
কীর্ত্তি করা গেছে তাতে চণ্ডীগড়ের শান্তিকুঞ্জের বদলে ত এতদিন আন্দা-  
মানের শ্রীঘরে গিয়ে বসবাস করতে হ'ত !

ষোড়শী । চৌধুরীমশাই, উকিল-ব্যারিষ্টার বড়লোক বলে বাহবাটা  
কি একা ঠুঁরাই পাবেন । আন্দামান প্রভৃতি বড় ব্যাপারে না হোক,  
কিন্তু ছোট বলে এদেশের শ্রীঘরগুলোও ত মনোরম স্থান নয়—ছুঃখী বলে  
ভৈরবীরা কি একটু ধন্যবাদ পেতেও পারে না ?

জীবানন্দ । ( অপ্রস্তুত হইয়া ) ধন্যবাদ পাবার সময় হলই পাবে ।

ষোড়শী । ( হাসিয়া ) এই যেমন সভায় দাঁড়িয়ে এই মাত্র এক  
দফা দিয়ে এলেন ?

জীবানন্দ স্তব্ধ হইয়া রহিল

ষোড়শী । নিশ্চলবাবু না থাকলে আজ আপনার সঙ্গে আমি ভারি  
ঝগড়া করতাম । ছি—এ কি কোন পুরুষের পক্ষেই সাজে ? তা ছাড়া  
কি প্রয়োজন ছিল বলুন ত ? সে দিন এই ঘরে বসেই ত আপনাকে  
বলেছিলাম, আপনি আমাকে যা আদেশ করবেন আমি পালন করব ।  
আপনিও আপনার হুকুম স্পষ্ট করেই জানিয়েছিলেন । এই নিন  
সিন্দূকের চাবি এবং নিন হিসাবের খাতা । ( অঞ্চল হইতে সিন্দূকের  
চাবি খুলিয়া এবং তাকের উপর হইতে একখানা খেরো বাঁধানো মোটা  
খাতা পাড়িয়া জীবানন্দের পায়ের কাছে রাখিয়া দিল )—মায়ের যা কিছু  
অলঙ্কার, যত কিছু দলিলপত্র সিন্দূকের ভিতরেই পাবেন, এবং আর  
একখানা কাগজ ঐ খাতার মধ্যে পাবেন, যাতে ভৈরবীর সকল দায়িত্ব  
ও কর্তব্য ত্যাগ করে আমি সই করে দিয়েছি ।

জীবানন্দ। (অবিস্বাস করিয়া) বল কি! কিন্তু ত্যাগ করলে কার কাছে?

ষোড়শী। তাতেই লেখা আছে দেখতে পাবেন।

জীবানন্দ। তাই যদি হয় ত এই চাবিগুলো তাঁকেই দিলে না কেন?

ষোড়শী। তাঁকেই যে দিলাম।

জীবানন্দ। (মলিন মুখে ও সন্দেহ কণ্ঠে) কিন্তু এতো আমি নিতে পারি নে ষোড়শী। খাতায় লেখা নামগুলোর সঙ্গে সিন্দূকে রাখা জিনিস-গুলোও যে এক হবে, সে আমি কি করে বিশ্বাস করব? তোমার আবশ্যক থাকে তুমি পাঁচজনের কাছে বুঝিয়ে দিয়ো।

ষোড়শী। (ঘাড় নাড়িয়া) আমার সে আবশ্যক নেই। কিন্তু চৌধুরীমশায়, আপনার এ অজুহাতও অচল। চোখ বুজে যার হাত থেকে বিষ নিয়ে খাবার ভরসা হয়েছিল, তার হাত থেকে আজ চাবিটুকু নেবার সাহস নেই, এ আমি মানি নে। নিন্, ধরুন।

খাতা ও চাবি তুলিয়া জীবানন্দের হাতের মধ্যে একরকম

জোর করিয়া গুঁজিয়া দিল

আজ আমি বাঁচলাম। (কোমল কণ্ঠস্বরে) আর একটিমাত্র ভার আপনাকে দিয়ে যাবো, সে আমার গরীব দুঃখী প্রজাদের ভবিষ্যৎ। আমি শত ইচ্ছে করেও তাদের ভাল করতে পারি নি—আপনি অনায়াসে পারবেন। (নির্মলের প্রতি) আমার কথাবার্তা শুনে আপনি আশ্চর্য হয়ে গেছেন, না নির্মলবাবু?

নির্মল। (মাথা নাড়িয়া) শুধু আশ্চর্য নয়, আমি প্রায় অভিভূত হয়ে পড়েছি। ভৈরবীর আসন ত্যাগ করে যে আপনি ইতিমধ্যে

ছাড়পত্র পর্য্যন্ত সহ করে রেখেছেন, এ খবর ত আমাকে যুগাগ্রে জানানু নি ?

ষোড়শী। আমার অনেক কথাই আপনাকে জানানো হয় নি, কিন্তু একদিন হয় ত সমস্তই জানতে পারবেন। কেবল একটিমাত্র মানুষ সংসারে আছেন, ষাঁকে সকল কথাই জানিয়েছি, সে আমার ফকির সাহেব।

নির্মল। এ সকল পরামর্শ বোধ করি তিনিই দিয়েছেন ?

ষোড়শী। না, তিনি এখন পর্য্যন্ত কিছুই জানেন নি, এবং ওই যাকে ছাড়পত্র বলছেন সে আমার একটু আগের রচনা। যিনি একাজে আমাকে প্রবৃত্তি দিয়েছেন, শুধু তাঁর নামটিই আমি সংসারে সকলের কাছে গোপন রাখবো।

জীবানন্দ। মনে হচ্ছে যেন ডেকে এনে আমার সঙ্গে কি একটা প্রকাণ্ড তামাসা করচ ষোড়শী। এ বিশ্বাস করা যেন সেই “মরফিয়া” খাওয়ার চেয়েও শক্ত ঠেক্চে।

নির্মল। (হাসিয়া জীবানন্দের প্রতি চাহিয়া) আপনি তবু এই কয়েক পা মাত্র হেঁটে এসে তামাসা দেখছেন, কিন্তু আমাকে কাজ-কর্ম, বাড়ী-ঘর ফেলে রেখে এই তামাসা দেখতে হচ্ছে। আর এ যদি সত্য হয় ত আপনি যা চেয়েছিলেন সেটা অন্ততঃ পেয়ে গেলেন কিন্তু আমার ভাগ্যে ষোল আনাই লোকসান। (ষোড়শীকে) বাস্তবিক এ সকল ত আপনার পরিহাস নয় ?

ষোড়শী। না নির্মলবাবু, আমার এবং আমার মায়ের কুৎসায় দেশ ছেয়ে গেল, এই কি আমার হাসি তামাসার সময় ? আমি সত্য সত্যই অবসর নিলাম।

নির্মল। তা হলে বড় ছুঃখে পড়েই একাক্স আপনাকে করতে হ'ল। আমি আপনাকে বাঁচাতেও হয় ত পারতাম, কিন্তু কেন যে তা হতে দিলেন না তা আমি বুঝেছি। বিষয় রক্ষা হ'ত, কিন্তু কুৎসার চেউ তাতে উত্তাল হয়ে উঠ'ত। সে থামাবার সাধ্য আমার ছিল না।

এই বলিয়া সে কটাক্ষে জীবানন্দের প্রতি চাহিল

নির্মল। এখন তা হলে কি করবেন স্থির করেছেন ?

ষোড়শী। সে আপনাকে আমি পরে জানানো।

নির্মল। কোথায় থাকবেন ?

ষোড়শী। এ খবরও আপনাকে আমি পরে দেবো।

নির্মল। ( হাতবড়ি দেখিয়া ) রাত প্রায় দশটা। আচ্ছা এখন আমি তা হলে—আমাকে আর বোধ হয় কোন আবশ্যক নেই ?

ষোড়শী। এত বড় অহঙ্কারের কথা কি বলতে পারি নির্মলবাবু ? তবে মন্দির নিয়ে আর বোধ হয় আমার কখনো আপনাকে ছুঃখ দেবার প্রয়োজন হবে না।

নির্মল। আমাদের শিষ্য ভুলে যাবেন আশা করি।

ষোড়শী। ( মাথা নাড়িয়া ) না।

নির্মল। হৈম আপনাকে বড় ভালবাসে। যদি অবকাশ পান মাঝে মাঝে একটা খবর দেবেন।

নির্মল প্রস্থান করিল

জীবানন্দ। ভদ্র লোকটিকে ঠিক বুঝতে পারলাম না।

ষোড়শী। না পারলেও আপনার ক্ষতি হবে না।

জীবানন্দ। আমার না হোক তোমার ত হ'তে পারে। মনে রাখবার জন্তে কি ব্যাকুল প্রার্থনাই জানিয়ে গেলেন।



ষোড়শী। সে শুনেছি, কিন্তু আমি তাঁকে যতখানি জানি তার অর্ধেকও আমাকে জান্লে আজ এতবড় বাহুল্য আবেদন তাঁর করতে হ'ত না।

জীবানন্দ। অর্থাৎ ?

ষোড়শী। অর্থাৎ এই যে চণ্ডীগড়ের ভৈরবী পদ অনায়াসে জীর্ণ বস্ত্রের মত ত্যাগ করে যাচ্ছি সে শিক্ষা কোথায় পেলাম জানেন ? গুঁদের কাছে। মেয়েমানুষের কাছে এ যে কত ফাঁকি, কত মিথ্যে সে বুঝেছি কেবল হৈমকে দেখে। অথচ এর বাপ্পও কোনদিন তাঁরা জানতে পারবেন না।

জীবানন্দ। তথাপি এ হেঁয়ালি হেঁয়ালিই রয়ে গেল অলকা। একটা কথা স্পষ্ট করে জিজ্ঞাসা করতে আমার ভারি লজ্জা করে, কিন্তু যদি পারতাম, তুমি কি তার সত্য জবাব দিতে পারতে ?

ষোড়শী। (সহাস্ত্রে) আপনি যদি কোন একটা আশ্চর্য্য কাজ করতে পারতেন, তখন আমিও তেমনি কোন একটা অদ্ভুত কাজ করতে পারতাম কি না, এ আমি জানি নে—কিন্তু আশ্চর্য্য কাজ করবার আপনার প্রয়োজন নেই—আমি বুঝেছি। অপবাদ সকলে মিলে দিয়েছে বলেই তাকে সত্য করে ভুলতে হবে তার অর্থ নেই। আমি কিছুই জ্ঞেই কখনো কারও আশ্রয় গ্রহণ করব না। আমার স্বামী আছেন, কোন লোভেই সে কথা আমি ভুলতে পারব না। এই ভয়ানক প্রশ্নটাই না আপনাকে লজ্জা দিচ্ছিল চৌধুরীমশাই ?

জীবানন্দ। তুমি আমাকে চৌধুরীমশাই বল কেন ?

ষোড়শী। তবে কি বলব ? ছদ্মুর ?

জীবানন্দ। না। 'অনেকে যা বলে ডাকে—জীবানন্দবাবু।

ষোড়শী। বেশ, ভবিষ্যতে তাই হবে। কিন্তু রাত্রি হয়ে যাচ্ছে  
আপনি বাড়ী গেলেন না? আপনার লোকজন কই?

জীবানন্দ। আমি তাদের পাঠিয়ে দিয়েছি।

ষোড়শী। একলা বাড়ী যেতে আপনার ভয় করবে না?

জীবানন্দ। না, আমার পিস্তল আছে।

ষোড়শী। তবে তাই নিয়ে বাড়ী যান, আমার চের কাজ  
আছে।

জীবানন্দ। তোমার থাকতে পারে, কিন্তু আমার নেই। আমি  
এখন যাবো না।

ষোড়শী। (প্রথর চোখে, অথচ শান্ত স্বরে) আমি লোক ডেকে  
আপনার সঙ্গে দিচ্ছি, তারা বাড়ী পর্যন্ত পৌঁছে দিয়ে আসবে।

জীবানন্দ। (অপ্রতিভ হইয়া) ডাকতে কাউকে হবে না, আমি  
আপনিই যাচ্ছি। যেতে আমার ইচ্ছে হয় না। তাই শুধু আমি  
বলছিলাম। তুমি কি সত্যই চণ্ডীগড় ছেড়ে চলে যাবে অলকা?

ষোড়শী। (ঘাড় নাড়িয়া) হাঁ।

জীবানন্দ। কবে যাবে?

ষোড়শী। কি জানি, হয় ত কালই যেতে পারি।

জীবানন্দ। কাল? কালই যেতে পারো? (একান্ত স্তব্ধ রহিয়া)  
আশ্চর্য! মানুষের নিজের মন বুঝতেই কি ভুল হয়। যাতে তুমি যাও  
সেই চেষ্টাই প্রাণপণে করেছি—অথচ তুমি চলে যাবে শুনে চোখের  
সামনে সমস্ত ছুনিয়াটা যেন শুকনো হয়ে গেল। তোমাকে তাড়াতে  
পারলে, ওই যে জমিটা দেনার দায়ে বিক্রী করেছি সে নিয়ে আর  
গোলমাল হবে না—কতকগুলো নগদ টাকাও হাতে এসে পড়বে, আর

—আর তোমাকে যা হুকুম করবো তাই তুমি করতে বাধ্য হবে, এই দিকটাই কেবল দেখতে পেয়েছি। কিন্তু আরও যে একটা দিক আছে, স্বেচ্ছায় তুমি সমস্ত ত্যাগ করে আমার মাথাতেই বোঝা চাপিয়ে দিলে সে ভার বহিতে পারবো কি না, এ কথা আমার স্বপ্নেও মনে হয় নি। আচ্ছা অলকা, এমন ত হতে পারে আমার মত তোমারও ভুল হচ্ছে—তুমিও নিজের মনের ঠিক খবরটি পাও নি! জবাব দাও না যে?

ষোড়শী। জবাব খুঁজে পাই নে। হঠাৎ বিস্ময় লাগে এ কি আপনার কথা!

জীবানন্দ। তবে এই কথাটা বল সেখানে তোমার চলবে কি ক'রে?

ষোড়শী। অত্যন্ত অনাবশ্যক কোতূহল চৌধুরীমশায়।

জীবানন্দ। তাই বটে, অলকা তাই বটে। আজ আমার আবশ্যক অনাবশ্যক তোমাকে বোঝাব আমি কি দিয়ে?

বাহিরে পূজারীর কাশি ও পায়ের শব্দ শুনা গেল। অতঃপর তিনি প্রবেশ করিলেন

পূজারী। মা, সকলের সম্মুখে মন্দিরের চাবিটা আমি তারাদাস ঠাকুরের হাতেই দিলাম। রায়মশায়, শিরোমণি—এঁরা, উপস্থিত ছিলেন।

ষোড়শী। ঠিকই হয়েছে। তুমি একটু দাঁড়াও আমি সাগরের ওখানে একবার যাবো।

জীবানন্দ। এগুলোও তা হলে তুমি রায়মশায়ের কাছে পাঠিয়ে দিয়ে।

ষোড়শী। না, সিন্দূকের চাবি আর কারও হাতে দিয়ে আমার বিশ্বাস হবে না।

জীবানন্দ । তবে কি বিশ্বাস হবে শুধু আমাকেই ?

ষোড়শী কোন উত্তর না দিয়া জীবানন্দের পায়ের কাছে গড় হইয়া প্রণাম করিল ।

উঠিয়া দাঁড়াইয়া বিশ্ময়ে অর্ভূত পূজারীকে কহিল

ষোড়শী । চল বাবা, আর দেরি ক'রো না ।

পূজারী । চল, মা চল ।

পূজারী ও ষোড়শী প্রস্থান করিলে একাকী জীবানন্দ সেই জনহীন

কুটার-অঙ্গনে স্তব্ধ হইয়া দাঁড়াইয়া রহিল

# তৃতীয় অঙ্ক

## প্রথম দৃশ্য

### নাট্যমন্দির

চণ্ডীর প্রাঙ্গণস্থিত নাট্যমন্দিরের একাংশ। সময়—অপরাহ্ন। উপস্থিত—

শিরোমণি, জনার্দন রায় এবং আরও দুই চারিজন গ্রামের ভদ্রবাস্তি

শিরোমণি। ( আশীর্বাদের ভঙ্গিতে ডানহাত তুলিয়া জনার্দনের প্রতি ) আশীর্বাদ করি দীর্ঘজীবী হও, ভায়া, সংসারে এসে বুদ্ধি ধরেছিলে বটে।

জনার্দন। ( হেঁট হইয়া পদধূলি লইয়া ) আজ এই নিয়ে নিশ্চলকে ছুটে তিরস্কার করতে হ'ল, শিরোমণিমশাই, মনটা তেমন ভাল নেই।

শিরোমণি। না থাক্‌বারই কথা। কিন্তু এ একপ্রকার ভালই হ'ল ভায়া। এখন বাবাজীর চৈতন্যোদয় হবে যে, শ্বশুর এবং পিতৃব্যস্থানীয়দের বিরুদ্ধাচরণ করার প্রত্যবায় আছে। আর, এ যে হতেই হবে। সর্ব-মঙ্গলময়ী চণ্ডীমাতার ইচ্ছা কি না।

প্রথম ভদ্রলোক। সমস্তই মায়ের ইচ্ছা। তা নইলে কি ষোড়শী ভৈরবী বিনা বাক্যব্যয়ে চলে যেতে চায় !

শিরোমণি। নিঃসন্দেহ। মন্দিরের চাবিটা ত পূজোরীর কাছ থেকে কোশলে আদায় হয়েছে, কিন্তু আসল চাবিটা গুন্‌চি নাকি গিয়ে পড়েছে জমিদারের হাতে। ব্যাটা পাঁড় মাতাল, দেখো ভায়া, শেষকালে মায়ের

সিন্দুকের সোণারূপো না ঢুকে যায় স্তম্ভের সিন্দুকে। পাপের আর অবধি থাকবে না।

জনার্দন। ঐটে খেয়াল করা হয় নি।

শিরোমণি। না, এখন সহজে দিলে হয়। দশদিন পরে হয় ত বলে বসবে, কই, কিছুই ত সিন্দুকে ছিল না! কিন্তু আমরা সবাই জানি ভায়া, ষোড়শী আর যাই কেন না করুক, মায়ের সম্পত্তি অপহরণ করবে না—একটি পাই পয়সা না।

অনেকেই এ কথা স্বীকার করিল

দ্বিতীয় ভদ্রলোক। এর চেয়ে বরঞ্চ সে-ই ছিল ভাল।

শিরোমণি। চাবিটা অবিলম্বে উদ্ধার করা চাই।

অনেকে। চাই চাই—অবিলম্বে চাই।

প্রথম ভদ্রলোক। আমি বলি, চলুন আমরা দল বেঁধে যাই জমিদারের কাছে। বলি গে, চাবিটা দিন, কি আছে না আছে মিলিয়ে দেখি।

দ্বিতীয় ভদ্রলোক। আমিও তাই বলি।

প্রথম ভদ্রলোক। কাল বেলা তৃতীয় প্রহরে—হুজুর ঘুমটি থেকে উঠে মদ খেতে বসেছেন, মেজাজ খুশ্ আছে—ঠিক এমনি সময়টিতে।

অনেকে। ঠিক ঠিক, এই ঠিক মতলব।

শিরোমণি। (সভয়ে) কিন্তু অত্যন্ত মতপান করে থাকলে যাওয়া সম্ভব হবে না। কি বল জনার্দন?

অকস্মাৎ ইহাদের মধ্যে একটা চাঞ্চল্য দেখা দিল। কে একজন কহিল, “স্বয়ং হুজুর আসছেন যে!” পরক্ষণেই জীবানন্দ ও প্রফুল্ল প্রবেশ করিলেন। যাহারা বসিয়া ছিল অভিযর্থনা করিতে উঠিয়া দাঁড়াইল। জীবানন্দ নাটমন্দিরের উত্তিমার সিঁড়ির উপরে বসিতে যাইতেছিলেন, সকলে সম্বরে বলিয়া উঠিল, “আসন, আসন, শিখ্র একটা আসন নিয়ে এস।”

জীবানন্দ । ( উপবেশন করিয়া ) আসনের প্রয়োজন নেই ।—দেবীর মন্দির, এর সর্ব্বত্রই ত আসন বিছানো ।

জনার্দন । তাতে আর সন্দেহ কি ! কিন্তু এ আপনারই যোগ্য কথা ।

প্রফুল্ল সিঁড়ির একাংশে গিয়া বসিল, এবং হাতে তাহার যে খবরের কাগজ-  
খানা ছিল তাহাই খুলিয়া নিঃশব্দে পড়িতে লাগিল

শিরোমণি । যাদৃশী ভাবনা যস্ত সিদ্ধির্ভবতি তাদৃশী । মেঘ না চাইতে জল । আজই দ্বিপ্রহরে আমরা হুজুরের কাছে যাবো স্থির করে-  
ছিলাম, কিন্তু পাছে নিদ্রার ব্যাঘাত হয় এই জন্তই—

জীবানন্দ । যান্ নি ? কিন্তু হুজুর ত দিনের বেলা নিদ্রা দেন না ।

শিরোমণি । কিন্তু আমরা যে শুনি হুজুর—

জীবানন্দ । শোনেন ? তা আপনারা অনেক কথা শোনেন, যা সত্য নয় এবং অনেক কথা বলেন, যা মিথ্যা । এই যেমন, আমার সম্বন্ধে ভৈরবীর কথাটা—

এই বলিয়া বস্তা হস্ত করিলেন, কিন্তু শ্রোতার দল খতমত

খাইয়া একেবারে মুসড়িয়া গেল

জনার্দন । মন্দির সংক্রান্ত গোলযোগ যে এত সহজে নিষ্পত্তি করতে পারা যাবে তা আশা ছিল না । নির্মূল যে রকম বঁকে দাঁড়িয়েছিল—

জীবানন্দ । তিনি সোজা হলেন কি প্রকারে ?

শিরোমণি । ( খুসি হইয়া সদর্পে ) সমস্তই মায়ের ইচ্ছা হুজুর, সোজা যে হতেই হবে । পাপের ভার তিনি আর বহিতে পারছিলেন না ।

জীবানন্দ । তাঁই হবে । তারপরে ?

শিরোমণি। কিন্তু পাপ ত দূর হ'ল, এখন বল না জনার্দন, হজুরকে সমস্ত বুঝিয়ে বল না।

জনার্দন। (চকিত হইয়া) মন্দিরের চাবি ত আমরা দাঁড়িয়ে থেকেই তারাদাস ঠাকুরকে দিয়েইচি। আজ তিনিই সকালে মায়ের দোর খুলেছেন, কিন্তু সিন্দুকের চাবিটা শুন্তে পেলাম ষোড়শী হজুরের হাতে সমর্পণ করেছে।

জীবানন্দ। তা করেছে। জমাখরচের খাতাও একখানা দিয়েছে।

শিরোমণি। বেটি এখনও আছে, কিন্তু কখন কোথায় চলে যায় সে ত বলা যায় না।

জীবানন্দ। (মুহূর্তকাল বৃদ্ধের মুখের প্রতি চাহিয়া) কিন্তু সে জ্ঞাপনাদের উদ্দেশ্য কিসের? তাকে তাড়ানোও ত চাই। কি বলেন রায়মশায়?

জনার্দন। দলিল-পত্র, মূল্যবান তৈজসাদি, দেবীর অলঙ্কার প্রভৃতি যা কিছু আছে গ্রামের প্রাচীন ব্যক্তির সমস্তই জানেন। শিরোমণি-মশায় বলছেন যে ষোড়শী থাকতে থাকতেই সেগুলো সব মিলিয়ে দেখলে ভাল হয়। হয় ত—

জীবানন্দ। হয় ত নেই? এই না? কিন্তু না থাকলেই বা আপনারা আদায় করবেন কি করে?

জনার্দন। (হঠাৎ উত্তর খুঁজিয়া পাইলেন না। শেষে বলিলেন) কি জানেন, তবু ত জানা যাবে হজুর।

জীবানন্দ। তা যাবে। কিন্তু শুধু শুধু জানা গিয়ে আর লাভ কি?

শিরোমণি। (প্রথম ভদ্রলোকের প্রতি অলক্ষ্যে) সেরেছে?

জনার্দন। কিন্তু কোন দিন ত জানতেই হবে হজুর।



জীবানন্দ । তা হবে । কিন্তু আজ আর আমার সময় নেই রায়-মশায় ।

শিরোমণি । ( ব্যগ্র হইয়া ) আমাদের সময় আছে হুজুর । চাবিটা জনার্দন ভায়ার হাতে দিলেই সন্ধ্যার পরে আমরা সমস্ত মিলিয়ে দেখতে পারি । হুজুরেরও কোনও দায়িত্ব থাকে না—কি আছে না আছে সে পালাবার আগেই সব জানা যায় । কি বল ভায়া ? কি বল হে তোমরা ? ঠিক বলেছি কি না ?

সকলেই এ প্রস্তাবে সম্মতি দিল, দিল না শুধু যাহার হাতে চাবি

জীবানন্দ । ( ঈষৎ হাসিয়া ) ব্যস্ত কি শিরোমণিমশায়, যদি কিছু নষ্ট হয়ই থাকে ত ভিথিরীর কাছ থেকে আর আদায় হবে না । আজ থাক, যেদিন আমার অবসর হবে আপনাদের খবর দেব ।

মনে মনে সকলেই ক্রুদ্ধ হইল

জনার্দন । ( উঠিয়া দাঁড়াইয়া ) কিন্তু দায়িত্ব একটা—

জীবানন্দ । সে ত ঠিক কথা রায়মশায় । দায়িত্ব একটা আমার রইল বই কি ।

সকলে উঠিয়া দাঁড়াইল । চলিতে চলিতে জমিদারের ক্রুটিপথের বাহিরে আসিয়া

শিরোমণি । ( জনার্দনের গা টিপিয়া ) দেখলে ভায়া, ব্যাটা মাতালের ভাব বোঝাই ভার । গুয়োটা কথা কয় যেন হেঁয়ালি । মদে চুর হয়ে আছে । বাঁচবে না বেশি দিন ।

জনার্দন । হুঁ । যা ভয় করা গেল তাই হ'ল দেখু'চি ।

শিরোমণি । এবার গেল সব শু'ড়ির দোকানে । বেটি যাবার সময় আচ্ছা জব্দ করে গেল ।

প্রথম ভদ্রলোক। হুজুর আর দিচ্ছেন না।

শিরোমণি। আবার? এবার চাইতে গেলে গলা টিপে মদ খাইয়ে দিয়ে তবে ছাড়বে।

কথাটা উচ্চারণ করিয়াই তাঁহার সর্বদ্বন্দ্ব রোমাঞ্চিত হইয়া উঠিল

সকলের প্রস্থান

প্রফুল্ল। (খবরের কাগজ হইতে মুখ তুলিয়া) দাদা, আবার একটা নূতন হাঙ্গামা জড়ালেন কেন? চাবিটা ওদের দিয়ে দিলেই ত হ'তো।

জীবানন্দ। হ'তো না প্রফুল্ল, হলে দিতাম। পাছে এই দুর্ঘটনা ঘটে বলেই সে কাল রাতে আমার হাতে চাবি দিয়েছে।

প্রফুল্ল। সিন্দুক আছে কি?

জীবানন্দ। (হাসিয়া) কি আছে? আজ সকালে তাই আমি খাতাখানা পড়ে দেখছিলাম। আছে মোহর, টাকা, হীরে, পান্না, মুক্তোর মালা, মুকুট, নানা রকমের জড়োয়া গয়না, কত কি দলিল-পত্র, তা ছাড়া সোনা রূপার বাসন কোশনও কম নয়। কত কাল ধরে জমা হয়ে এই ছোট্ট চণ্ডীগড়ের ঠাকুরের যে এত সম্পত্তি সঞ্চিত আছে, আমি স্বপ্নেও ভাবি নি। চুরি ডাকাতির ভয়ে ভৈরবীরা বোধ করি কাউকে জানতেও দিত না।

প্রফুল্ল। (সভয়ে) বলেন কি? তার চাবি আপনার কাছে? একমাত্র পুত্র সমর্পণ ডাইনির হাতে?

জীবানন্দ। নিতান্ত মিথ্যে বল নি ভায়া, এত টাকা দিয়ে আমি নিজেকেও বিশ্বাস করতে পারতাম না। অথচ এ আমি চাই নি। যতই তাকে পীড়াপীড়ি করলাম, জনার্দনকে দিতে, ততই সে অস্বীকার করে আমার হাতে গুঁজে দিলে।

প্রফুল্ল। এর কারণ?

জীবানন্দ। বোধহয় সে ভেবেছিল এ দুর্নামের ওপর আবার চুরির কলঙ্ক চাপলে তার আর সহিবে না। এদের সে চিনেছিল।

প্রফুল্ল। কিন্তু আপনাকে সে চিনতে পারে নি।

জীবানন্দ। ( হাসিল, কিন্তু সে হাসিতে আনন্দ ছিল না ) সে দোষ তার, আমার নয়। তার সম্বন্ধে অপরাধ আর যত দিকেই করে থাকি প্রফুল্ল, আমাকে চিন্তে না দেওয়ার অপরাধ করি নি। কিন্তু আশ্চর্য্য এই পৃথিবী, এবং তার চেয়েও আশ্চর্য্য এর মানুষের মন। এ যে কি থেকে কি স্থির করে নেয় কিছুই বলবার যো নেই। এর যুক্তিটা কি জানো ভায়া, সেই যে তার হাত থেকে একদিন মরফিয়া চেয়ে নিয়ে চোখ বুজে খেয়েছিলাম, সেই হ'ল তার সকল তর্কের বড় তর্ক—সকল বিশ্বাসের বড় বিশ্বাস। কিন্তু সে রাত্রে আর যে কোন উপায় ছিল না—সে ছাড়া যে আর কারও পানে চাইবার কোথাও কেউ ছিল না—এ সব ষোড়শী একেবারে ভুলে গেছে। কেবল একটি কথা তার মনে জেগে আছে—যে নিজের প্রাণটা অসংশয়ে তার হাতে দিতে পেরেছিল তাকে আবার অবিশ্বাস করা যায় কি ক'রে! ব্যস, যা কিছু ছিল চোখ বুজে দিলে আমার হাতে তুলে। প্রফুল্ল, ছনিয়ায় ভয়ানক চালাক লোকেও মাঝে মাঝে মারাত্মক ভুল করে বসে, নইলে সংসারটা একেবারে মরুভূমি হয়ে যেত, কোথাও রসের বাষ্পটুকু জন্মবারও ঠাই পেত না।

প্রফুল্ল। অতিশয় খাঁটি কথা দাদা! অতএব অবিলম্বে খাতাখানা পুড়িয়ে ফেলে তারাদাস ঠাকুরকে ডেকে ধমক দিন—জমানো মোহর গুলোয় যদি সলোমান সাহেবের দেনাটা শোধ যায় ত শুধু রসের বাষ্প কেন, মুঘল ধারে বর্ষণ সুরু হতে পারবে।

জীবানন্দ । প্রফুল্ল, এই জন্তেই তোমাকে এত পছন্দ করি ।

প্রফুল্ল । ( হাত জোড় করিয়া ) এই পছন্দটা এইবার একটু খাটো করতে হবে দাদা । রসের উৎস আপনার অফুরন্ত হোক, কিন্তু মোসাহেবী করে এ অধিনের গলার চুঙ্গিটা পর্য্যন্ত কাঠ হয়ে গেছে । এইবার একবার বাইরে গিয়ে ছোটো ডাল-ভাতের যোগাড় করতে হবে । কাল পরশু আমি বিদায় নিলাম ।

জীবানন্দ । ( সহাস্তে ) একেবারে নিলে ? কিন্তু এইবার নিয়ে ক'বার নেওয়া হ'ল প্রফুল্ল ?

প্রফুল্ল । বার চারেক । ( হাসিয়া ফেলিয়া ) ভগবান মুখটা দিয়েছিলেন তা বড়লোকের প্রসাদ খেয়েই দিন গেল ; ছোটো বড় কথ্যও যদি না মাঝে মাঝে বার করতে পারি ত নিতান্তই এর জাত যায় । নেহাৎ অপরাধও নেই দাদা । বহুকাল ধরে আপনাদের জলকে কখনো উঁচু কখনো নীচু বলে এ দেহটায় মেদ-মাংসই কেবল পরিপূর্ণ করেছি, সত্যিকারের রক্ত বলতে আর ছিটে-ফোঁটাও বাকি রাখি নি । আজ ভাব্‌চি এক কাজ করব । সন্ধ্যার আবছায়ায় গা ঢাকা দিয়ে গিয়ে থপ করে ভৈরবীঠাকরণের এক থাম্‌চা পায়ের ধুলো নিয়ে ফেলব । আপনার অনেক ভাল-মন্দ দ্রব্যই ত আজ পর্য্যন্ত উদরস্থ করেচি, এ নইলে সেগুলো আর হজম হবে না, পেটে লোহার মত ফুটেব ।

জীবানন্দ । ( হাসিবার চেষ্টা করিয়া ) আজ উচ্ছ্বাসের কিছু বাড়াবাড়ি হচ্ছে প্রফুল্ল !

প্রফুল্ল । ( বৃত্ত হস্তে ) তা হলে বসুন দাদা, এটা শেষ করি । মোসাহেবীর পেন্সন বলে সেদিন যে উইলখানায় হাজার পাঁচেক টাকা লিখে রেখেছেন, সেটার ওপরে দয়া করে একটা কলমের আঁচড় দিয়ে

রাখবেন—চণ্ডীর টাকাটা হাতে এলে মোসাহেবের অভাব হবে না, কিন্তু আমাকে দান করে অতগুলো টাকার আর দুর্গতি করবেন না।

জীবানন্দ। তা হলে এবার আমাকে তুমি সত্যিই ছাড়লে ?

প্রফুল্ল। আশীর্বাদ করুন এই স্মৃতিটুকু যেন শেষ পর্যন্ত বজায় থাকে। কিন্তু কবে যাচ্ছেন তিনি ?

জীবানন্দ। জানি নে ?

প্রফুল্ল। কোথায় যাচ্ছেন তিনি ?

জীবানন্দ। তাও জানি নে।

প্রফুল্ল। জেনেও কোন লাভ নেই দাদা। বাপ রে! মেয়েমানুষ ত নয়, যেন পুরুষের বাবা। মন্দিরে দাঁড়িয়ে সেদিন অনেকক্ষণ চেয়ে ছিলাম, মনে হ'ল পা থেকে মাথা পর্যন্ত যেন পাথরে গড়া। ঘা মেরে গুঁড়ো করা যাবে, কিন্তু আগুনে গলিয়ে যে ইচ্ছে মত ছাঁচে ঢেলে গড়বেন, সে বস্তুই নয়। পারেন ত ও মংলবটা পরিত্যাগ করবেন।

জীবানন্দ। ( বিদ্রূপের স্বরে ) তা হলে প্রফুল্ল, এবার নিতান্তই যাচ্চো ?

প্রফুল্ল। গুরুজনের আশীর্বাদের জোর থাকে ত মনস্কামনা সিদ্ধ হবে বই কি।

জীবানন্দ। তা হতে পারে। আচ্ছা, ষোড়শী সত্যিই চলে যাবে তোমার মনে হয় ?

প্রফুল্ল। হয়। কারণ, সংসারে সবাই প্রফুল্ল নয়। ভাল কথা দাদা, একটা খবর দিতে আপনাকে ভুলে ছিলাম। কাল রাত্রে নদীর ধারে বেড়াচ্ছিলাম, হঠাৎ দেখি সেই ফকির সাহেব। আপনাকে যিনি একদিন তাঁর বটগাছ ঘুষু শিকার করতে দেখে নি—বন্দুক কেড়ে

নিয়েছিলেন—তিনি। কুর্গিশ করে কুশল প্রশ্ন করলাম, ইচ্ছে ছিল মুখরোচক ছোটো খোসামোদ টোষামোদ করে যদি একটা কোন ভাল রকমের ওষুধ-টষুধ বার করে নিতে পারি ত আপনাকে ধরে পেটেন্ট নিয়ে বেচে ছুপয়সা রোজগার করব। কিন্তু ব্যাটা ভারি চালাক, সে দিক দিয়েই গেল না। কথায় কথায় শুনলাম তাঁর ভৈরবী মাকে দেখতে এসেছিলেন, এখন চলে যাচ্ছেন। ভৈরবী যে সমস্ত ছেড়ে দিয়ে চলে যাচ্ছেন তাঁর কাছেই শুনতে পেলাম।

জীবানন্দ। এ'র সদুপদেশের ফলেই বোধ হয় ?

প্রফুল্ল। না। বরঞ্চ, উপদেশের বিরুদ্ধেই যাচ্ছেন।

জীবানন্দ। বল কি হে, ফকির যে শুনি তাঁর গুরু। গুরু-আজ্ঞা লঙ্ঘন ?

প্রফুল্ল। এ ক্ষেত্রে তাই বটে।

জীবানন্দ। কিন্তু এত বড় বিরাগের হেতু ?

প্রফুল্ল। হেতু আপনি। কি জানি, এ কথা শোনানো আপনাকে উচিত হবে কি না, কিন্তু ফকিরের বিশ্বাস আপনাকে তিনি মনে মনে অত্যন্ত ভয় করেন। পাছে কলহ-বিবাদে মধ্য দিয়েও আপনার সঙ্গে মাথামাথি হয়ে যায়, এই তাঁর সব চেয়ে দুশ্চিন্তা। নইলে ভয় তাঁর মিথ্যা কলঙ্কেও নয়, গ্রামের লোককেও নয়।

জীবানন্দ বিস্ফারিত চক্ষে নীরবে চাহিয়া রহিলেন

প্রফুল্ল। দাদা, ভগবান আপনাকেও বুদ্ধি বড় কম দেন নি, কিন্তু সর্বস্ব সমর্পণ করে কাল তিনিই মারাত্মক ভুল করলেন, না হাত পেতে নিয়ে আপনিই মারাত্মক ভুল করলেন, সে মীমাংসা আজ বাকি রয়ে গেল। বেঁচে থাকি ত একদিন দেখতে পাবো আশা হয়।

জীবানন্দ নিঃশব্দে বসিয়া রহিলেন। সহসা বেহারা পাত্ৰ  
ভরিয়া মদ লইয়া প্রবেশ করিতেই

জীবানন্দ। আঃ—এখানেও। যা নিয়ে যা—দরকার নেই।

বেহারা প্রস্থান করিল

প্রফুল্ল। রাগ করেন কেন দাদা, যেমন শিক্ষা। বরঞ্চ কখন  
দরকার সেইটেই বলে দিন না। অকস্মাৎ অমৃত অরুচি যে দাদা?

জীবানন্দ। (হাসিয়া) অরুচি নয়, কিন্তু আর থাকো না।

প্রফুল্ল। (হাসিয়া) এই নিয়ে ক'বার হ'ল দাদা?

জীবানন্দ। (হাসিয়া) এ মীমাংসাটাও আজ না হয় বাকি থাক  
প্রফুল্ল, যদি বেঁচে থাকো ত একদিন দেখতে পাবে আশা করি।

বেহারা পুনরায় প্রবেশ করিল

বেহারা। এই পিস্তলটা ভুলে টেবিলের ওপর ফেলে রেখে  
এসেছিলেন।

জীবানন্দ। ভুলেই এসেছিলাম বটে, কিন্তু ওতেও আর কাজ নেই,  
তুই নিয়ে যা।

প্রফুল্ল। কিন্তু রাত প্রায় এগারোটা হ'ল, বাড়ী চলুন?

জীবানন্দ। না, বাড়ী নয় প্রফুল্ল, এখন একলা অন্ধকারে একটু  
ঘুরতে বার হ'ব।

প্রফুল্ল। একলা? নিরস্ত্র? না না, সে হয় না দাদা। অন্ধকার  
রাত, পথে-বাটে আপনার অনেক শত্রু। অন্ততঃ নিত্য সহচরটিকে সঙ্গে  
রাখুন।

এই বলিয়া সে ভৃত্যের হাত হইতে পিস্তল লইয়া দিতে গেল

জীবানন্দ । ( পিছাইয়া গিয়া ) এ জীবনে ওকে আর আমি ছুঁচি নে  
প্রফুল্ল । আজ থেকে আমি এমনি এককী বার হ'ব, যেন কোথাও কোন  
শত্রু নেই আমার । আমার থেকেও কারও কোন না ভয় হোক ; তার  
পরে বা হয় তা ঘটুক, আমি কারও কাছে নালিশ করব না ।

প্রফুল্ল । হঠাৎ হ'ল কি ? না হয়, পাইকদের কাউকে ডেকে দিই ?

জীবানন্দ । না, পাইক পিয়াদা আর নয় । তোমরা বাড়ী যাও ।

প্রফুল্ল । আপনার অবাধ্য হ'ব না দাদা, আমরা চললাম, কিন্তু  
আপনিও বেশি বিলম্ব করবেন না আমার অহরোধ ।

প্রফুল্ল ও বোহরা প্রস্থান করিল

জীবানন্দ ধীরে ধীরে নাটমন্দিরের আর একটা দিকে আসিয়া উপস্থিত হইল ।

একজন থাম ঠেস দিয়া বসিয়া মূঢ় কণ্ঠে নাম গান করিতেছিল । এবং

অদূরে চার-পাঁচ জন লোক চাদর মুড়ি দিয়া ঘুমাইতেছিল । জীবানন্দ

হেঁট হইয়া অন্ধকারে তাহাকে দেখিবার চেষ্টা করিল

গীত

পূজা করে তোরে তারা

সার যদি হয় নয়নধারা

শুভঙ্করী নাম তবে মা

ধরিস্ কেন দুঃখ-হার ।

কি পাপেতে বল মা কালী

মাখালি কলঙ্ক-কালি—

এখন ভরসা কেবল কালী

তুই মা বরাভয়করা ।



জীবানন্দ । তুমি কে হে ?

পথিক । আজ্ঞে, আমি একজন যাত্রী বাবু ।

জীবানন্দ । বাবু বলে আমাকে চিন্লে কি করে ?

পথিক । আজ্ঞে, তা আর চেনা যায় না ? ভদ্রলোক ছাড়া এমন ধপ ধপে কাপড় আর কাদের থাকে বাবু ?

জীবানন্দ । ওঃ—তাই বটে ? কোথা থেকে আস্চো ? কোথায় যাবে ? এরা বুঝি তোমার সঙ্গী ?

পথিক । আস্চি মানভূম জেলা থেকে বাবু, যাবো পুরীধামে । এদের কারও বাড়ী মেদিনীপুরে, কারও বাড়ী আর কোথাও—কোথায় যাবে তাও জানি নে ।

জীবানন্দ । আচ্ছা, কত লোক এখানে রোজ আসে ? যারা থাকে তারা দু'বেলা খেতে পায়, না ?

পথিক । ( লজ্জিত হইয়া ) কেবল খাবার জন্তেই নয় বাবু । আমার পা কেটে গিয়ে ঘায়ের মত হয়েছে দেখেই মা ভৈরবী নিজেকে ছুকুম দিয়েছিলেন যত দিন না সারে তুমি থাকো ।

জীবানন্দ । তোমাকে বলি নি ভাই, বেশ ত, থাকো না । যায়গার ত আর অভাব নেই ।

পথিক । কিন্তু ভৈরবী মা ত আর নেই শুন্তে পেলাম ।

জীবানন্দ । এরই মধ্যে শুন্তে পেয়েছ ? তা নাই তিনি থাক্লেন তাঁর ছুকুম ত আছে ? তোমাকে যেতে বলে কার সাধ্য ! বাড়ী কোথায় তোমার ভাই ?

পথিক । বাড়ী আমার ছিল বাবু মানভূয়ের বংশীতট গাঁয়ে । গাঁয়ে অন্ন নেই, জল নেই, ডাক্তার বৃষ্টি নেই—জমিদার থাকেন কলকাতায়,

কখনো তাঁকে কেউ হুঃখ জানাতে পারি নে। আছে শুধু গমস্তা টাকা আদায়ের জেতে।

জীবানন্দ নিঃশব্দে মাথা নাড়িয়া সায় দিল

পথিক। উপরি উপরি হুঃসন বৃষ্টি হল না, ক্ষেতের ফসল জলে পুড়ে গেল, এও সয়েছিল বাপু, কিন্তু—

কান্নায় তাহার গলা বুজিয়া আসিল

জীবানন্দ। তাই বুঝি তীর্থ দর্শনে একবার বেরিয়ে পড়লে ?

পথিক। ( মাথা নাড়িয়া ) এই ফাল্গুনে পরিবার মারা গেল, একে একে দুই ছেলে ওলাউঠায় চোখের সামনে মারা গেল বাবু, এক ফোঁটা ওষুধ কাউকে দিতে পারলাম না।

বলিতে বলিতে লোকটি উচ্ছ্বসিত শোকে কাঁদিয়া ফেলিল। জীবানন্দ

জামার হাতায় চোখ মুছিতে লাগিল

পথিক। মনে মনে বললাম, আর কেন ? ভাঙা কুঁড়েখানি বিধবা ভাইঝিকে দিয়ে বেরিয়ে পড়লাম—বাবু, আমার চেয়ে হুঃখী আর সংসারে নেই।

জীবানন্দ। ওরে ভাই, সংসারটা ঢের বড় যায়গা, এর কোথায় কে কি ভাবে আছে বলবার যো নেই।

পথিক। কিন্তু আমার মত—

জীবানন্দ। হুঃখী ? কিন্তু হুঃখীদেরও কোন আলাদা জাত নেই দাদা, হুঃখেরও কোন বাঁধানো রাস্তা নেই। তা হ'লে সবাই তাকে এড়িয়ে চলতে পারতো। হুঃখ করে যখন ঘাড়ে এসে পড়ে তখনই কেবল মাহুয়ে টের পায়। আমার সব কথা তুমি বুঝবে না ভাই, কিন্তু

সংসারে তুমি একলা নও। অন্ততঃ একজন সাথী তোমার বড় কাছেই আছে, তাকে তুমি চিন্তেও পারো নি। কিন্তু তুমি মায়ের নাম করছিলে—

সহসা সাগর ও হরিহর দ্রুতপদে প্রবেশ করিয়া মন্দিরের সম্মুখে

গিয়া দাঁড়াইল। জীবানন্দ উৎকর্ণ হইয়া শুনিতে লাগিল

হরিহর। আমাদের মায়ের সর্বনাশ যে করেছে তার সর্বনাশ না করে আমরা কিছুতে ছাড়ব না।

সাগর। মায়ের চোকাট ছুঁয়ে দিব্যি করলাম খুড়ো, ফাঁসি যেতে হয় তাও যাবো।

হরিহর। হঃ—আমাদের আবার জেল, আমাদের আবার ফাঁসি। মা আগে যাক—

হরিহর ও সাগর। জয় মা চণ্ডী !

উভয়ের প্রস্থান

জীবানন্দ। বাস্তবিক, ঠাকুর-দেবতার মত এমন সহৃদয় শ্রোতা আর নেই। হোক না মিথ্যা দম্ভ, তবু তার দাম আছে। দুর্বলের ব্যর্থ পৌরুষ তবু একটু গৌরবের স্বাদ পায় !

পথিক। কি বললেন বাবু ?

জীবানন্দ। কিছু না ভাই, মায়ের নাম করছিলে আমি বাধা দিলাম। আবার স্তব্ধ কর, আমি চললাম ! কাল এমনি সময়ে হয় ত আবার দেখা পাবে।

পথিক। আর ত দেখা হবে না বাবু, আমি পাঁচ দিন আছি কালই সকালে চলে যেতে হবে।

জীবানন্দ । চলে যেতে হবে ? কিন্তু এই যে বললে তোমার পা এখনো সারে নি, তুমি হাঁটতে পারো না ?

পথিক । মায়ের মন্দির এখন রাজাবাবুর । হুজুরের হুকুম তিন দিনের বেশি আর কেউ থাকতে পারবে না ।

জীবানন্দ । ( হাসিয়া ) ভৈরবী এখনও যায় নি, এরই মধ্যে হুজুরের হুকুম জারি হয়ে গেছে ? মা-চণ্ডীর কপাল ভাল ! আচ্ছা, আজ অতিথিদের সেবা হ'ল কি রকম ? কি খেলে ভাই ?

পথিক । বাদের তিনদিনের বেশি হয় নি তারা মায়ের প্রসাদ সবাই পেলে ।

জীবানন্দ । আর তুমি ? তোমার ত তিনদিনের বেশি হয়ে গেছে ?

পথিক । ঠাকুরমশাই কি করবেন, রাজাবাবুর হুকুম নেই কিনা ।

জীবানন্দ । তাই হবে ।

এই বলিয়া দীর্ঘনিশ্বাস মোচন করিল

জীবানন্দ । কাল আমি আবার আসবো, কিন্তু ভাই, চুপি চুপি চলে যেতে পাবে না ।

পথিক । ঠাকুরমশাই যদি কিছু বলে ?

জীবানন্দ । বললেই বা । এত দুঃখ সহিতে পারলে আর বামুনের একটা কথা সহিতে পারবে না ? রাত হ'ল, এখন যাই, কিন্তু মনে থাকে যেন ।

এমনি সময়ে ষোড়শী প্রদীপ হস্তে ধীরে ধীরে প্রবেশ করিয়া মন্দিরের দ্বারের

অভিমুখে অগ্রসর হইতেছিল, জীবানন্দ পিছন হইতে ডাক দিল

জীবানন্দ । অলকা ?

ষোড়শী । ( চমকিয়া ) আপনি ? এত রাত্রে আপনি এখানে কেন ?

জীবানন্দ। কি জানি, এমনি এসেছিলাম। তুমি যাত্রার আগে ঠাকুর প্রণাম করতে যাচ্ছ, না? চল, আমি তোমার সঙ্গে যাই।

ষোড়শী। আমার সঙ্গে যাবার বিপদ আছে সে ত আপনি জানেন?

জীবানন্দ। বিপদ? জানি। কিন্তু আমার পক্ষ থেকে একেবারে নেই। আজ আমি একা এবং সম্পূর্ণ নিরস্ত্র। এ জীবনে আর যাই কেন না স্বীকার করি, আমার শত্রু আছে এ আমি একটা দিনও আর মানব না।

ষোড়শী। কিন্তু কি হবে আমার সঙ্গে গিয়ে?

জীবানন্দ। কিছু না। শুধু বতর্কণ আছে সঙ্গে থাকবো, তারপর যখন সময় হবে তোমাকে গাড়ীতে তুলে দিয়ে আমি বাড়ী চলে যাবো। যাবার দিনে আজ আর আমাকে তুমি অবিশ্বাস ক'রো না। আমার আয়ুর দাম জানো, হয় ত আর দেখাও হবে না। আমাকে যে তুমি কত রকমে দয়া করে গেলে, শেষ দিন পর্যন্ত আমি সেই কথাই স্মরণ করব।

ষোড়শী। আচ্ছা, আমুন আমার সঙ্গে।

রুদ্ধ মন্দিরের দ্বারে গিয়া ষোড়শী প্রণাম করিল। জীবানন্দ বলিতে লাগিল

জীবানন্দ। তোমাকে আমার বড় প্রয়োজন অলকা। ছুটো দিনও কি আর তোমার থাকা চলে না?

ষোড়শী। না।

জীবানন্দ। একটা দিন?

ষোড়শী। না।

জীবানন্দ। তবে সকল অপরাধ আমার এইখানে দাঁড়িয়ে আজ ক্ষমা কর!

ষোড়শী । কিন্তু তাতে কি আপনার প্রয়োজন আছে ?

জীবানন্দ । এর উত্তর আজ দেবার আমার শক্তি নেই । এখন কেবল এই কথাই আমার সমস্ত মন ছেয়ে আছে অলকা, কি করলে তোমাকে একটা দিনও ধরে রাখতে পারি । উঃ—নিজের মন যার পরের হাতে চলে যায়, সংসারে তার চেয়ে নিরুপায় বুদ্ধি আর কেউ নেই ।

ষোড়শী জীবানন্দের কাছে আসিয়া স্তব্ধ হইয়া নীরবে দাঁড়াইল ( দাঁড়াইয়া ) আমার সব চেয়ে বড় দুঃখ অলকা, সবাই জান্বে আমি শান্তি দিয়েছি, তুমি সহ্য করেছ, আর নিঃশব্দে চলে গেছ । এত বড় মিথ্যে কলঙ্ক আমি সহিব কেমন করে ? তাও সত্য যদি একটি দিন— শুধু কেবল একটি দিনও তোমাকে কাছে রাখতে পারি ।

ষোড়শী । ( পিছাইয়া গিয়া ) চৌধুরীমশাই, কিসের জন্তে এত অহুন্নয় বিনয় ? আপনার পাইক পিয়াদাদের গায়ের জোরের ত আজও অভাব হয় নি । আপনি ত জানেন, আমি কারো কাছে নালিশ করব না ।

জীবানন্দ । ( পথ ছাড়িয়া সরিয়া ) তা হলে তুমি যাও । অসম্ভবের লোভে আর তোমাকে আমি পীড়ন করব না । পাইক পিয়াদা সবাই আছে অলকা, তাদের জোরেরও অভাব হয় নি । কিন্তু যে নিজে ধরা দিলে না, জোর করে ধরে রেখে তার বোঝা বয়ে বেড়াবার জোর আর আমার গায়ে নেই ।

ষোড়শী । ( গড় হইয়া প্রণাম করিয়া জীবানন্দের পায়ের ধূলা মাথায় তুলিয়া ) আপনার কাছে আমার একান্ত অনুরোধ—

জীবানন্দ । কি অনুরোধ অলকা ?

বাহিরে গরুর গাড়ী দাঁড়ানো শব্দ হইল ।

ষোড়শী । দয়া করে একটু সাবধানে থাকবেন ।

জীবানন্দ । সাবধানে থাকব । কি জানি, সে বোধ হয় আর পেরে উঠব না । কিছুক্ষণ পূর্বে এই মন্দিরে কে দুজন দেবতার চৌকাট্ ছুঁয়ে প্রাণ পর্য্যন্ত পণ করে শপথ করে গেল, তাদের মায়ের সর্বনাশ বে করেছে, তার সর্বনাশ না ক'রে তারা বিশ্রাম করবে না—আড়ালে দাঁড়িয়ে নিজের কানেই ত সব শুন্লুম—দুদিন আগে হলে হয় ত মনে হ'ত, আমিই বুঝি তাদের লক্ষ্য—দুশ্চিন্তার সীমা থাকতো না, কিন্তু আজ কিছু মনেই হ'ল না—কি অলকা ? চমকালে কেন ?

ষোড়শী । ( পাংশু মুখে ) না কিছু না । এইবারে ত আপনার চণ্ডীগড় ছেড়ে বাড়ী যাওয়া উচিত ? আর ত এখানে আপনার কাজ নেই ।

জীবানন্দ । ( অন্তমনস্কতায় ) কাজ নেই ?

ষোড়শী । কই আমি ত আর দেখতে পাই নে । এ গ্রাম আপনার, একে নিষ্পাপ করবার জন্তেই আপনি এসেছিলেন । আমার মত অসতীকে নির্বাসিত করার পরে আর এখানে আপনার কি আবশ্যক আছে আমি ত দেখতে পাই নে ।

জীবানন্দ । (চোখ মেলিয়া চাহিয়া রহিয়া) কিন্তু তুমি ত অসতী নও ।

গাড়োয়ানের প্রবেশ

গাড়োয়ান । মা, আর কি বেশি দেরি হবে ?

ষোড়শী । না বাবা, আর বেশি দেরি হবে না ।

গাড়োয়ান প্রস্থান করিল

চণ্ডীগড় থেকে আপনাকে কিন্তু যেতেই হবে তা বলে দিচ্ছি ।

জীবানন্দ । কোথায় যাবো বল ?

ষোড়শী । কেন, আপনার নিজের বাড়ীতে । বীজগায়ে ।

জীবানন্দ । বেশ, তাই যাবো ।

ষোড়শী । কিন্তু কালকেই যেতে হবে ।

জীবানন্দ । ( মুখ তুলিয়া ) কালই ? কিন্তু কাজ আছে যে । মাঠের জলনিকাশের একটা সাঁকো করা দরকার । এদের জমিগুলো সব ফিরিয়ে দিতে হবে, সে ত তোমারই হুকুম । তা ছাড়া মন্দিরের একটা ভালো বিলি-ব্যবস্থা হওয়া চাই—অতিথি অভ্যাগত যারা আসে তাদের ওপর না অত্যাচার হয়—এসব না করেই কি তুমি চলে যেতে বল্চ ?

ষোড়শী । ( মুষ্কিলে পড়িয়া ) এসব সাধু সংকল্প কি কাল সকাল পর্যন্ত থাকবে ? ( জীবানন্দ নীরব রহিল ) কিন্তু আবশ্যকের চেয়ে একটা দিনও বেশি থাকবেন না আমাকে কথা দিন । এবং সে ক'টা দিন আগেকার মত সাবধানে থাকবেন বলুন ?

জীবানন্দ । ( সে কথায় কান না দিয়া ) আমার কৃতকর্মের ফল যদি আমি ভোগ করি সে অভিযোগ আমি কার কাছে করব না—কিন্তু যাবার সময় তোমার কাছে আমার শুধু একটি মাত্র দাবি আছে—( পকেট হইতে একখানি পত্র বাহির করিয়া ষোড়শীর হাতে দিয়া ) এই চিঠিখানি ফকির সাহেবকে দিয়ো ।

ষোড়শী । দেব । কিন্তু এ পত্র কি আমি পড়তে পারি নে ?

জীবানন্দ । পারো, কিন্তু আবশ্যক নেই । এর জবাব দেবার ত প্রয়োজন হবে না । আমাকে দুঃখ থেকে বাঁচাবার জন্তে তার চের বেশি দুঃখ তুমি নিজে নিজেই । নইলে এমন করে হয় ত আমাকে—



কিন্তু যাক্ সে। আমার শেষ অনুরোধ এতেই লেখা আছে, তা যদি রাখতে পারো তার চেয়ে আনন্দ আর আমার নেই।

ষোড়শী। তা হলে পড়ি ?

ষোড়শী নীরবে চিঠিখানি পড়িল, তাহার মুখে ভাবের একান্ত পরিবর্তন ঘটিল ;

জীবানন্দকে আড়াল করিয়া তাড়াতাড়ি সজল চক্ষু মুছিয়া ফেলিল

ষোড়শী। আমি যে কুষ্ঠাশ্রমের দাসী হয়ে যাচ্ছি এখনও তুমি জানলে কি ক'রে ?

জীবানন্দ। কুষ্ঠাশ্রমের কথা অনেকেরই জানে। আর তোমার কথা ? আজই দেবতার স্থানে দাঁড়িয়ে যারা শপথ করে গেল, নিজের কানে শুনেও আমি যাদের চিন্তে পারি নি, তুমি তাদের চিন্তে কি ক'রে ?

ষোড়শী। তোমার কি সংসারে আর মন নেই ? সমস্ত বিলিয়ে নষ্ট করে দিয়ে কি তুমি সন্ন্যাসী হয়ে বেরিয়ে যেতে চাও না কি ?

জীবানন্দ। ( সহসা উত্তেজিত হইয়া ) আমি সন্ন্যাসী ? মিছে কথা। আমি বাঁচতে চাই—মানুষের মাঝখানে মানুষের মত বাঁচতে চাই। বাড়ী চাই, ঘর চাই, স্ত্রী চাই, সন্তান চাই—আর মরণ যেদিন আটকাতে পারব না, সেদিন তাদের চোখের উপর দিয়েই চলে যেতে চাই। কিন্তু এ প্রার্থনা জানানো আমি কার কাছে ?

গাড়োয়ানের প্রবেশ

গাড়োয়ান। মা, শৈবালদীঘি সাত-আট কোশের পথ, এখন বার না হলে পৌঁছাতে বেলা হয়ে যাবে।

ষোড়শী। চল বাবা, যাচ্ছি।

গাড়োয়ান প্রস্থান করিল। ষোড়শী পুনরায় জীবানন্দকে প্রণাম করিয়া  
আমি চললাম।

জীবানন্দ । এথনি ? এত রাত্রে ? .

ষোড়শী । প্রজারা জানে আমি ভোর-বেলায় যাত্রা করব, তারা এসে পড়বার পূর্বেই আমার বিদায় হওয়া চাই ।

প্রস্থান

জীবানন্দ । ( একাকী অন্ধকারের মধ্যে দাঁড়াইয়া ) অলকা ! অলকা ! একদিন তোমার মা আমার হাতে তোমাকে দিয়েছিলেন ; তবু তোমাকে পেলাম না ; কিন্তু সেদিন আমাকে যদি কেউ তোমার হাতে সঁপে দিতেন, আজ বোধ হয় তুমি অন্ধকারে আমাকে এমন করে ফেলে যেতে পারতে না ।

বাহির হইতে গরুর গাড়ী চালানোর শব্দ শুনা যাইতে লাগিল

# চতুর্থ অঙ্ক

## প্রথম দৃশ্য

### শান্তিকুঞ্জ

জমিদারের “শান্তিকুঞ্জ” তিন-চারিদিন হইল ভস্মীভূত হইয়াছে। ভয়াবহ অগ্নিকাণ্ডের বহু চিহ্ন তখনও বিদ্যমান। সবই পুড়িয়াছে, মাত্র ভৃত্যদের খান-দুই ঘর রক্ষা পাইয়াছে। ইহার মধ্যেই জীবানন্দ আশ্রয় লইয়াছেন। সম্মুখের খোলা জানালা দিয়া বারুই নদীর জল দেখা যাইতেছে; প্রভাত-বেলায় সেই দিকে চোখ মেলিয়া জীবানন্দ নিঃশব্দে বসিয়া ছিলেন। মুখে চাঞ্চল্য বা উত্তেজনার কোন প্রকাশ নাই, শুধু সারারাত্রি ধরিয়া উৎকট রোগ-ভোগের একটা অবসন্ন ম্লানছায়া তাঁহার সর্বদেহে পরিব্যাপ্ত হইয়া আছে।

প্রফুল্ল প্রবেশ করিল

প্রফুল্ল। এখন কেমন আছেন দাদা?

জীবানন্দ। ভাল আছি।

প্রফুল্ল। বহু কালের অভ্যাস, ওষুধ বলেও যদি এক আধ আউন্স—

জীবানন্দ। (সহাস্ত্রে) ওষুধই বটে। না প্রফুল্ল, মদ আমি খাবো না।

প্রফুল্ল। রাত্রিটা কাল কি উৎকর্ষাতেই আমাদের কেটেছে। যন্ত্রণায় হাত-পা পর্যন্ত ঠাণ্ডা হয়ে আসছিল।

জীবানন্দ। তাই এই গরম করার প্রস্তাব?

প্রফুল্ল। বলত ডাক্তারের ভয়, হয় ত হঠাৎ হার্টফেল করতে পারে।

জীবানন্দ। হার্ট ত হঠাৎই ফেল করে প্রফুল্ল।

প্রফুল্ল । কিন্তু সে জন্তে ত একটা— .

জীবানন্দ । ( নিজের হাট হাত দিয়া দেখাইয়া ) ভায়া, এ বেচারি বহু উপদ্রবেও সমানে চল্চে কোন দিন ফেল করে নি । দৈবাৎ একদিন একটা অকাজ যদি করেই বসে ত মাপ করা উচিত ।

প্রফুল্ল । কি একগুঁয়ে মানুষ আপনি দাদা । ভাবি, এত বড় জিদে এককাল কোথায় লুকানো ছিল !

জীবানন্দ । ভাল কথা, তোমার ডাল-ভাতের যোগাড়ে বার হবার যে একটা সাধু প্রস্তাব ছিল তার কতদূর ?

প্রফুল্ল । ষাট হয়েছে দাদা । আপনি ভাল হয়ে উঠুন, ডাল-ভাতের চিন্তা তার পরেই করব ।

জীবানন্দ । আমার ভাল হবার পরে ত ? যাক্ তা হলে নিশ্চিত হওয়া গেল ।

তারাদাস ও পূজারীর প্রবেশ

তারাদাস । মন্দিরের খান-কয়েক খালা ষাট বাটি পাওয়া যাচ্ছে না ।

জীবানন্দ । না গেলে সেগুলো আবার কিনে নিতে হবে ।

ব্যস্ত হইয়া এককড়ির প্রবেশ

এককড়ি । ( ডাক ছাড়িয়া ) এ কাজ সাগর সর্দারের । আজ খবর পাওয়া গেল, তাকে আর তার দুজন সঙ্গীকে সেদিন অনেক রাত পর্যন্ত এদিকে ঘুরে বেড়াতে লোক দেখেচে । থানায় সংবাদ পাঠিয়েচি, পুলিশ এল বলে । সমস্ত ভূমিজ গুণ্ডিকে যদি না • আমি এই ব্যাপারে

আন্দামানে পাঠাতে পারি তু আমার নামই এককড়ি নন্দী নয়—বুথাই আমি এতকাল হজুরের সরকারে গোলামি করে মরেচি !

জীবানন্দ । ( একটু হাসিয়া ) তা হলে তোমাকেও ত এদের সঙ্গে যেতে হয় এককড়ি । জমিদারের গমস্তাগিরি কাজে তুমি যাদের ঘর জালিয়েছ সে ত আমি জানি । এদের আগুন দিতে কেউ চোখে দেখে নি, কেবল সন্দেহের উপর যদি তাদের শাস্তি ভোগ করতে হয়, জানা অপরাধের জন্য তোমাকেও ত তার ভাগ নিতে হয় ।

এককড়ি । ( প্রথমে হতবুদ্ধি হইয়া, পরে শুষ্ক হাস্যের সহিত ) হজুর মা-বাপ । আমাদের সাতপুরুষ হজুরের গোলাম । হজুরের আদেশে শুধু জেল কেন, ফাঁসি যাওয়ায় আমাদের অহঙ্কার ।

জীবানন্দ । যা পুড়েছে সে আর ফিরবে না ; কিন্তু এরপর যদি পুলিশের সঙ্গে জুটে নতুন হাঙ্গামা বাধিয়ে দুপয়সা উপরি রোজগারের চেষ্টা কর, তা হলে হজুরের লোকসানের মাত্রা ঢের বেড়ে যাবে এককড়ি ।

পূজারী । মিস্ত্রী এসেছে হজুরের কাছে নালিশ জানাতে ।

জীবানন্দ । কিসের নালিশ ?

পূজারী । মন্দিরের মেরামতি কাজে ঘটনা-চক্রে তার বিশেষ লোকসান হয়ে যায় । মা বলেছিলেন, কাজ শেষ হলে তার ক্ষতি পূরণ করে দেবেন । আমি তখন উপস্থিত ছিলাম হজুর ।

জীবানন্দ । তবে দেওয়া হয় না কেন ?

পূজারী । ( তারাদাসকে ইঙ্গিত করিয়া ) উনি বলেন, যে বলেছিল তার কাছে গিয়ে আদায় করতে ।

জীবানন্দ ক্রুদ্ধ চক্ষুে তারাদাসের প্রতি চাহিতে

তারাদাস । অনেকগুলো টাকা—

জীবানন্দ । অনেকগুলো টাকাই দেবে ঠাকুর ।

তারাদাস । কিন্তু খরচটা খায়া কি না—

জীবানন্দ । দেখ তারাদাস, ও সব শয়তানি মংলব তুমি ছাড়ো ।  
ষোড়শীর খায় অখায় বিচারের তার তোমার ওপরে নেই । যা বলে  
গেছেন তাই কর গে । ( পূজারীর প্রতি ) মিস্ত্রী দাঁড়িয়ে আছে ?

পূজারী । আছে হজুর ।

জীবানন্দ । চল, আমি নিজে গিয়ে সমস্ত মিটিয়ে দিচ্ছি ।

জীবানন্দ, প্রফুল্ল, তারাদাস ও পূজারীর প্রস্থান । রহিল শুধু এককড়ি

শিরোমণি ও জনার্দন রায়ের প্রবেশ

জনার্দন । বাবু গেলেন কোথা ?

এককড়ি । ( তিক্ত কণ্ঠে ) কে জানে !

জনার্দন । কে জানে কি হে ? পুলিশে খবর দেবার কথাটা তাকে  
বলেছিলে ?

এককড়ি । পারেন, আপনিই বলুন না ।

জনার্দন । ব্যাপার কি এককড়ি ?

এককড়ি । কে জানে কি ব্যাপার । না আছে মেজাজের ঠিক, না  
পাই কোন কথার ঠিকানা । তারা ঠাকুরকে তেড়ে মারতে গেলেন,  
আমাকে পাঠাতে চাইলেন জেলে—

শিরোমণি । অত্যধিক মত্তপানের ফল । হজুর কি এখন ফিরে  
আসবেন মনে হয় ।

এককড়ি। বুঝলেন রায়মশায়, মিথ্যে সন্দেহ করে সাগর সর্দারের নাম পুলিশে জানানো চলবে না।

জনার্দন। মিথ্যে সন্দেহ কি হে? এ যে একরকম স্পষ্ট চোখে দেখা।

শিরোমণি। একেবারে প্রত্যক্ষ বল্লেই হয়।

এককড়ি। বেশ, তাই একবার বলে দেখুন না?

জনার্দন। বল্বেই ত হে। নইলে কি গুপ্তিবর্গ মিলে পুড়ে কয়লা হব? ষোড়শীকে তাড়ানোর কাজে আমিও ত একজন উদ্যোগী।

শিরোমণি। আমার কথাই না কোন্‌ তারা শুনেছে!

জনার্দন। যারা এতবড় জমিদারের বাড়ীতে আগুন দিতে পারে, তারা পারে না কি?

এককড়ি। আমিও তাই ভাবি।

জনার্দন। ভেবে পরে। এখন শীঘ্র কিছু একটা করো। এখানে যদি প্রশ্রয় পায় ত আমাদের ঘরে শিকল দিয়ে মানকচুর মত সেদ্ধ করে ছাড়বে।

শিরোমণি। ব্যাটারা গুরুর দোহাই মান্বে না। ডাকাত কি না। হয় ত বা ব্রহ্ম-হত্যাই করে বস্বে। (শিহরিয়া উঠিল)

জনার্দন। আর শুধু কি কেবল বাড়ী? আমার কত ধানের গোলা, কত খড়ের মাড়, সব শুদ্ধ যদি—

শিরোমণি। দেখ ভায়া, আমি বরঞ্চ দিন-কতক শিষ্যবাড়ী থেকে ঘুরে আসি গে।

জনার্দন। কিন্তু আমার ত শিষ্যবাড়ী নেই? আর থাকলেও ত ধানের গোলা, খড়ের মাড় নিয়ে শিষ্যবাড়ী গুঠা যায় না?

শিরোমণি। না। গেলেও ও সকল ফিরিয়ে আনা কঠিন। আজ কালকার শিশু সেবকদের মতি-গতিও হয়েছে অল্প প্রকার।

এককড়ি। চারিদিকে কড়া পাহারা মোতায়ন করে রাখুন।

জনার্দন। তা ত রেখেচি, কিন্তু পাহারা কি তোমাদেরই কম ছিল এককড়ি?

এককড়ি। আর একটা কথা শুনেছেন? ভূমিজ প্রজারা গিয়ে কাল আদালতে নালিশ করে এসেছে। শুনচি, কান্না-কাটি শুনে স্বয়ং হাকিম আসবেন সর-জমিন তদারকে।

জনার্দন। বল কি হে! চণ্ডীগড়ে বাস করে জমিদার আর আমার নামে নালিশ?

শিরোমণি। শিশুগণের আহ্বান উপেক্ষা করা আমার কর্তব্য নয় জনার্দন।

এককড়ি। দেখুন আম্পর্দা! জীবনে বেশিদিন যারা পেটভরে পেতে পায় না, শীতের রাতে যারা বসে কাটায়, মড়কের দিনে যারা কুকুর বেড়ালের মত মরে—

জনার্দন। আবার আবাদের দিনে একমুঠা বীজের জন্তে আমারই দরজার বাইরে পড়ে হত্যা দেয়—

এককড়ি। সেই নিমকহারাম বেটারা আদালতে দাঁড়াবার টাকা পেলেই বা কোথা? এ দুর্ন্যতি দিলেই বা তাদের কে?

জনার্দন। এই সোজা কথাটা ব্যাটারা বোঝে না যে কেবল জেলা আদালতেই নয়, হাইকোর্ট বলেও একটা কিছু আছে যেখানে জীবানন্দ চৌধুরী জনার্দন রায়কে ডিঙিয়ে সাগর সর্দার যেতে পারে না।

এককড়ি। নিশ্চয়। টাকা যার মকদ্দমা তার। আপনার অর্থ



আছে, সামর্থ্য আছে, ব্যারিষ্টার জামাই আছে, কত উকিল মোক্তার আছে, নালিশ যদি করেই, আপনার ভাবনা কিসের ?

জনার্দন । ( চিন্তিতভাবে ) না এককড়ি, কেবল জমি বিক্রীই ত নয়, ( ইঙ্গিত করিয়া ) আরো যে সব কাজ করা গেছে, ফৌজদারী দণ্ডবিধি কেতাবের পাতায় পাতায় তার ফলশ্রুতি ত সহজ নয় !

এককড়ি । তা জানি । কিন্তু এই ছোটোলোক চাষার দল হাকিমের কাছে আমল পেলে ত !

জনার্দন । বলা যায় না ; এই কথাই আজ তোমার মনিবের কাছে পাড়ো গে । এখন চললাম ।

এককড়ি । আস্থন ! আমিও ইতিমধ্যে একটা কাজ সেরে রাখি গে ।

শিরোমণি, এককড়ি ও জনার্দনের প্রস্থান

কথা কহিতে কহিতে জীবানন্দ ও প্রফুল্ল প্রবেশ করিল

জীবানন্দ । না প্রফুল্ল, সে হয় না । মাঠের জল-নিকালী সঁাকো তৈরীর পয়সা যদি নায়েবমশায়ের তবিলে না থাকে ত এখানকার বাড়ী মেরামতও বন্ধ থাক্ ।

প্রফুল্ল । বেশ থাক্ । কিন্তু দেশে ফিরে চলুন ।

জীবানন্দ । না ।

প্রফুল্ল । না কি রকম ? এ বাড়ীতে আপনি থাক্বেন কি ক'রে

জীবানন্দ । যেমন ক'রে আছি । এ সহ্য হয়ে যাবে । মাহুষের অনেক কিছুই সয় প্রফুল্ল ।

প্রফুল্ল । সয় না দাদা, তারও সীমা আছে । শরীরটা যে হঠাৎ ভয়ানক ভেঙে গেল । বর্ষা স্নায়ুখে । এই ভাঙা মন্দিরে কি এই ভাঙা দেহে সে দুর্যোগ সহাবে ? রক্ষে করুন, এবার বাড়ী চলুন ।

জীবানন্দ । ( হাসিয়া ) এই ভাঙা দেহে দেহ-তত্ত্বের আলোচনা আর একদিন করা যাবে ভায়া, এখন কিন্তু নায়েবকে চিঠি লিখে দাও এ টাকা আমার চাই-ই । প্রজারা বছর বছর টাকা যোগাচ্ছে আর মরচে, এবার তাদের মরণ আটকাতে যদি জমিদারীটা মরে ত মরুক না ।

দ্রুতগদে জনার্দনের প্রবেশ

জনার্দন । হজুর কি নিজে—স্বয়ং হুকুম দিয়ে আমার—

জীবানন্দ । কি হুকুম রায়মশায় ?

জনার্দন । আমার পুকুর ধারের যায়গায় বেড়া ভেঙে মন্দিরের জমির সঙ্গে এক করিয়ে দিয়েছেন ?

জীবানন্দ । কোন্ যায়গাটা বলছেন ? যেখানে বছর-কুড়ি পূর্বে মন্দিরের গোশালা ছিল ?

জনার্দন । আমি ত জানি নে কবে আবার—

জীবানন্দ । অনেক দিন হ'য়ে গেল কিনা । বোধ হয় নানা কাজের ঝগড়াটে কথাটা ভুলে গেছেন ।

জনার্দন । ( হুঃসহ ক্রোধ দমন করিয়া ) কিন্তু এ সব করার আগে হজুর ত আমার কাছে একটা খবর পাঠাতে পারতেন ।

জীবানন্দ । খবর পৌছবেই জানি । হুদুও আগে আর পরে । কিছু মনে করবেন না ।

জনার্দন । কিন্তু আগে জানলে মামলা-মকদ্দমা হয় ত বাধ্ ত না ।

জীবানন্দ । এতেও বাধা উচিত নয় রায়মশায় । ভৈরবীদের হাতে দেবীর বহু সম্পত্তিই বেহাত হয়ে গেছে । এখন সেগুলো হাত-বদল হওয়া দরকার ।

জনার্দন। (শুষ্ক হাশ্রু করিয়া) তার চেয়ে আর ভাল কথা কি আছে হজুর। শুনতে পাই সমস্ত গ্রামখানাই একদিন মা-চণ্ডীর ছিল। এখন কিন্তু—

জীবানন্দ। জমিদারের গর্ভে গেছে? তা গেছে। তারও ত্রুটি হবে না রায়মশায়। মন্দিরের দলিল, নকশা, ম্যাপ প্রভৃতি বা কিছু আছে কলকাতায় এটর্নির বাড়ীতে পাঠিয়ে দিয়েছি। কিন্তু আমার একলার সাধ্য কি? আপনারা এ কাজে আমার সহায় থাকবেন।

জনার্দন। থাকুবো বই কি হজুর। আমরা চিরকাল হজুর সরকারের চাকর বই ত নয়।

জনার্দন প্রস্থান করিল। জীবানন্দ সকৌতুক হাসিমুখে তাহার প্রতি  
দৃষ্টি রাখিয়া ক্ষণকাল নীরবে দাঁড়াইয়া রহিলেন

প্রফুল্ল। দাদা কি শেষে একটা লঙ্কাকাণ্ড বাধাবেন না কি?

জীবানন্দ। যদি বাধে সে ভাগ্যের কথা প্রফুল্ল। তার জন্তে দেবতাদের একদিন তপস্বী করতে হয়েছিল।

প্রফুল্ল। দেবতারা পারেন। লঙ্কার বাইরে বসে তপস্বী করায় পুণ্যও আছে, হুশিহুতাও কম। কিন্তু লঙ্কার ভিতরে যারা বাস করে লঙ্কাকাণ্ডের ব্যাপারে তাদের ভাগ্যকে ঠিক সৌভাগ্য বলা চলে না। এসে পর্য্যন্ত গ্রামস্থল লোকের সঙ্গে বিবাদ করে বেড়ানো আপনার গৌরবেরও নয়, প্রয়োজনও নয়। ইতিমধ্যে নানাপ্রকার কার্যই ত করা গেল, এখন ক্ষান্ত দিয়ে চলুন বাড়ী ফিরে যাওয়া যাক্!

জীবানন্দ। সময় হলেই যাবো!

প্রফুল্ল। তাই যাবেন। 'বাই হোক দাদা, আপনার যাবার সময়ের

তবু একটা আন্দাজ পাওয়া গেল, কিন্তু 'আমার যাবার সময় যে কবে আসবে তার কূল কিনারাও চোখে পড়ে না।

এককড়ির প্রবেশ

এককড়ি। মিস্ত্রী দাঁড়িয়ে আছে। পুলের কাজটা কোথা থেকে আরম্ভ হবে জানতে চায়।

জীবানন্দ। চল না প্রফুল্ল, একবার মাঠে গিয়ে তাদের কাজটা দেখিয়ে আসি গে।

প্রফুল্ল। চলুন।

জীবানন্দ প্রফুল্লকে লইয়া বাহির হইয়া গেলেন। অন্তরিক দিয়া

শিরোমণি ও জনার্দন রায় প্রবেশ করিলেন

জনার্দন। বাবু গেলেন কোথায় এককড়ি ?

এককড়ি। মিস্ত্রীকে দেখাতে গেলেন। মাঠে সাঁকো তৈরি হবে।

জনার্দন। পাংগলের খেয়াল।

শিরোমণি। মতপান জনিত বুদ্ধি-বিকৃতি।

এককড়ি। এই শনিবারে হাকিম সরজমিন-তদন্তে আসবেন। ছোট-লোক ব্যাটাদের বুদ্ধি এবং টাকা কে যোগাচ্ছে ঠিক জানতে পারলাম না, কিন্তু এইটুকু জানতে পারলাম তারা সাক্ষী মান্লে হজুর গোপন কিছুই করবেন না। দলিল তৈরীর কথা পর্য্যন্ত না।

জনার্দন। (সহাস্ত্রে) আমার বয়সটা কত হয়েছে ঠাওরাও এককড়ি ? চণ্ডীগড়ের জনার্দন রায়কে ও ধাপ্পায় কাৎ করা যাবে না, বাপু, আর কোন মতলব ভেঁজে এসো গে। (এক মুহূর্ত মৌন থাকিয়া) তবে, এ কথা মানি তোমার হাতে গিয়ে একটু পড়েচি। মোচড় দিয়ে

ছপস্সা উপরি রোজগারের সময় এই বটে। কিন্তু তাই বলে যা রয় সয় কর।

এককড়ি। সত্যি বল্চি আপনাকে রায়মশায়—

জনার্দন। আহা, সত্যিই ত বল্চো! এককড়ি নন্দী আবার মিথ্যে কবে বলেন? সে কথা নয় ভায়া, আমার না হয় শ' খানেক বিষের টান্ ধরবে, কিন্তু তাঁর নিজের যাবে কত? সেটা কি তোমার মনিব খতিয়ে দেখেন নি? না দেখে থাকেন ত দেখাও গে চোখে আঙুল দিয়ে। তার পরে না হয় আমাকে প্যাচ ক'সো।

এককড়ি। যাগ-জমির কথাই হচ্ছে না রায়মশায়, কথা হচ্ছে দলিল-পত্র তৈরি করার। জিজ্ঞাসা করলে সমস্তই বলবেন, কিছুই গোপন করবেন না।

জনার্দন। তার হেতু? শ্রীঘরে যাবার বাসনা ত? কিন্তু একা জনার্দন যাবে না এককড়ি, মহারাণী হজুর বলে রেয়াৎ করবে না—কথাটা তাঁকে ব'লো।

এককড়ি। (অভিমান সুরে) বল্তে হয়, আপনি নিজেই বলবেন।

জনার্দন। বল্বে বই কি হে। ভাল করেই বল্বে। হাকিমের কাছে কবুল জবাব দিয়ে সাধু সাজা ঠাট্টা তামাসা নয়। (ইঙ্গিতে দেখাইয়া) হাতকড়ি পড়বে।

এককড়ি। সে আপনি বুঝবেন আর তিনি বুঝবেন।

জনার্দন। আর তুমি? শ্রীমান এককড়ি নন্দী? বাড়ী যখন পুড়েছে তখন জানি কি একটা ভেতরে হচ্ছে। কিন্তু জনার্দনকে অত নরম মাটি ঠাউরোনা ভায়া, পস্তাবে। নির্মলকে আটকে রেখেচি, সেই তোমাদের বুঝিয়ে দেবে।

এককড়ি। আমার ওপরে মিথ্যে রাগ করচেন রায়মশায়, যা জানি

তাই শুধু জানিয়েছি। বিশ্বাস না হয়, হুজুর ত এই সামনের মাঠেই আছেন, একটু ঘুরে গিয়ে জিজ্ঞেসা করেই যান্ না!

জনার্দন। তাই যাবো। শিরোমণিমশায়, আসুন ত?

শিরোমণি। চল না ভায়া, ভয় কিসের?

দুই-এক পা অগ্রসর হইয়া সহসা পিছন ফিরিয়া

শিরোমণি। ( এককড়ির প্রতি ) বলি, অত্যধিক মতপান ক'রে নেই ত? তা হলে না হয়—

এককড়ি। মদ তিনি খান্ না! ( হঠাৎ কর্ণস্বর সংঘত করিয়া ) কিন্তু যেতেও আর হবে না। হুজুর নিজেই আসছেন।

জীবানন্দ ও প্রফুল্ল তর্ক করিতে করিতে প্রবেশ করিলেন

জনার্দন। ( কাছে গিয়া স্বাভাবিক ব্যাকুলতার সহিত )। হুজুর সমস্ত ব্যাপার একবার মনে করে দেখুন!

জীবানন্দ। কিসের রায়মশায়?

জনার্দন। জমি বিক্রীর ব্যাপারে হাকিম নিজে আসছেন তদন্ত করতে। হয় ত ভারি মকদ্দমাই বাধ্বে। কিন্তু আপনি না কি—

জীবানন্দ। ওঃ! কিন্তু উপায় কি রায়মশায়? সাহেব জমি ছাড়তে চায় না, সে সস্তায় কিনেচে। মকদ্দমা ত বাধ্বেই। স্ততরাং মামলা জেতা ছাড়া প্রজাদের আর ত পথ দেখি নে।

জনার্দন। ( আকুল হইয়া ) কিন্তু আমাদের পথ?

জীবানন্দ। ( ক্ষণকাল চিন্তা করিয়া ) সে ঠিক, আমাদের পথও খুব দুর্গম মনে হয়।

জনার্দন। ( মরিয়া হইয়া ) এককড়ি তা হলে সত্যই বলেছে!

কিন্তু হজুর, পথ শুধু দুর্গম নয়—জেল খাটতে হবে। এবং আমরা একা নয় আপনিও বাদ যাবেন না।

জীবানন্দ। ( একটুখানি হাসিয়া ) তাই বা কি করা যাবে রায়-মশায়! সখ করে যখন গাছ পোতা গেছে, ফল তার খেতে হবে বই কি।

জনার্দন। ( চীৎকার করিয়া ) এ আমাদের সর্বনাশ করবে এককড়ি।

পাগলের মত ঝড়ের বেগে জনার্দন বাহির হইয়া গেল,

তাহার পিছনে এককড়ি নিঃশব্দে প্রবেশ করিল

নেপথ্যে কোলাহল

জীবানন্দ। ( ঋণকাল স্তব্ধভাবে থাকিয়া ) কারা যায় প্রফুল্ল ?

প্রফুল্ল। বোধ হয় আপনার মাটি-কাটা ধাওড় কুলীর দল।

জীবানন্দ। একবার ডাকো তো ডাকো তো হে। শুনি আজ বাঁধের কাজ কতখানি করলে।

প্রফুল্ল। ( দ্রব্য অগ্রসর হইয়া ) ওহে, ও সর্দার ? শোন শোন, একবার শুনে যাও।

স্ত্রী ও পুরুষ কুলীদের প্রবেশ

সর্দার। কি রে, ডাক্‌ছিষ্ কেনে ?

জীবানন্দ। বাবারা, কোথায় চলেছিষ্ বল্ ত ?

সর্দার। ভাত খাবার লাগি রে।

জীবানন্দ। দেখিষ্ বাবারা, আমার বাঁধের কাজ যেন বর্ষার আগেই শেষ হয়।

সকলে । ( সমস্বরে ) সব হোয়ে যাবে রে, সব হোয়ে যাবে । তুই  
কিছু ভাবিস না । চল ।

কুলীদের প্রস্থান

নির্মল প্রবেশ করিল

জীবানন্দ । ( সাদরে ) আসুন, আসুন, নির্মলবাবু ।

নির্মল । ( নমস্কার করিয়া ) আপনার সঙ্গে আমার একটু  
কাজ আছে ।

জীবানন্দ । আর একদিন হলে হয় না ?

নির্মল । না, আমার বিশেষ প্রয়োজন ।

জীবানন্দ । তা বটে । অকাজের বোঝা টানতে যাকে আটক  
থাকতে হয় তাঁর সময় নষ্ট করা চলে না ।

নির্মল । অকাজ মাহুষে করে বলেই ত সংসারে আমাদের প্রয়োজন  
চৌধুরীমশাই ।

জীবানন্দ । কিন্তু কাজের ধারণা ত সকলের এক নয় নির্মলবাবু ।  
রায়মশায়ের আমি অকল্যাণ কামনা করি নে । এবং আপনার উদ্দেশ্য  
সফল হলে আমি বাস্তবিকই খুসি হব, কিন্তু আমার কর্তব্যও আমি স্থির  
করে ফেলেছি এ থেকে নড়চড় করা আর সম্ভব হবে না ।

নির্মল । এ কথা কি সত্য যে আপনি সমস্তই স্বীকার করবেন ?

জীবানন্দ । সত্য বই কি ।

নির্মল । এমন ত হতে পারে আপনার কবুল জবাবে আপনিই শুধু  
শান্তি পাবেন, কিন্তু আর সকলে বেঁচে যাবেন ।

জীবানন্দ । খুব সম্ভব বটে । কিন্তু সে জন্তে আমার কোন অভিযোগ  
নেই নির্মলবাবু । নিজের কৃতকর্মের ফল আমি একা ভোগ করলেই



যথেষ্ট। নইলে রায়মশায় নিস্তার লাভ করে সুস্থদেহে সংসার যাত্রা নির্বাহ করতে থাকুন, এবং আমার এককড়ি নন্দীমশায়ও আর কোথাও গোমস্তাগিরি কর্ষে উত্তরোত্তর শ্রীবৃদ্ধি লাভ করতে থাকুন, কারও প্রতি আমার আক্রোশ নেই।

নির্মল। আত্মরক্ষায় সকলেরই ত অধিকার আছে, অতএব শ্বশুর-মশায়কেও করতে হবে। আপনি নিজে জমিদার, আপনার কাছে মামলা মোকদ্দমার বিবরণ দিতে যাওয়া বাহ্যিক—শেষ পর্যন্ত হয় ত বা বিষ দিয়ে বিষের চিকিৎসা করতে হবে।

জীবানন্দ। চিকিৎসা কি জাল-করার বিষে খুন করার ব্যবস্থা দেবেন ?

নির্মল। ( রাগ সঞ্চার করিয়া ) এমন ত হতে পারে কারও কোন শাস্তিভোগ করারই আবশ্যক হবে না, অথচ ক্ষতিও কাউকে স্বীকার করতে হবে না।

জীবানন্দ। ( তৎক্ষণাৎ সম্মত হইয়া ) বেশ ত পারেন ভালই। কিন্তু আমি অনেক চিন্তা করে দেখেছি সে হবার নয়। কৃষকেরা তাদের জমি ছাড়বে না। কারণ এ শুধু অন্নবস্ত্রের কথা নয়, তাদের সাত-পুরুষের চাষ আবাদের মাঠ, এর সঙ্গে তাদের নাড়ীর সম্পর্ক। এ তাদের দিতেই হবে। ( একটু চুপ করিয়া ) আপনি ভালই জানেন, অল্পপক্ষ অত্যন্ত প্রবল, তার উপর জোর জুলুম চলবে না। চলতে পারে কেবল চাষীদের উপর, কিন্তু চিরদিন তাদের প্রতিই অত্যাচার হয়ে আসছে, আর হতে আমি দেব না।

নির্মল। আপনার বিস্তীর্ণ জমিদারী ; এই ক'টা চাষার কি আর তাতে স্থান হবে না ? কোথাও না কোথাও—

জীবানন্দ। না না, আর কোথাও না—এই চণ্ডীগড়ে। এইখানে

আমি জোর করে সেদিন তাদের কাছে অনেক টাকা আদায় করেছি— আর সে টাকা যুগিয়েছেন জনার্দন রায়। এ ঋণ পরিশোধ করতে আমাকে হবেই। এবং আরও যে কত বড় একটা শূল তাদের বিদ্ধ করেছে, সে কথা শুধু আমিই জানি। কিন্তু থাক্। অপ্রীতিকর আলোচনায় আর আমার প্রবৃত্তি নেই নিশ্চলবাবু, আমি মনস্থির করেছি।

জীবানন্দ প্রস্থান করিলেন

সেই দিকে চাহিয়া নিশ্চল অভিভূতের স্থায় স্থির হইয়া রহিল। এমন সময়ে ফকির সাহেব প্রবেশ করিলেন

ফকির। জামাইবাবু, সেলাম। বাবু কই ?

নিশ্চল। (অভিবাদন করিয়া) জানি নে। ফকিরসাহেব, ষোড়শীকে আমাদের বড় প্রয়োজন। তিনি যেখানেই থাকুন একবার আমাকে দেখা কর্তেই হবে। বলুন, কোথায় আছেন।

ফকির। আপনাকে জানাতে আমার বাধা নেই। কারণ, একদিন যখন সবাই তাঁর সৰ্কনাশে উত্তত হয়েছিল, তখন আপনিই শুধু তাঁকে রক্ষা করতে দাঁড়িয়েছিলেন।

নিশ্চল। আজ আবার ঠিক সেইটি উল্টে দাঁড়িয়েছে ফকিরসাহেব। এখন, কেউ যদি তাঁদের বাঁচাতে পারে ত শুধু তিনিই। কোথায় আছেন এখন ?

ফকির। শৈবাল দিঘীর কুষ্ঠাশ্রমে।

নিশ্চল। কুষ্ঠাশ্রমে ? সেখানে কি স্থখে আছেন ?

ফকির। (মূহু হাসিয়া) এই নিন্। মেয়েমানুষের স্থখে থাকার খবর দেবতারা জ্ঞানেন না, আমি ত আবার সন্ন্যাসীমানুষ। তবে, মা আমার শান্তিতে আছেন এইটুকুই অল্পমণ্ডন করতে পারি।

নির্মল। ( ক্ষণকাল মৌন থাকিয়া ) এখানে আপনি কোথায় এসেছিলেন ?

ফকির। জমিদার জীবানন্দের এই চিঠি পেয়ে তাঁরই সঙ্গে একবার দেখা করতে। এই চিঠি আপনাদের পড়া প্রয়োজন। নিম্ন পড়ুন।

চিঠিখানি দিতে গেলেন

নির্মল। ( সসঙ্কোচে ) জীবানন্দের লেখা ? ও আমি ছোঁব না ! প্রয়োজন থাকে আপনিই পড়ুন।

ফকির। প্রয়োজন আছে ! নইলে বলতাম না। পত্র আমাকেই লেখা।

ফকির ধীরে ধীরে চিঠিখানি পড়িতে লাগিলেন এবং নির্মলের মুখের

ভাব সংশয় ও বিস্ময়ে কঠিন হইয়া উঠিতে লাগিল

ফকির। ( পত্রপাঠ )—

“ফকিরসাহেব,

ষোড়শীর আসল নাম অলকা। সে আমার স্ত্রী। আপনার কুষ্ঠাশ্রমের কল্যাণ কামনা করি, কিন্তু তাহাকে দিয়া কোন ছোট কাজ করাইবেন না। আশ্রম যেখানে প্রতিষ্ঠিত করিয়াছেন সে আমার নয়, কিন্তু তাহার সংলগ্ন শৈবাল-দীঘি আমার। এই গ্রামের মুনাফা প্রায় পাঁচ-ছয় হাজার টাকা। আপনাকে জানি। কিন্তু আপনার অবর্তমানে পাছে কেহ তাহাকে নিরুপায় মনে করিয়া অমর্যাদা করে, এই ভয়ে আশ্রমের জন্তই গ্রামখানি তাহাকে দিলাম। আপনি নিজে একদিন আইন ব্যবসায়ী ছিলেন, এই দান পাকা করিয়া বইতে বাহা কিছু প্রয়োজন, করিবেন ;

সে খরচ আমিই দিব। কাগজপত্র প্রস্তুত করিয়া পাঠাইলে আমি সহি করিয়া রেজেষ্টারী করিয়া দিব।

শ্রীজীবানন্দ চৌধুরী।”

ফকির। (নির্ম্মলের মুখের ভাব লক্ষ্য করিয়া) সংসারে কত বিস্ময়ই না আছে!

নির্ম্মল। (দীর্ঘ নিশ্বাস ফেলিয়া, ঘাড় নাড়িয়া) হাঁ। কিন্তু এ যে সত্য তায় প্রমাণ কি?

ফকির। সত্য না হলে এ দান নেবার জ্ঞাত ষোড়শীকে কিছুতেই আনতে পারতাম না।

নির্ম্মল। (ব্যগ্রকণ্ঠে) কিন্তু তিনি কি এসেছেন? কোথায় আছেন?

ফকির। আছেন আমার কুটারে, নদীর পরপারে।

নির্ম্মল। আমার যে এখনি একবার যাওয়া চাই ফকিরসাহেব।

ফকির। চলুন। (হাসিয়া) কিন্তু বেলা পড়ে এল, আবার না তাঁকে হাত ধরে রেখে যেতে হয়।

উভয়ের অস্থান

সহসা অন্তরাল হইতে কয়েক জনের সতর্ক, চাপা কোলাহলের মধ্যে হইতে প্রফুল্লর

কণ্ঠস্বর স্পষ্ট শোনা গেল—“সাবধানে! সাবধানে! দেখো যেন ধাক্কা না

লাগে!” এবং পরক্ষণেই তাহারা ধরাধরি করিয়া জীবানন্দকে বহিয়া

আনিয়া বিছানায় শোয়াইয়া দিল। তাহার চক্ষু মুদ্রিত।

সঙ্গে প্রফুল্ল

প্রফুল্ল। এখন কেমন মনে হচ্ছে দাদা?

জীবানন্দ । ভাল না । আমি অজ্ঞান হয়ে সঁাকো থেকে কি পড়ে গিয়েছিলাম প্রফুল্ল ?

প্রফুল্ল । না দাদা, আমরা ধরে ফেলেছিলাম । কতবার বলেছি এ রুগ্নদেহে এত পরিশ্রম সহাবে না, কিন্তু কিছুতে কান দিলেন না । কি সর্বনাশ করলেন বলুন ত ?

জীবানন্দ । ( চক্ষু মেলিয়া ) সর্বনাশ কোথায় প্রফুল্ল, এই ত আমার পার হবার পাথেয় । এ ছাড়া এ জীবনে আর সম্বল ছিল কই ?

দ্রুতবেগে এককড়ি প্রবেশ করিল ; তাহার হাতে একটা কাঁচের শিশি

এককড়ি । ( প্রফুল্লর প্রতি ) এখুনি হুজুরকে এটা খাইয়ে দিন । বল্লভ ডাক্তার দৌড়ে আসূচে—এলো বলে ।

প্রফুল্ল । ( শিশি হাতে লইয়া জীবানন্দের কাছে গিয়া ) দাদা ! এই ওষুটুকু যে খেতে হবে ?

জীবানন্দ । ( চক্ষু মুদ্রিত ) খেতে হবে ? দাও ।

( ঔষধ পান করিয়া ) কোথায় যেন ভয়ানক ব্যথা, প্রফুল্ল, যেন এ ব্যথার আর সীমা নেই । উঃ—

প্রফুল্ল । ( ব্যাকুল কণ্ঠে ) এককড়ি, দেখ না একবার ডাক্তার কত দূরে—যাও না আর একবার ছুটে ।

এককড়ি । ছুটেই বাচ্ছি বাবু—

দ্রুতপদে প্রস্থান

জীবানন্দ । ছুটোছুটিতে আর কি হবে প্রফুল্ল । মনে হচ্ছে যেন আজ আর তোমরা ছুটে আমার নাগাল পাবে না ।

প্রফুল্ল । ( নিকটে হাঁটু গাড়িয়া বসিয়া ) এমন ত কতবার হয়েছে, কতবার সেরে গেছে দাদা । অংগ কেন এ রকম ভাবচেন ?

জীবানন্দ। ভাবচি? না প্রফুল্ল, ভাবি নি। (ঈষৎ হাসিয়া)  
অসুখ বহবার হয়েছে এবং বহবার সেরেছে সে ঠিক। কিন্তু এবার যে  
আর কিছুতেই সারবে না সেও ত এমনিই ঠিক প্রফুল্ল।

এককড়ি ও বল্লভ ডাক্তারের প্রবেশ

প্রফুল্ল। (উঠিয়া দাঁড়াইয়া) আসুন ডাক্তারবাবু।

বল্লভ। হজুরের অসুখ—ছুটে ছুটে আস্চি। ওষুধটা  
খাওয়ানো হয়েছে ত?

এককড়ি। হয়েছে ডাক্তারবাবু, তখুনি হয়েছে। ওষুধের শিশি  
হাতে উঠি ত পড়ি ক'রে ছুটে এসেছি।

বল্লভ কাছে আসিয়া বসিল। কিছুক্ষণ ধরিয়া নাড়ী পরীক্ষা করিয়া  
মুখ বিকৃত করিল। মাথা নাড়িয়া প্রফুল্লকে ইঙ্গিতে জানাইল  
যে অবস্থা ভাল ঠেকিতেছে না

এককড়ি। (আকুল কণ্ঠে) কি হবে ডাক্তারবাবু? খুব ভালো  
জোরালো একটা ওষুধ দিন—আমরা ডবল্ বিজিট দেব—যা চাইবেন  
দেব—

প্রফুল্ল। যা চাইবেন দেব? শুধু এই? সে আর কতটুকু এককড়ি?  
আমরা তারও অনেক, অনেক বেশি দেব। আমার নিজের প্রাণের দাম  
বেশি নয়, কিন্তু সে দেওয়াও ত আজ অতি তুচ্ছ মনে হয় ডাক্তারবাবু।

বল্লভ। (উপরের দিকে মুখ তুলিয়া) সমস্তই গুঁর হাতে প্রফুল্লবাবু,  
নইলে আমার আর কি! নিমিত্ত মাত্র! লোকে শুধু মিথ্যে ভাবে বইত  
না যে, চণ্ডীগড়ের বল্লভ ডাক্তার মম্মা বাঁচাতে পারে! ওষুধের বাস্র

সঙ্গেই এনেছি, এ সব ভুল আমার হয় না। চলুন নন্দীমশাই, শিগ্গির একটা মিক্চার তৈরি করে দিই!

এককড়ি ও বলভের প্রস্থান।

জীবানন্দ। চোখ বুজে শুয়ে কত কি মনে হচ্ছিল প্রফুল্ল। মনে হচ্ছিল আশ্চর্য্য এই পৃথিবী! নইলে আমার জন্তে চোখের জল ফেলতে তোমাকে পেয়েছিলাম কি করে?

প্রফুল্ল। আপনি ত জানেন—

জীবানন্দ। জানি বই কি প্রফুল্ল। কিন্তু এককড়ি তার কি জানে? সে জানে তারই মত তুমিও শুধু একজন কর্মচারী। এক পাষণ্ড জমিদারের তেমনি অসাধু সঙ্গী। কত যে করেছে, নীরবে কত যে সয়েছ, বাইরের লোকে তার কি খবর রাখে। মাঝে মাঝে বখন অসহ্য হয়েছে দুটো ভাত-ডাল যোগাড়ের ছল করে ত্যাগ করে যেতে চেয়েছ কিন্তু যেতে আমি দিই নি। আজ ভাবি ভালই করেছি। সত্যি ছেড়ে চলে যদি যেতে প্রফুল্ল, আজকের দুঃখ রাখবার ব্যয়গা পেতে কোথায়?

প্রফুল্ল। দাদা—

জীবানন্দ। একটুখানি কাগজ-কলম আনো না প্রফুল্ল, তোমার দাদার স্নেহের দান—

প্রফুল্ল। (পদতলে নতজাহ্নু হইয়া বসিয়া) স্নেহ আপনার অনেক পেয়েছি দাদা, সেই শুধু আমার সম্বল হয়ে থাক। আপনি কেবল আমাকে এই আশীর্বাদ করুন, নিজের পরিশ্রমে বা কিছু পাই এ জীবনে তার বেশি না লোভ করি।

জীবানন্দ। (ক্ষণকাল নিস্তব্ধ থাকিয়া) বেশ, তাই হোক প্রফুল্ল।

দান ক'রে তোমাকে আমি খাটো ক'য়ে যাবো না। কিন্তু লোভী  
তুমি ত কোনদিনই নও।

বল্লভ নিঃশব্দে প্রবেশ করিয়া ঔষধের পাত্র প্রফুল্লর হাতে দিয়া ভেম্বনি  
নিঃশব্দে প্রস্থান করিল

প্রফুল্ল। দাদা? এই ওষুটুকু খান্।

প্রফুল্ল কাছে আসিয়া ঔষধ জীবানন্দের মুখে ঢালিয়া দিয়া নিজের কোঁচার  
খুঁট দিয়া তাঁহার ওষ্ঠ-প্রান্ত মুছাইয়া দিল

জীবানন্দ। কি ভয়ানক অন্ধকার প্রফুল্ল। রাত্রি কত হ'ল ভাই?

প্রফুল্ল। রাত্রি ত এখনো হয় নি দাদা।

জীবানন্দ। হয় নি? তবে আমার হৃৎক্ষে এ নিবিড় আঁধার কিসের  
প্রফুল্ল।

প্রফুল্ল। অন্ধকার ত নেই দাদা। এখনো যে সূর্যাস্তও হয় নি।

জীবানন্দ। হয় নি? যায় নি সূর্য এখনো ডুবে? তবে খোল, খোল,  
আমার স্নমুখের জানালা খুলে দাও প্রফুল্ল, একবার দেখি তাঁকে। যাবার  
আগে আমার শেষ নমস্কার তাঁকে জানিয়ে যাই।

প্রফুল্ল স্নমুখের বাতায়ন খুলিয়া দিল, এবং কাছে আসিয়া জীবানন্দের ইঙ্গিত মত তাঁহার  
মাথাটি সমস্তে উঁচু করিয়া দিল। অদূরে বারুইয়ের শীর্ণ জলধারা মন্ববেগে বহিতেছে। পর-  
পারে সূর্য অন্তগমনোন্মুখ। দূরে নীল বনানী আরক্ত আভাষ রঞ্জিত। তটে ধূসর বালুকা-  
রাশি উজ্জ্বল হইয়া উঠিয়াছে

জীবানন্দ। (চোখ মেলিয়া কল্পিত দুই হস্ত যুক্ত করিয়া ললাটে  
স্পর্শ করাইল। ক্ষণকাল স্তব্ধভাবে ডাকিয়া) বিশ্বদেব! কে বলে তুমি  
অচেনা? তুমি চির-রহস্যে ঢাকা? জন্মান্তরের সহস্র পরিচয় যে আজ  
যাবার দিনে তোমার মুখে স্পষ্ট দেখুত পেলাম।



( একমুহূর্ত্ত নীরব থাকিয়া ) ভেবেছিলাম, হয় ত তোমাকে দেখে ভয় হবে—হয় ত এ জীবনের শতক গ্লানি দীর্ঘ কালো ছায়া মেলে আজ মুখ তোমার ঢেকে দেবে, কিন্তু সে ত হতে দাও নি ! বন্ধু, এ জন্মের শেষ নমস্কার তুমি গ্রহণ কর ।

( শ্রান্তিতে ঢলিয়া পড়িয়া ) উঃ—কি ব্যথা !

প্রফুল্ল । ( ব্যাকুল কণ্ঠে ) ব্যথা কোথায় দাদা ?

জীবানন্দ । কোথায় ? মাথায়, বুকে আমার সর্বদেহে, প্রফুল্ল—উঃ—

ঋতপদে ষোড়শী প্রবেশ করিল । তাহার পশ্চাতে এককড়ি ও বস্ত্র ভাঙার

ষোড়শী । এ কি কথা এরা সব বলে প্রফুল্ল !

জীবানন্দের পদতলে বসিয়া পড়িল

ষোড়শী । তোমাকে নিয়ে যাবার জন্তে যে আজ সমস্ত ছেড়ে চলে এসেছি । কিন্তু নিষ্ঠুর—অভিমানে এ কি করলে তুমি !

প্রফুল্ল । দাদা, চেয়ে দেখুন অলকা এসেছেন ।

জীবানন্দ । অলকা ? এলে তুমি ? ( ধীরে ধীরে মাথা নাড়িয়া ) কিন্তু সময় নেই আর ।

ষোড়শী । কিন্তু, এই যে সেদিন বললে, তুমি সংসারে বাঁচতে চাও—মাছুষের মাঝখানে মাছুষের মত হয়ে । তুমি বাড়ী চাও, ঘর চাও, স্ত্রী চাও, সন্তান চাও—

জীবানন্দ । ( মাথা নাড়িয়া ) না । আজ ফাঁকি দিয়ে আর কিছুই চাই নে অলকা ! চিরদিন কেবল ফাঁকি দিয়ে পেয়ে পেয়েই স্পর্ধা বেড়ে গিয়েছিল, ভেবেছিলাম, এমনিই বুঝি । কিন্তু আজ তার কৈফিয়ৎ দেবার দিন এসেছে । সৌভাগ্য এ জীবনে অর্জন করি নি অলকা, সেই ত ঋণ—সে বোঝা আরুণেন আমান্ত না বাড়ে ।

ষোড়শী জীবানন্দের বুকের উপরে মাথা রাখিতে সে ধীরে ধীরে

তাহার অক্ষম হাতখানি ষোড়শীর মাথার পরে রাখিল

জীবানন্দ। অভিমান ছিল বই কি একটু। তবু যাবার আগে এই  
ত তোমাকে পেলাম। এর অধিক পাওয়া সংসারের নিত্য কাজে হয় ত  
বা কখনো ক্ষুণ্ণ, কখনো বা ম্লান হ'তো কিন্তু সে ভয় আর রইল না।  
এ মিলনের আর বিচ্ছেদ নেই, অলকা, এই ভাল। এই ভাল।

ষোড়শী কথা কহিতে পারিল না, দুঃসহ রোদনের বেগে তাহার

সমস্ত বক্ষ ফুলিয়া ফুলিয়া উঠিতে লাগিল

জীবানন্দ। উঃ! পৃথিবীতে আর হাওয়া নেই প্রফুল্ল?

প্রফুল্ল। কষ্ট কি খুব বেশি হচ্ছে দাদা? ডাক্তারকে কি একবার  
ডাক্বে?

জীবানন্দ। না না, আর ডাক্তার বড়ি নয় প্রফুল্ল, শুধু তুমি আর  
অলকা। উঃ—কি অন্ধকার! সূর্য্য কি অস্ত গেল ভাই?

প্রফুল্ল। এই মাত্র গেল দাদা।

জীবানন্দ। তাই। হাওয়া নেই, আলো নেই, বিশ্বদেব! এ  
জীবনের শেষ দান কি তবে নিঃশেষ করেই নিলে! উঃ—

ষোড়শী। স্বামী!

প্রফুল্ল। প্রফুল্লকে কি আজ, সত্যিই ছুটি দিলে দাদা।

## যবনিকা

গুরুদাস চট্টোপাধ্যায় এণ্ড সন্দের পাবলিশার্স

প্রকাশক ও মুদ্রাকর—শ্রীগোবিন্দপদ চট্টোপাধ্যায়, ভারতবর্ষ প্রিন্টিং ওয়ার্কস্

২০৩/১১, কর্ণওয়ালিস স্ট্রীট, কলিকাতা—৬

# ষোড়শী নাট্যোল্লিখিত ব্যক্তিগণ

জীবানন্দ চৌধুরী	...	চণ্ডীগড়ের জমিদার
প্রফুল্ল রায়	...	জীবানন্দের সেক্রেটারী
এককড়ি নন্দী	...	গমস্তা
জনার্দন রায়	...	মহাজন
নির্মল বসু	...	ব্যারিষ্টার
শিরোমণি	...	ব্রাহ্মণ পণ্ডিত
তারানাস চক্রবর্তী	...	ষোড়শীর পিতা
সাগর সর্দার	...	ষোড়শীর অহুচর

পূজারী, ম্যাজিষ্ট্রেট, ইন্সপেক্টার, সর্ব-ইন্সপেক্টার,  
বল্লভ ডাক্তার, ফাকর, হারিহর, বিশ্বম্ভর, ভিক্ষুক-  
ষয়, মহাবীর, বেহার', ভৃত্য, পাথক,  
গাড়োয়ান, পাইক-গণ ইত্যাদি

ত্রাণ

ষোড়শী	...	গড়চণ্ডীর ভৈরবী
হৈমবতী	{ ...	জনার্দনের কন্যা
		নির্মলের স্ত্রী

ভিক্ষুক-কন্যা, নন্দীগণ ইত্যাদি

1

2

3

4

5

6







